

# Wangarini kuku Wasina pakich kamanchinllpa yuwaa Wangarini yandarangu anootsi

Wangarini sirútamasa Isusoo wamach-tashimuna. Isusush zapan tachitarangya. Anpur Wangarini kanungasimascha. Waana Wangarini, Isus nuwaa kizpur chinakiya, tárangeya. Ashirucha, Isusoo kapung patariya. Isus Waparip káreeru, Wangarinsha tputsee zapan kamanirangya Isusootsi kuku. Tputsshá zapan Isusoo mangoonarangana. Isus Apanllip kárirangu anumun 20 masach tushiyaru, Wangarinsha kirakaa yandarangya; Isusoo kapung kamanirangya. Isus Apanllcha wipa. Iyaam tputseemani tsiparangya. Iysha mangoonkuni, urutamari Isuspatari taachchi, kirakush yandaru tárangeya.

Wangarinsha kirakaa yandarangu, Isuschicheem arapcheemawa zanganirangya. Ichingurusin Kiríkshuchee kuk tsiyatarangana; ashiruch Wangarinsha Kiríkshuchee kuk yandarangya.

Ashiriya, na yuwaa kamanirangu anoo kamanchinllpa:

A. 1.1-18: Isus Apanlliritcha. Nish tsapush kusarangya. Iyaa, Apap izuuru yasapana átu, tayaspatarangya.

- B. 1.19–12.50: Isus tputsee kapung istarangu, tsipareetstaa ituyamarangu, waanaatsi itsinsaru kamanirangu, Waparee kuk tayaspatarangya. Ashpatam tputs, Zurakcha, Isus Apanllcha wipa, tárangana. Itaru, ashpatam tputs Isusoo izuuru ngatarangana.
- 1.19–2.11: Apuchirini iyaatssha, Apanll Isusoo iyaa yutaritshishirini tachingamaam zanganirangiya, tárangeiya. Isus iyaam wipunasheem ipusarangya.
- 2.12–3.20: Isus Utaáshuchee tputs tayaspatarangya. Ndunnaa tputs taárashee kaneesich nllurtaku, Apanlee watsapun ayamtaati pangcheeja, ndambaree, tárangeiya.
- 3.21–4.54: Isus Samariyashchee kiza tayaspatarangu, uwsha, Zurakcha, Isus Apanllcha wipa, tárangeiya.
- 5.1–47: Isus tputsee wanuts tsiparimashi ituyamarangya. Nuw Apappataritana tatsamooktana, tárange. Nuw tputsee tsipareetstaata ituyamayaruri, magooazee yasachima, tárangeiya.
- 6.1–71: Isus pangaa zameetpata yáyaru, kayupcheetssha tsimbun yáyaru, anpatari zameetpa mil tputs martarangya. Nuw taarashipantana, tárangeiya.
- 7.1–12.50: Isussha wach' mchusaatstaa yararangya. Nuw mangoozee p'tsimpantana, tárangeiya. Tputs nuwash tachitku, ayamtaatiya kanatsipcheezi, ndambaree, tárangeiya. Anumunsha, Isus

wamkur, Lásaru, tsiparangitaa, ashiritaa  
Isus wamkuree ituyamarangiya.

- C. 13.1--20.29: Isus iyaa wipunashi tayaspatarangiya. Na musá Apapap kanapchima, itaru Apap Wani siyaa istachiya, tárange. Sambaytarintspa; nuwaatsimari kuki payungtsa. Saanpata uru chinangtsa, tárange. Táyaru, waparpat iyaam kapung tsiyatarangiya. Anumunsha yutaritshishirineetsini tachingamaam tsiparangiya. Nuw kachi parangtana. Tsiparangitaa, itaru amputaam tamarangiya. Yusur kchitarangu, nuw Isusoo kchiptarti parangina.
- D. 20.30--21.25: Isus Pitoroo kamachtarangiya iyaa ksutamaama. Siyaa, Isusoo izuuru yasapana aturi, nee kirakareetsi yandarangina.

Tárange Wangarini.

## **Nuw Wangi siyaam yandakuri, Isusoo kuk kamanchintspa**

*Ichtaru, yuwa Isus Apanllee izuuru iyaa kamanchangu anoo kamanchintspa*

<sup>1</sup> Sirútama, nduma Apanll tsapurunasee tinchu, Apanllee wamari yámandampán uru taarangiya. Uru Apanllpatari washunandari taaranganaya. Apanlltamcha. <sup>2</sup> Ashirucha, nuwsha táshina; nduma maacheetsi tinchu, Apanllee yámandampán uru Apanllpatari taarangiya. <sup>3</sup> Apanllee yámandampánirini maacheetsi ichinguru

tinarangiya, ¿Ndunnaari utaz ashireeja maacheetsi tinarang?\* <sup>4</sup> Tputseetstam tinarangiya, watam taarashipaniwa. Tinayaru, wandari ksutkiya. Ashiri chiyaa tputseetsich Apanlee yámandakiya. Uwsha iyaa tuwasinimpancha. <sup>5</sup>'Sini tamatarpari tunimush tuwasintaru, ashiritam tputush mang' tuwasineerangu, ashtaru anootstaa tputs ngatarangana. Kapung ngatarangitaatssin, 'sinee ztazamaam pinasakana.

<sup>6-7</sup> Itaru, Apanlee yámandampanimun mang' tatumaaam waritariya. Apanll apuchirineetsini Wangarineetsini ichumampantee zanganirangiya tputsee mang' p'tsimaama. Uwsha tuwasinimpanee tputsee kamanirangiya. Tputs uwamun mang' tatpana átu kamanirangiya. <sup>8</sup> ¿Nitaati apuch kaapanaaritaja an tuwasinimpanee? nda. Apuch tuwasinimpanee tsiyatarangiya. <sup>9</sup> Itaru, tuwasinimpan watach tputseem kinayaru, nish tsapush taarangu anu. An watacha kaapa tuwasinimpani anuya. Tputsee ichinguru tuwasineekiya 'sin tamapari ashkiya.

<sup>10</sup> Ashirucha, Apanlee yámandampan nish iyash taarangsha. Iyaa uruta tinarangu, ashiritaa ashpatam tputs mangoonamaam ngatarangana. <sup>11</sup> Apanllshutaa tiptsir Utaáshuchish nllurtarangu, itaru uw maachirita mangoonamaam ngatarangana. <sup>12</sup> Itaru, ashpatam tputs mangoonarangana. Mangooneersin, Apanllsha waama tiptsireem ínarangiya, watam yámandampanimun mang' taturanganawa. <sup>13</sup> Apanll waana zandeeru, tputsee waama tiptsiri

---

\* <sup>1:3</sup> Salmo 33.7 tsiyatsis nipta tatsamooru taaritamta.

ínarangiya. Chaantarisha nllurtarangich anamun Apanlleem tiptsiri kinamaam wanindaja. Chaana zandkuch, nda Apanlleem tiptsiri kinakchi. Itaru, Apanll waantari zandku, tiptsireem chiaya ínakiya.

<sup>14</sup> Ashirucha, Apanll waana zandeeru, tputsee tapachindachima átu yámandampaneetssha tsapush zanganarangiya. Yámandampansha tputseem kinayaru, iyapta tputspatini taarangiya. Iyash taaru, iysha kchiptini parangashiniya.\* Paranguni, mangoonaranguni, Inwatacha Apanll Wipa, tárangini. Istampañcha. Zurumapañcha. Apanll Wip minamaritcha, tárangini. <sup>15</sup> Apuchirini ichumampani wach parangitamta Apanlleetsi Wipa. Apuch kapung tsiyatarangu, An tputs watacha izuuru nuwaa, kasikiya, kamanku, tárangitamta. Nuwamun kushimunitati kuskachu, itaru nuwaa kapunguri kasiriya, watam uwma urutari taataruwa; tárangiya apuchirini. <sup>16</sup> Apanll waana zandarangu, iyaam kamungshini wayarangasha. Apanll Wipaa minumtaatstaa nda watsipunoo pachindarangu, Yashingoo iyaa itutsirangiya, Na Apanlleemarisha urutamari taachiniya. <sup>17</sup> Sirútama Apanll tputs wanasiri taapaná átu kamachtamarinee yandayaru Móysisarineema panarangiya. Itaru, natsha Apanll waanaatsi Wipaa kamachtayaru nish tsapurunasush zanganirangiya. Wipsha tsapurunasush taarangu Waparee iyaa itsinsaru yámandarangiya. Sheeru iyaa yashingoo itutsirangiya. Apanll Wip

---

\* **1:14** Isáysa 40.5 tsiyatsis nipta tatsamooru taaritamta.

watacha Isusu atashiniya.

**18** ¿Antaati tputs sirútamastaati Apanllee parangeeja? nda. Itaru, Apanll Wip waparee parangu, iyaa kamanirangiya, watam Apanlltamtawa. Apanll Wip na yusur Apanllshuri taariya. Ashirucha, Isusumari Apanllee yámandarangasha tina.

*Mishat, yuwaa apuchirini Wangarini ichumampanirini Isusoo kamanirangu anoo kamanchintspa (Matiwa 3.1-2; Márkosa 1.2-8; Lukasa 3.15-17)*

**19** Apuchirini itsinsaru Apanllee Wip kamanirangiya. Iy Utaáshuch kurakarini tputsee kamachtayaru, Wangaa mashashini; ¿tamamsha tputsish shiya? táshini; táyaru, zanganirangana. Apanllpanee zangan, apanllpanee wipunash, Leviyarinchichee tputs zangan aship zanganirangiya. Ashirucha, Irusarinush káyarusin, apuchirineetsi masharangusin, apuchirinsha itsinsaru yámarangiya. Mashkusin, ¿Mayaamsha shiy tayaspataksha? ¿Chaksha shiya? ¿Apanleezish Ipusamarinish shiya? táyarusin, **20** apuchirinsha itsinsasha yámeeru, Nduni, nitaati nuw Apanleezi Ipusamarini; tárangeiya. **21** Apuchirineetstam masharangana: ¿Ashiriya, chakanasha shiya? Elíyasarini yusursha kusachparee atini, ¿anish shiya? tárangusin, apuchirinsha: Dancha, tárangeiya. Apanllpansha: Ashiri ndush shiy Apanllee kuk kamanimapani yuw naanllpa atuni kutakaniya.\* ¿Ndush shiy anish? tárangusin, apuchirinsha: Nduni,

---

\* **1:21** Tayusima 18.15-18; Wanga 6.14; 7.40 tsiyatsis nipta tatsamooru taaritamta.

nuw anoozi, tárangeya. <sup>22</sup> Apanllpansha: Iy kurakarini iyaa mashimaam zanganirangu, ¿tamaree ngutini kanapchini? ¿Ashiri yámkuni ameecheezini? ¿Tamaamshasha tputshish shiya? Shaanaatsi kamaningandama; tárangeana. <sup>23</sup> Apuchirinsha Wangarini: Nuw Apanllee Ipusamarini yámandampantana. Apanllee kuk kamanimapani, Isáysarini watam, tárangeuwa; Apusap tputs tsiyatssee tsiyatku anoo mazinachinllinaya.

Na kurak kizpur naanllpa.

Ngootseem wanasis yarangtsa.

Ngootsee itsinsaru tuwitangtsa.

Apanlleem yarangtsa,\* táchiya, tárangeya Isáysarini. Ashiriya, nuw antana. Tputsee mang' p'tseekuri, Apanlli Ipusamarini naanllpa, wasina mangeetsis yarangtsa, tayapstakuri atina, tárangeya Apuchirini.

<sup>24</sup> Parísiypanshuchtam tputs, yuw apanllpanpat mashimaam kusarangana ansha: <sup>25</sup> Ashiriya, ¿mayaamsha tputsee shiy ichumayarush ipunsheemish ínaksha? Watam shiy nda Apanllsheewa Ipusamarinish; nda Elíyasshawa; nda Apanllee kuk kamanipanshawa, tárange, <sup>26-27</sup> Apuchirinsha, tputs mang' yaramaam zandku, nuwsha kungupat ichumakina, tárange. Itaru, nllitaritsha tputs kuzizimun kuschiya. Naturi nish iyash taaktaa, itaru siy waa nda natstaksa. Uw kizpurcha. Nuw anpa waritareezi. Uwsha nuwaa: Sapturee tpurinda, tákchu, nuwsha pinasakina, watam wamari kasiruwa;

---

\* **1:23** Nishuri yuwartatam Isáysa 40.3 átu atitamta.

tárangeya apuchirini. Táyaranllu kasarangiyá. <sup>28</sup> An watach apuchirini Isusoo kamanirangu anu. Piy yaktanung Betaniyanung tayaspataku, Ortagush kung tputsee ichumarangu anpuru, tárangeya tputseetsi.

<sup>29</sup> Putamsha apuchirini anshutam tayaspatarangu, Isussha naantach parangiyá. Apuchirinsha tputsee, tárangeya: Napangantsa; In tputs Apanllcha opeejarini. Chiyaā ztaru tputseetsich yutaritshishireetsich izuuru tachingchiya,\* tárangeya. <sup>30</sup> Watacha nuw siyaa sirú kamanirangi anu. Táranginawa; nuwamun kushi tputs kusachpa, tárange. Kuzizimuntaati kusku, itaru nuwaa kapunguri kasiriya, watam uwma urutari taataruwa, táranginawa. <sup>31</sup> Tárangitaati, nuw uwaa natstarangeezi. Itaru, yuwamun Apanll nuwaa kamachtarangu anumun natstarangina. Apanll, Utaáshucheetsi iparee yasapana átu nuwaa kungupat tputsee ichumamaam kamachtarangiyá, tárangeya apuchirini.

<sup>32-33</sup> Apuchirini, tárangitamcha; Ichitaru Isusoo nduntaa natstaranguri, Apanllimun Wani natstarangina. Nduma Apanlli Ipusamarini yasachuri, Apanll nuwaa kamachtaku, tárangeya; Yuwamun tputs Nuw Kani pantsatkachu an watacha nuw ipari. Pantsatkachu uwash uru taachiya. Sheeru, uwsha tputshish Nuwaa Kani tapshtuchiya; tárangeya Apanlli nuwaatsi. <sup>34</sup> Ashirucha, ichumaranguri, kachi anoo paranguri, na itsinsaru kamanchintspa: In

---

\* **1:29** Tashitungarangu 12.1-24 tsiyatsis nipta tatsamooru taaritamta.

watach Apanll Wipaya, tárangeya apuchirini.  
Táyaru natam tayaspatamaam kasarangiya.

Ashiri yuwaa apuchirini Isusoo kamanirangu  
anoo kamaneena.

*Mishat, kamanchintspa, yuwaa iy Isusoom  
wipunashini kinarangini anootsi*

<sup>35</sup> Putamsha, apuchirini anshutam taarangiya.  
Iyapta, waanpata wipunash, tputspatatam  
washunand anush shaniyarangani. <sup>36</sup> Isussha  
naanakchu anoo parangu, Apuchirinsha:  
Napangtsa: in tputs Apanllcha opeejarini,  
tárangeya. <sup>37</sup> Anoo mazinaranguni, nuwa, misha  
Ándarispata Isusush tachitarangani. <sup>38</sup> Isussha  
natpunuyaru, iyaatssha pakeeru, Zuwanlee,  
¿mayangazsha zandaksa? tárangeya. Iysha  
yaanshuchiri k'kini tsiyataranguni, mayistoroo  
atuni, Rahabpí, tárangeji Isusootsi. Shiyangaz,  
mayistoroo, zandkiniya. ¿Yap taaksha?  
tárangeji. <sup>39</sup> Isussha: Pza, napatish. Nuwash  
napangandama, táyaru, tachitarangshiniya.  
Kuseeramchuni, anush zaree purangini; kapung  
naparangani.

<sup>40</sup> Ándaris watacha Sim zoonlli. Sim watatamcha  
Pitoru. Ashirucha, Ándarissa <sup>41</sup> musásiritam  
zoonlee kamanimaam naatarangiya. Payaru,  
Zuwa Simoo, Mesýaatsi payana, tárangeya. Mesýa  
iyashuch k'kini Apanlee Ipusamarini atuni  
atiniya. <sup>42</sup> Táyaru, Isusupsha machtarangiyi.  
Isussha Simoo natstayaru, Nuw shiyaa yasaktana.  
Shiy Wangarinitishcha wipish; shiy Simtishcha  
surish, tárange. Itaru, nuw shiyaa Pitoroo  
táchinllpa, tárangeya Isusu.

**43-44** Putamsha Isus Galileyap tsap napani átu naataranginiya. Felipee parangu, Isussha: Zuwa, ipunsheemi kinangcha, tárangiyá. Felipi, mishat Ándarisa, mishat Pitoru ichingurusin yakat Betsáyanshuchtam tputsi.

**45** Felipsha wamkuree Natánayaa kamanimaam naatarangiyá. Pakeeru, Zuwa Natánayaa, tputsee pana yuwaan Apanll zanganchima, tárangu anootsi. Apanll wirkarish Móysisarineetsi tuyandarangu, waanaatstatam kuk kamanimapanee tputsi tuyandarangitamta. Watacha an tputs na pakeena, tárangu. Uw sura Isuscha; Násaretshuchi tputsi. Usirini wipa atiniya, tárangiyá Felipi.

**46** Natánaysha: ¿Nitaati Násaretshuch tputs wanasis taatar? táyaru, Felipsha: Tárinllpa, zuwa. Pzaya, shaana napatish, táyaru, machtarangiyá.

**47** Watsiritatachu, Isussha pakeeru, tputseetssha: Napantsa; an tputs kizpur Útaáshuchcha. Kaapa waash ngichiz wanindaja, tárangu,

**48** Natánaysha mazinayaru, yámarangiyá. ¿Yapsha shiy nuwaa parangsha? táyaru, Isussha: Ndatuma Felip shiyyaa machchunll, shiy k'payunllush watatpish kuxinxinawush nuw shiyyaa mangeetsish natstarangina, tárangiyá Isusu.

**49** Natánaysha, Mayistoroo, zuraktishcha; shiy Apanlltishcha Ipusamarini; iy Utaáshuchini shiyyaa kurakartanicha, táyaru, **50** Isussha: ¿Tamasha týari anumun punirustayarush mangoonaksha? Na xamachimasi, nimun izuuru mangoonamaam pangachsha, tárangiyá. **51** Mazinangcha; niri chinangcha. Kizpur wanasisi anoo pangachsha. Kanind tawatkachu, Apanll

wasundururi nuwamun karuwaruwtarachu yusur kárkartarachu pangachsha, watam nuw tputseem kinaranginawa, tárangiya Isusu.

Táyaru, yaktap Kanágap naataranganiya Galileypi tsapu.

Ashiri yuwaa Isusoom wipunashini kinarangini anoo kamaneena.

## 2

*Mishat, yuwaa Isus kungoo vinoom tinarangu anoo kamanchintspa*

<sup>1</sup> Kanágash kuseeramchuni, anush tsimbun maayaruni, zar tuchpashu tputs kizaa izuuru yamapi átu tputsee zapan yambirangiyi. <sup>2</sup> Ashiriya, an tputs Isusoo wanir kuruzurangu, Isusootstam yambirangiyi; iyaatstam, Isusootsini wipunasheetsini yambirangitamta. Tputsee zapan yambirangu, <sup>3</sup> vinoo kawatsirangiyi. Kawatskachu, Isussha wanir wipaa kamanku, Isusoo, vin kawatseenllpa; tárangiya. <sup>4</sup> Isussha: Ataa, ¿mayaamsha nuwaa átsha? Wand pishtakiya nuwaanaatsi yámandamaama. Nuw zari nda tatsamooriya, tárangiya. <sup>5</sup> Itaru, wanirsha kizaptatin tsiyatkusin, Ipari siyaa kamachtakchu, waa kuk payungtsa; ngatintspa; táyaru kasarangiyi. <sup>6-7</sup> Anush murits minam matayaru taarangiyi. Anoo uru iy Utaáshuchini kungupat maacheetsi yaramaam payutarini. Patumbchee kachuteeruni, muritsaam kapungu tintarini; zameetpaparee arat, tatsitamaam waritarangiyi minamtashu. Ashiri Isussha muchchuree: Kung tipayarus, muritsush minam

matayaru tatsiteerus ksangints; tárangiya.  
 Ayu táyarusin, tatsitaranganaya. <sup>8</sup> Ashirucha,  
 tputs kungoo ashpiri tatsiteersin, Isussha: Na,  
 tipayarus, ksutamapaneem yásingints; tárangiya.  
 Ayu táyarusin, tipayarusin, ksutamapaneem  
 yásiranganaya. <sup>9</sup> Ksutamapansha nda kungoo  
 kácharangiya. Itaru, vinoo kácharangiya. Nda  
 kungoo yasarangu, mapiy rangiya. Itaru,  
 m'chachushtisin yasarangana. Uwsha  
 ksutamapansha vinoo kis wayaru, kizpur  
 wanasisrimash kácharangiya. <sup>10</sup> Punirustayaru,  
 tputspa tsiyatarangiya yuw kizaa yamapi, tárangu  
 anpata. ¿Tamaru shiy ashiksha? yungpaktishcha  
 shiya, tárangu. Tputs uru wanasisrimsheetsima  
 yáskana. Sheersin, tputssha tazazaramchusin,  
 yuttamsha yáskana. Itaru, shiy nda ashiksha.  
 Shiysa zapish wanasisrimshee yásiksha,  
 punirustaku, tárangiya kizaa yamaku anootsi.

<sup>11</sup> An watach Isus kizpur ashimaam  
 chtarangiya. Ashirangu anumun tputssha Isusoo  
 wizpurini natstarangana. Anumuntamani iy Isus  
 wipunashini, Apanllparee Wipaya. ¿Tamarima  
 ashka? atuni, Isusoo pakich mangoonarangani.

<sup>12</sup> Ashiriya, shambatshish iwipayaru,  
 Isuspasha yaktap Kapárnáwap naatarangani.  
 Kuseeramchuni, anush pakich taarangani.  
 Isuspat, Isuspat wanir, zoonllpat, iyaptatam Isus  
 wipunashini, aship anush taarangani.

Ashiri yuwaa Isus kizpur ashirangu anoo kama-  
 neena.

*Mishat, yuwaa Isus Apanllish pang' tputsee*

*nambarangu anoo kamanchintspa*

(*Matiwa 21.12-13; Márkosa 11.15-17; Lukasa 19.45-46*)

<sup>13</sup> Isus kungoo vinoom tinarangu anumunsha Irusarinap naatarangiya. Iy wipunashini naparangtamaniya. Isus iyaa Utaáshucheetsini shambatshishini yuwaa Ijiptoo tsap shitungarangana anoo zar itupshingamaam naataranginiya.\*

<sup>14</sup> Ashiriya, Isus Apanllish pang' pshtuyaramchu, napku, anushsha maachi zapan mirkatush tamapari ashiru paxanxanxtangat ashiranganaya. Anush wakara taaru, misha opeej taaru, misha makookoo chinuz taaru, misha kurikpan tputs misanung kuxinataranll ashirangan. <sup>15</sup> Itaru, Isussa anoo pakeeru, kizpur tsiyantayaru, sukaa pzkoosheem tinayaru, anpa pzkoombbarangiya. Wakaraatstam, opeejaatstam, maachee ichinguru tashitungarangya. Maacheetsi pzkoota, misaatssha kata shitar ashirangiya. Kurikeetssha psinangata shitar ashirangiya. ¡Maya! ichinguru tashitungarangya. <sup>16</sup> Makookoo paxanxamapaneetssha: Maachee ichinguru yáyarus naangints; shtungangints. ¿Mayaamsha Aparshi pang' paxanxshisheem ínaska? týaru, tputsee tashitungarangya. <sup>17</sup> Anoo pakeeruni, Isus Waparee kuk uru payukcha, tárangini, watam Apanll wirkar anootstam sirú wasina

---

\* <sup>2:13</sup> Iy Utaáshuchini uru Irusarinap shambatamaam shaniytariniya, watam Apanll sirútari zitamarineetsini itutsiranguwa. Masach kaneesich yakchu, uru shaniytariniya; minush masach shaniy, minush masach shaniy ashtariniya.

kamaniranguwa. Apanll kuk ateeja waanaatsi wipa; Pangimandaritish wamin tsiyaniis nuwaa kasichiya,\* tárangeiya Apanlli. Ashirupa Isus anuritam tuminurangiya.

<sup>18</sup> Ashirucha, Utaáshuchsha urkari: Isusoo, ¿chak shiyaa kamachtaranganlla? tárangasha. Apanllee wizpuriri iyaam yámandanda. Ashkachush shiyaa watsta táchenezini, ndambari, tárangana kuraka. <sup>19</sup> Isussha kukoo kamapshiru nllitaritaa tsiyatarangu, Nee, Apanllee taárashi saana siy kapeetkachus, nuwaanasha tuchip zari yusur tuchiyyachina, tárange, <sup>20</sup> kuraksha: ¿Tamaree shiy ashchish? Masach 45 tarawaztayarusin, nee panguranganawa. ¿Shinashtaja nee tuchpanand zar panguchish? táranganya. Táyarusin, kasaranganaya. <sup>21</sup> Itaru, Isus Apanllee pang' nda, tárangeiya; waanaatsi wanuts, tárangeiya, watam Apanllee taárash, tárange. <sup>22</sup> Iysha natumasana mamarparangitamaniya. Itaru, zapishsha Isusoo pacharamchusin, zar tuchpush yusur támearu, mangeetsini p'tseeranguni, Isusoo kuk izuurisha mangoonarangshiniya. Apanleetstam kuk yandama mangoonarangtamaniya.

<sup>23</sup> Ashirucha, anush shambatshish tputs zapan shaniyarsin, Isussha wizpuririnee yámandarangu, tputsshá anoo parangusin, mangoonamana mangoonaranganaya. <sup>24</sup> Itaru, Isussha tputsimun mang' nda taturangiya; waanaatsi nda kanasarangiya. Isus tputsee

---

\* <sup>2:17</sup> Nishuri yuwartatam Salmo 69.9 átu atitamta.

mang' ichinguru yasarangiya. <sup>25</sup> Nduntaa tputs kamanku, itaru Isus tputsee mang' natstarangiya. Kizpur yasarangiya.

Ashiri yuwaa Isus Apanllish pang' tputsee nam-barang anoo kamaneena.

### 3

*Mishat, yuwaa Isus Níkodemoo tayaspatarangu anoo kamanchintspa*

<sup>1</sup> Sirú Níkodemu tputs sura Utaáshuch urkarimuna; tsipas kurakamuncha.

<sup>2</sup> Parísiyapanshuchimuna tputsi. Ashirucha, Isusungaz naateeru, psaan kusarangiya.

Kuseeru, Mayistoroo, shiy apanllpantishcha; Apanll shiyaa tayaspataamaam zanganirangparee atiniya iya, tárange. Anoo ichinguruni yasaktanicha, watam shiy Apanll tamapari kizpur ashishawa. Apanll shiyaa ndunnaa istaku, antaati shiy kizpureezish, ndambaree. <sup>3</sup> Isussha: Nuwa kuki mazinangcha; zureerutana táshina; Ndunnaa tputs taarashee kaneesich nllurtaku, Apanlleee watsapun ayamtaati pangcheeja, ndambaree, táyaru, <sup>4</sup> Níkodemsha: ¿Tamareeja wachinich yusur nllurtachich? Antaati aneershich chik yusur pshtucheezich, ndambaree. Ashimaam pinasakiya, tárange. <sup>5</sup> Isussha: Kaapa itsinsarush chinangcha. Mazinancha; Apanlleem tiptsiri kinapi átuch, Apanllimun Wizpuririni kinachich; Apanllimun nllurtachich. Tputsshuma nllurtayaruch, anamunsha Apanllimun nllurtakchi. Ndunnaa ashkuch, Apanllish watsapun pshtucheezich, nduni, tárange.

**6** Tputush nllurtakchuch, tputseem kinakchi; itaru Apanllimun Wizpuririni nllurtakchuch, Apanlleem tiptsiri kinakchi. **7** ¿Mayaamsha punirustaksha? Punirustarinllpa; tárangeya Isusu. **8** Napanlla: kambusur kambustakachu, kamirana mazinakani. Itaru, ¿yapeeja káyaranil? misha, ¿yapeeja naak? atiniya, watam nda yasakaniwa. Ashiritamcha Apanll Wizpuririni. Tputsee waama tiptsiri ínakchu, chiysha ¿tamakee ashik? átuch, nda yasakchi, tárangeya Isusu. **9-10** Níkodemsha: ¿Tamakeeja ashik? táyaru, Isussha: ¿Tamasha Utaáshuchee tputs shiy tayaspataktaatish anoo nda mangoonaksha? tárange Isusu. **11** Kaapa mazinangandama; yuwaatsimari mazinarangi anuri siyaa kamankina. Yuwaatsimari parangi anootsimari kamankina. ¿Ashiritaa siysa nda mangoonaksawa? **12** ¿Kamirana anoo nda mangoonkush, nitaati Apanlleetsinashtaja chíash kamankinaareena mangoonchis? nda. Pinasachpasha. **13** Apanllish káyaruri, tputseem kinaranguri, nish tsapurunasush kusarangina. Nllitarit tputs Apanllip kárirangeja, dancha. **14** Móysisarinsha mkaam ngusambaa tinayaru, yasinamunsha tapamtayaru, pashuchirangya tputsee yaramaama. Ambtampaz ashimaam Apanll nuwaa kamachtarangya. Yasinamun tputs nuwaa pachachinllinaya. Watam tputseem kinaranginawa. **15** Tsipayaruri, tputs nuwamun mang' tatkachu, taárashee urutamash panachima; tárangeya Isusu, Níkodempat tsiyatku.

**16-17** Na nuwsha anoo yandakuri atina. Apanll Waanamand Wip tputsee chinarangya.

Nda kapeetamaam zandarangiya; tputsee tapachindamaam zandarangiya. Ashiruch waanaatsi wip kamungshisheem zanganirangiya. Wip minamtaatstaa nda watsipunoom pachindarangiya. Iy Wipamun mangini tatkuni, ndusha waneeship naachiniya; urutamari Apanlee taárash payuchiniya. Taarasheetsini kanatsipcheezini, ndambaree.

<sup>18</sup> Mangoonkinaareeni ashiru waneeship ndusha naachiniya; kamungachshapchi. Itaru, tputs ndunnaa mangoonku, uru anoo wanichiya; watam Apanllimun Wip mang' nda tatkuwa. Watam Apanll Wip minamaritawa.

<sup>19</sup> Itaru, Apanllsha izuuru natstayaru waneekiya. Isusoo zanganarangu, Isussha 'sini tamapari ashiru ichinguru chiyaa natstakiya. Itaru, Isusoo ngataranganaya. Kamapshimaam zandarangsin, tunimaa kis chinaranganaya.

<sup>20</sup> Yutaritshirinee ksумish chinaksin, Apanll yasatpa atusin, 'sinee natsakanaya Isusootsi; kapung ngatkana.

<sup>21</sup> Itarusha, tputs itsinsaru taamaam zandkusin, kamapshimaam nduncha atusin, 'sinish kis taakanaya; Apanll taarasheetsi ichinguru waani yasachpa átu, Isusoo mangoonkiya; watam Apanlee kuk kis payukuwa.

Yuwaa Isus Níkodemoo tayaspatarangu anoo wapparee kamaneena.

*Mishat, yuwaa Isus wamari apuchirineetsi Wangarini ichumampanee kasiru anoo kamanchintspa*

<sup>22</sup> Ashirucha, Isus Níkodempat tsiyateeranllu, nllitaritap naatarangiya tayaspataamaama.

Iyaatssha wipunasheetsini: Utaásh tsap tayaspataani, átu, naataranganiya. Kuseeruni, anush kapung taaranguni, anshutam iysha kapung tayaspataranguni, tputsee ichumarangtanicha, watam mangoonaranganawa. <sup>23</sup> Itaru, apuchirini tashtap yaktanung Áynunnung sura tayaspatarangiya. Anush minsha yakat watsiritam taarangiya Saríma sura. Anush kunganung imurinung tayaspatarangiya. Ashirucha, tputs amb naateersin, apuchirinsha tputsee ichumarangitamta. <sup>24</sup> Nduma apuchirineetsi tumanchusin, anush ashirangiya.

<sup>25</sup> Ashirucha, iy Utaáshuch kurakarini mang kuseersin, apuchirinpat wipunash tsiyatarangana. Tanaseestangatssin, yuwamand iy Utaáshuchini nda mangeetsich tayutaritamaam zapan kupartakani anumand nambaptangat ashirangana. <sup>26</sup> Wand nambaptar ashkusin, apuchirinipsha mashkatu mang naatarangana. Apuchirineetssha: Mayistoroo, ¿mayaama Isus tputsee ichumak? wipunash, tárange. Sirú shiy Ortagush arachich tayaspatarangush, Isusoo parangush, Isusoo kamanirangsha, Apanll Isusoo zanganirangiya, tárange shiya. Natsha tputs ichingurusin shiyya kasaksin, Isusush tachitkanaya, tárange apuchirineetsini. <sup>27</sup> Apuchirinsha: Waana Apanll chiyya kamachtaku anuritam kinachchi. <sup>28</sup> ¿Nitaati nuw Apanlleezi Ipusamarini? dancha. Nuw Apanllee Ipusamarini yámmandampantana. ¿Wash kitsis nda mazinarangis? Nuwma tputsee mang' p'tseekuri, uwsha kushimuni Apanll

Ipusamarini kuschiya, táranginawa. <sup>29</sup> Mazinantsa; chiy kizaam tsiyatamaam istakatuch, ¿antaati chaamataja yamachich? nda. Chaana tsiyateeruch, kasimbeeruch, tputssha waana wizanleem yamakiya. Sheeruch, mangich kis ashchiya, watam istarangchiwa. Ashiritamana nuwaya Isusooma; istampapaz ashiru taakina. Ashirucha, nuw mangi kizpur kischa. <sup>30</sup> Isussha na kizpur taachiya; nuwaa kapung kasikiya. Itaru, nuwsha ningatsha taachina. Ashkuri wanasischa, tárangeya apuchirini wipunasheetsi.

<sup>31</sup> Na nuwsha anoo yandakuri atina; Isuscha wamari kasiriya; nda tputspatich waritariya, watam Apanll waana zanganiranguwa. Itaru, chiy tputsh nllurtayaruch, tsapush taakchi; chinashich tsapushtam taariya. Itaru, Isus Apanllish káyashinu, nish kuseeru, <sup>32</sup> Apanlee chínash iyaam kamanirangiya. Waana izuuru yasayaru, kamanirangiya. Kamanirangtaa, ashiritaa nda ashpartini mangoonarangani; <sup>33-34</sup> tputsini machin mangoonaranganiya. Mangooneeruni, Apanleetssha: Zuraktishcha; táranginiya. Apanll waanaatsi Wip zanganirangu, chínashee nda pakchiyam pachindarangiya; Waanaatsi Wani kizpur tapshturangiya. <sup>35</sup> Ashirucha, Aparich Wipaa kizpur chinarangu, Shiysha, Isusoo, ichinguru tputsireetsi chinangcha; shiyamari ksingcha; táyaru, na Isussha wamari kasikiya. <sup>36</sup> Anumun tputs Apanlimun Wip mang' tatkaru, taarashee urutamash yachiya Apanlleema. Itaru, Apanlee Wip ngatku, Apanllsha yashungupsha kapeetchiya; waneeshish urutamari taachiya,

nuw siyaa atashina.

Ashiri yuwaa Isus wamari apuchirineetsi  
kasiru anoo kamaneena.

## 4

### *Mishat, yuwaa Isus Samariyshuchee kiz tayas-patarangu anoo kamanchintspa*

<sup>1</sup> Isus Ortagush kung tputsee zapan wipunasheem ínayaru, Parísiypanshuchsha tputs anoo k'kuz mazinarangana. Mang tputs Parísiypanshuchhee: Wang tputsee zapantaa wipunasheem ínaku, ichumakta, itaru Isussha aranginasha ashkiya, tárangana. <sup>2</sup> Itaru, Isus kaapa tputsee ichumarangeeja; iynacha wipunashini tputsee ichumaranginiya. Ashirucha, Isus Parísiypanshuchee yasayaru, nuwaa tamundarundama átu naatarangiy. <sup>3</sup> Utaá tsap kasayaru, Galileyapsha waptam kanapurangiya. Iyaptatam urupung naataranginiya. <sup>4</sup> Samariyshuchee watsapun iturpimaam pinasaranguni, itsinsarsha Samariyshuchirish watsapun upusash naatarangini. <sup>5-6</sup> Zar kizpurtaa zateeru, zar minam wazuran naatarangani. Zar puputanu kanusamaam zanayarangani. Akoparinnungini k'tsimarini kanusamaam zanayarangani. Zitamarini Akoparini anoo kungoom mang k'tseerangiyira sirútamasa.\* Ashirucha, Akoparinshini k'tsimarini kuseeramchuni, Isus kizpur nizichu, anushsha kuxineeramach ashirangiy. Itaru, iysha katungtseem paxanxani

---

\* **4:5-6** Apanll chtarangu 33.19; Josueya 24.33 tsiyatsis nipta tatsamooru taaritamta.

atuni, Isusoo kamingeeruni, yaktap Sikárap watsiritari naatarangani.

<sup>7-8</sup> Katungsheemani paxanxkattuni, kushimunini Samariyshuch kiz kung tipakatu k'tsimush kusarangiya. Tipachu, Isussha: Zaa, kungurish pananda, wapi tina, týaru, <sup>9</sup> kizsha: ¿Shiy tamaysha Utaáshuchtaatish nuwaa Samariyshuchee mashaksha kungoo yasimaama? tárangeya. Anoo, tárangeya, watam Utaáshuch uru Samariyshuchee natsakanawa; niyrkana. Yapatarazinllinaja. <sup>10</sup> Itaru, Isussha: Apanll shiyaa kizpur wanasisri istamaam zandkiya. Anoo yasaranginaareesha, nuwaa kaapa natstaranginaareesha, shiy nuwaatssha kungoo mashirangpasha. Shiy nuwaa mashkinaareesha, nuwsha shiyaa pachindcheezi; kungoo taarashimashi panachinllpa, tárangeya. <sup>11</sup> Kizsha: In wach wantsushcha. Suwirish tipamaam nda payutatsha. ¿Ashiri mayshooja tipayarush, nuwaam panayachish kungootsi taarashimasheetsi? kiz, tárangeya. <sup>12</sup> ¿Nitaati shiy zitaminarineetsi Akoparineetsini kasireezish shiya? Uw kizpurimuncha. Watacha tputs nee iyaam k'tseeyaru, kasarangiya. Waana nish waarangiya; wip waarangitamta. Chinu waarangitamta; wakararini, misha opeejarini waarangana. Akoparinshtini nee iyaam kasarangiya kungootsi wanasisimsheetsi, tárangeya kiza. <sup>13</sup> Isussha: Mazinangcha; Akoparini yuttamaa kasarangiya, tárangu. Nee kung waakuch, musásiritam sachitakchi; waamaam yusur zandakchi. <sup>14</sup> Itaru, nuwaatssha mashkush, nuwsha kungoo

taarashimash shiyaam panakchuri, ayamtaati yusur tamaracheezish, ndambaree. Itaru, wambari urutamari shiyash kung taarashimashi kuchuchutaru taachiya. Kung taarashimash shiyash taakchinaari, urutamari taachsha,\* Isus tárangeya kizaatsi. <sup>15</sup> Kizsha: Ashiri, ichee, kungurish yuw nda sachitarich anumashee pananda. Ashkachinaarish, ndusha ningeem arap kungoo tipamaam kiyung kachiychima, tárangeya.

<sup>16</sup> Itaru, Isussha: Shiy, zaa, yuwaa áti anoo nda itsinsaru mangoonaksha, tárange. Xamachi musápa, zaranlleetsimasish kuruzushini; yamashini; týaru, <sup>17</sup> Kizsha: Zaranlli nduncha, tárangeya. Isussha: Zuraktishcha, shiy itsinsarush nuwaa kamanirangsha, watam nda zaranllpatish taakshawa. <sup>18</sup> Zameetpata ngutish zaranllirangshawa. Natsha kamuzpata ngutish taaksha. Itsinsaru nuwaa kamanirangsha, tárange, <sup>19</sup> kizsha: Shiy apanllpanpasha shiyaya, watam nuwaa yasakshawa; tárange. <sup>20</sup> Ashiri shiysha nuwaa itsinsaru kamaningandama, ichee. ¿Tamammunaja mach káreeruch itsinsaru Apanllpat tsiyatchich? Iy Samariyshuchini zitaminarini sirútama nimun mach káreetssin, Apanllpat tsiyataranaya. Ashirucha, iy anuritam chinakani. Itaru, siy Utaáshuchis Irusarinaatsim machirini chinaksa. ¿Ashiri yapeeja waritach? atina, tárangeya kiza. <sup>21</sup> Isussha: Kaapa mazinangandama, zaa, tárange, Nishooja waritach; Irusarinshutamtaja

---

\* **4:14** Jeremiyasa 2.13 tsiyatsis nipta tatsamooru taaritamta.

waritach, ndambaree. Sirútama machimun káreerus, chinamaam waritarangiya. Itaru, musáparee ashtachiya anumunarisha chinamaam mangoozi. Mangipashtich Apareetsich zurumarpatich chinamaam waritachiya. <sup>22</sup> Siy Samariyshuchis mangiptis Apanllee nda chinaksa; nda itsinsaru mangoonaksa. Itaru, iy Utaáshuchini Apanllee itsinsaru mangoonkiniya. Aparichsha Utaáshuchish waanaatsi wip zanganeeru, tputsee ichinguru tapachindachiya; kamungshisheem wayachiya. <sup>23</sup> Kaapa na in zar waritayanltanda. Nimuna tputs Apareetsich kuk izúuru payumaam zandku, maachee ndusha chinayaru mangoonachchi. Itaru, Apanllimunari wizpuri mangoonchinlinaya. Anumashingaziri zandkiya Aparich. <sup>24</sup> Apanll manutsischa. Ashiriya, mangiptich chinamaam waritariya; Apanllimun wizpurini waritariya tina, tárangeiya Isusu. <sup>25</sup> Kizsha: Ashimana ashikparee. Itaru, Apanll Ipusamarini kuskachu, uwsha ichinguru iyaa kamanchiya. Izurumamari tayaspatachiya, táyaru, <sup>26</sup> Isussha: Watatana nuwaya, tárangeiya.

<sup>27</sup> Ántaru iysha wipunashini paxanxeeshinuni kusaramchiniya. Isusoo pakamchuni, punirus-tarangini, watam kizapa tsiyatstar ashiranguwa. Ashiritaa, iysha kizaa: ¿Mayangaz zandaksha? tárangeezini. Isusootssha: ¿Mayaamsha kizapa tsiyataksha? tárangitamtazini, nda. Mapiyrangtanicha.

<sup>28</sup> Itaru, kizsha wasuwiree kasayaru, yaktap tit ashirangiya. Kuseeru, tputseetssha ichinguru kamanirangiya. <sup>29</sup> Pza napani. Tputsee yámandachintspa, tárange. Nuwaa itsinsaru

yasayaru, taarasheetsi ichinguru kamanirangiya. ¿Tamamaja an tputsi? ¿Apanllparee Ipusamarini ndusha an? tárange. <sup>30</sup> Táyaru, tputssha ichingurusin napkatusin, Isusup naatarangana.

<sup>31</sup> Ashirucha, kiz naantachu, iysha Isusoo: Neewa, mayistoroo. ¿Mayaamsha nda katungaksha? Mariz kayateeshpa. Pakchiyam ktungachishpa, táranguni, <sup>32</sup> itaru Isussha: Wapamasa, nllitaritamash nuwaam taariya, tárange. Itaru, siy anoo nda yasasa, tárange. <sup>33</sup> Iysha yaanpatatini tsiyatkuni, ¿Ashiriya, nllitarishta tputs martanll? tárangtanicha. <sup>34</sup> Itaru, Isussha; Nduni, tárange. Apanllingaz kukoo anoomari tuminumaam chinakina. Mishat, Apap nuwaa kamachtarangu anoomari iwapamaam zandkina. Anoo nuwaam katungats tamaparee ashiru taariya. Itaru, nuwsha siyaa atina; Apapaa kuk kamaningtsa tputseetsi. <sup>35</sup> Itaru, Siysa uru, Xamachi tiriku wand kamachpa. Tatsumeeruch anumun ipunpunar tsup kutatarchi pusamaama; átssa. Itaru, nuw siyaa atashina; Nuw naturi tputsee mang' p'tseeranguri, na kayanayanllpaz ashirangya. Naturitanda Apanlleem pusakpaz ashimaam waritariya. Piy napangtsa, pa. Tputsinandari Apanllingaz zandkusin, naanchina. Tayaspantanantsa tina. <sup>36</sup> Tputs paturunaam pusaku, uru tuwapamaam taariya. Ashiri taringsints tina; xararintspa. Nitaati nuw siyaa nguti kamachtakeezi, nda. Siyaa tayaspangtsa átana. Tputs ichingurusin Apanlleem urutamari taapanan aturi, siyaa kamachtaktana. Ashkachus wanasiccha. Ashiri shingtsa. Nuwma tatsumurangpaz

ashiranguri, siysa musásiritam pusakpaz ashkus, washunandari shambatchinipa. <sup>37</sup> Ashkachuni, kukoo tatsamchiniya. Min paturunaam tputs tatsumkana; itaru, misha tputs pusakana, atuni atiniya. Ashiritam, nuwma chtaranguri, siysa iwapachpasa. <sup>38</sup> Na nuw siyaa kamachtakina. Anoo tputs tayaspataangtsa Apanlleem tiptsiri kinamaama. Nllitarit tputs tayaspataamaam chtarangitaatssin, itaru siysa natsha iwapatssa. Ashkus, siysa tputspat chtarangu anpata washunand istatssa, Isus tárangeiya.

<sup>39-40</sup> Waniwantaru anush Samariyshuch tputs zapan kusarangana. Kiz kamanirangu anumun zapan Isusoo mangoonarangana. Ashirucha, Isusush kuseersin, Mayistoroo, shiy iyash napatish, táyarusin, Isussha ayu táyaru, anush tsimbun maarangiya. <sup>41</sup> Anush taaruni, Isus zapan tayaspatarangiya. Anoo mazinayarulin, mangoonaranganaya. <sup>42</sup> Mangooneersin, kizaatssha: Shiyamun kukish mangoonamana mangoonarangtanicha. Itaru, na waanaatsisha kuk mazinayaruni izuuru mangoonkiniya, tárangeiya. Na yasaktanicha. Isus chiyaa ztaru tputsi yutaritshishireetsich izuuru kapeetchiya. Kapeeteeru, taáraph urutamash chiyaam panachiya. Apanllushsha kamungchiniya, tárangeiya kizaatsi. <sup>43</sup> Mangoonatssin, tsimbun maats maayaruni, yusur Galleyap naatarangani.

Ashiri yuwaa Isus Samariyshuchee kiz tayaspatarangu anoo kamaneena.

*Mishat, yuwaa Isus kurakaa wip yararangu*

*anoo kamanchintspa**(Matiwa 8.5-13; Lukasa 7.1-10)*

**44** Samariyash tuchip maayaruni, Isus Galileyap tsap waptam kanapuranganiya. Isus waana wasina, tárangu, Waanshutari watsapunu Apanllee kuk kamanimapani kizpur nda taakiya, watam tputs nda kis mazinakanawa, tárangiya.

**45** Kuseeramchuni, tputssha natumasamaam Isusoo wanasisr pamana parangiya, watam Irusarinap napeeshinusin, Isusoo wizpur paranganawa. Galileyshuch tputs zapan shambatshisheem sirú naatarangana Irusarinpi. Anush Isusoo wanipaja parangana; Isus tputsee yarta yarta ashirangiya. Ashirucha, natuma Isusoo chinarangana.

**46-47** Sheeranllu, yaktash Kanágash washtam kusarangiya, yuwashtam kungoo vinoom tinarangu anshutamta. Kuseeru, anush taarangiya.

Itaru, tsiyatsis yaktap Kapárnáwap kimarangiya. Mang, Isus Utaá tsap kasayaru, iyashsha tsapunni Galileyash na yusur taakiya, tárangana. Ashirucha, pakich kurakamun an mazinayaru, mang' ksarangiya. Wipsha anush Kapárnáwash tamurangiya; tsipamaam zandkachu, uwsha wipaa kasayaru, Isusungaz Kanágapsha iripurangiya. Isusoo pakeeru, mashirangiya, Isusoo istanda. Pzaya, ipari ituyamatish. Ipari tsipakatcha, týayaru, **48** Isussha: ¿Mayaamsha siy Galileyshuchis tayaspataki anoo nda mangoonaksa? Ndunparee Apanllee wizpuririni yámandakuri, siy nuwaa nda mangoonaksa. K'keetsi nda kis mazinaksawa,

tárangiya. <sup>49</sup> Kuraksha: Ashiritaata, Isusoo, ndaturi ipari tsiparu, napatish, tárangu, <sup>50</sup> Isussha: Waritayanlliya; mapiyarush kanapungcha. Iparish támeenllcha, tárangiya. Táyaru, kuraksha mangoonarangiya. Ayu táyaru, mapiyru waptam naatarangiya.

<sup>51</sup> Naantachu, waanaatsi muchchur ipus chamayangarangiya. Muchchursha: Mapiyncha, ichee, iparish támeenlltanda, tárangana. <sup>52</sup> Kuraksha: ¿Asheets zar kaapaneeranga? táyaru, muchchursha: Sing zar tapitaranllu, urpur ipurirangiya, tárangana. <sup>53</sup> Kuraksha: Zuraktishcha. Sing zar tapitaranllu anshutam Isus nuwaa, Iparish támeenllcha, tárangiya. Ashiri naturitam yararangiya, tárangiya kuraka. Táyaru, anootsirisha muchchuree waptam yanpurangiya. Kuraksha izuuru Isusoo mangoonarangiya; wipsha ichinguritamsin mangoonaranganaya.

<sup>54</sup> Ashirucha, iy watach Isus yaktash Kanágash tsimbunurini kizpur ashirangiya. Utaá wat-sapunu kasayaru, Galileyash yusur taarataraw ashku, Isus kizpur ashirangiya.

Ashiri kamaneena yuwaa Isus kurakaa wip yararangu anootsi.

## 5

*Minootssha kamanchintspa; yuwaa Isus,  
Utaáshuch kurak nuwaa waani tsiyantachinllinpa  
átu, tputsee yararangu anootsi*

<sup>1</sup> Isus Galileyash taarangu, anamunsha yusur Irusarinap shambatshisheem napatama táyaru, naateeru, anush kusarangiya. <sup>2</sup> Anush

opeejanung washitungashi, kung chumashish taarangu, Isus anush naparangiya. Chumashish Utaáshuchiri kuk Betsatcha sura. Wantsshuri kung kapootpoottar ashtariya. Annungiri zameetpata kariyshish taarangiya. <sup>3-4</sup> Wanguy anush zapan tamutamur ashtarana. Wach mchusawtam, chpanawtam, wanuts muxareewtam, wanguy anush zapan tamuranganaya. Kung nuwaa yarpanda atusin, anush kutaranganaya.\*

<sup>5-6</sup> Ashiruch, Isus anush kuseeru, tputsee kas yutaku an chamayangarangiya. An tputs 38 masach kas yutarangiya. Mangu tamoo ashirangiya. Itaru, Isus pakeeru, waanitari yasarangiya yuwaan sirútari kas yutarangu anootsi. Isussha wanguyaatssha: ¿Yarpi átish shiya? átu, <sup>7</sup> wanguysha: Aa, zandaktana, tárange. Itaru, ¿tamaycheezi? ¿Chakaja nuwaa istachinda? ¿Chakaja mikeeru nuwaa kungush wayachinda? Kung kapootkachu nuwsha apinll pshiyratat ashkuri, tputsima nllitarit ichtaru chipuykatssin, uru nuwsha xapookina; pinasakina, tárange. <sup>8</sup> Isussha: Chiyzangi shiya. Nllamareetsish yáyarush, naangi, tárange. <sup>9</sup> Támpinand wanguysha chiyzarangiya. Wayanllamaree yáyaru, naanata ashirangiya. An zari sápatush, kanusisshu, Isus ashirangiya.

<sup>10</sup> Ashirucha, wanguy wayanllamaree chipapata sheeranllu, iysha kurakarini anoo

---

\* **5:3-4** Versícul 4 kaap wanindaja. Ashpatam kirak anoo taar, itaru Wangarini anoo nda kaap yandarangiya. Yandamarini ateeja: “Kung kapootpoottar anush minamari tputs ichtaru chipuykachu, yarta ashtariya. Mang, Apanll wasundurur zapish kusta, yusur zapish mang kusta ashku, wantsush pshtuyaru, mang kungoo iturpipitara ashirangiya.”

pakeersin, tsiyantarangana. Wanguyaatssha nambku, ¿Mayaamsha nllamareetsish chipaksha? ¿Watam nat in zari kanusischa? tárangeiya kuraka.  
 11 Wanguysha: Zuraktishcha, ichee. Itaru, tputs nuwaa yareeru, Nllamareetsish yáyarush, naangi, tárangeuwa; tárangeiya. 12 Kuraksha: ¿Chak shiyyaa kamachtaranga? ¿Chaka sura? táyarusin,  
 13 wanguyasha: ¿Chakamasaja? yasareezi nuwa, tárangeiya, watam Isus mikeeru tsíparanguwa. Tputs anush zapan shaneerana ashiriya, Isussha kamuzaa yareeru, mikeeru naata sheeru, tsípata ashirangya. Ashirucha, wanguy Isusoo nda yasarangya.

14 Anamunsha Isus wanguyaa nachungarangya. Apanllush pang' pakeeru, wanguyaatssha: Mazinangcha; na shiyyaa yareenlluri, yusur Apanllee kuk kpitinllpa; wanasiри taangcha. Papcha, Apanll waneeyanllpa; yusur misisanashapa kas yutatsha, tárangeiya Isusu. 15 Sheeru, Isusoo natstayaru, kurakapsha kamankatu naatarangya. Kurakush kuseeru, Isustanda nuwaa yararanganda, tárangeiya.  
 16 Anumun iy kurakarini Isusoo natsarangana, yuwash zari kanussish tputsee yararangu anumanda. 17 Ashirucha, Isusoo parangusin, ¿Mayaamsha shiy ashiksha? tárangeusin, Isussha: Nuw Apari tamapari ashiruri tputsee istamaam kanuskeezi. Nuw anpaniri taakina; kanusisshutaata zari yarkina, tárangeiya Isusu.  
 18 Táyaru, kuraksha ksumish tsiyantarangana; Izuuру pachayani, watam kanusisshu nda kanuskuwa; mishat Apanleerutana ashki átu

waanaatsi Apanlleem ínakuwa; waanpatatin mang, tárangana.

<sup>19</sup> Isussha waatssin itsinsaru yámarangya; Nuwaa kuki mazinangtsa; niri chinangtsa. Nitaati nuwaanimuntaja wizpuriri taaki, nda; Apapamun taakina. Nuw izuuru Apapaa mangoonaktana. Mangoonkuri, Apap tamapari ashiktana. Apapaa pakuri, anuritam tuminkina; nllitari chinamaam pinasaktana. <sup>20</sup> Apap nuwaa chinaku, waanaatsi chínash nuwaa kamankiya. Anuri tuminkina nuwa. Ashirucha, tuminkuri, siysa Apapaa wizpuririni parangis; tputsee yararangtana. Parangus, punirustarangsa. Itaru, xamachee, wand pishtakiya; aranginashapa pangatssa. Kizpur punirustatssa. <sup>21</sup> Apap taarashipancha. Tsipareetstaa ituyamakiya. Ashiritamana nuwa. Nuwaana zandkuri, tputsee ituyamachima; nuw taarashipantamana. Tatsamkiniya. <sup>22</sup> Mishat, Apap tputsee mang' natstampancha. Apap natstampan taakiya. Itaru, uw waana tputsee natstakitaa nda waneekiya. Nuwaa, Shiysha, ipari, shaana tputsee mang' natstayarush waneengcha; nuwaa, tárangya. <sup>23</sup> Tputs ipareetsi chinapaná átu nuwaa kamachtarangya. Apapaa chinakana ashiritam nuwaa chinamaam waritakiya. Ashiriya, tputs nuwaa nda kuki payuku, Apapaatstam kuk nda payukiya, watam Apap nuwaa zanganiranguwa. Tputs nda nuwaa chinaku, Apapaatstam nda chinakiya. Tatsamooriniya iya.

<sup>24</sup> Kaapa mazinangandama; tputs nuwaa kuki mangoonkinaariya ashiru, Apapaatstam mangoonchitamtaya, watam

nuwaa zanganiranguwa. Mangoonkachu, nuwamun Apanlleem urutamari taachiya, yutaritshishimand wanicheezi, ndambaree. Anumun waneeship ndusha naachiya; taarashish urutamash yachiya izuurumamaritaya.

<sup>25-26</sup> Mazinangandama; itsinsaru kamankina. Apanll taarashipancha. Ashiritamti, nuw taarashipantamana. Ashirucha, naturit ini tputs tsipar tamapari ashiru waneeshish taaktaa, itaru nuwaa kuki mangoonku, Apanllishshapa urutamari taachiya. Yutaritaa taarangu, itaru nuwaa mangoonku, Apanlleemsha taachiya.

<sup>27</sup> Tputseem kinarangitaati, ashiritaati, na nuwaana yasachima tputseetsi mangu. Wanimaaam waritakinaari, wanichima; istamaam waritakinaariya, taarashish urutamash panachina. Apanll waana tputsee ichinguru yasachiya.

<sup>28-29</sup> Yuwash zari waritakchu anush nuwsha tputsee tsiparee kuruzkachuri, nuwaatssha kuki mazinaku, támchinllinaya. Anoo wasina kamaniranguri, punirustarintspa. Tputs wanasir taaranginaari, matspasheemsha ínakchuri, uwsha urutamari taachiya. Itaru, tputs yutarit taaranginaari, ituyamakchitaati, waneeshish wayachima urutamari kiyung kachiyamaama.

<sup>30</sup> Nuwaanamuntari wizpuriri taakeezi. Apapamun wizpuri taakina. Tputsee mang' natstayaruri, itsinsasha natstakina. Apap nuwaa kamachtaku, anuritam itsinsaru payukina; itsinsaru tputsee natstakina. Apapaatsimari kuk payupi turi, anuritam chinaktana.

<sup>31</sup> Nuwaantaja siyaa kamanki, nda. Nllitarit

nuwaa kamankitamta. Nuwaanitaritanaari minamti kamankuri, ashiri siysa nuwaa: Ngichikpasha, tamaam waritachparee. <sup>32</sup> Itaru, nllitari nuwaa kamankiya; Apapcha nuwaa wasina kamanirangu; uw kuk itsinsampa; nuwaa itsinsaru kamankiya. <sup>33</sup> Mishat, Wangarini nuwaa kamanirangtamta. Siy uwaa masharangus, uwsha siyaa itsinsaru kamanirangiya; Nuwamun kushi Apanll Ipusamarini kuschiya, taranginya nuwaatsi. <sup>34</sup> Wangarin, tarangitaa, nuw Wangarinimuni kuk nda kizpur taaki, watam uw tputsimunawa. Itaru, Apapamuncha kuk kizpur taaki. Mangeetsis p'tsimaam Wangarineetsi kuk kamankina. Siyaa mangoonpana turi, mangeetsis p'tseekina. Kamungpana aturi, siyaa atashina. <sup>35</sup> Wangarini siyaa tayaspatarangu, kis mazinarangsa. Nambarin tamaparee ashiru mangeetsis 'sineerangiyi. Wanasisi tayaspatarangu, kis mazinamana mazinarangsa natumasamta. <sup>36</sup> Wangarini nuwaa kamanirangtaa, itaru yuwamun tputsee yarki anumun nuwaa mangoonamaam waritariya. Apap nuwaa zanganirangiya atana. Anuri mangoonangtsa. Apap nuwaa kamachtarangya kizpur ashimaama. Apanll tamatarpari sheeranlluri, wanip siysa parangsa. Anumun nuwaa mangoonamaam waritariya. <sup>37-38</sup> Sirutari Apaptam kuk nuwaa kamanirangiyi. Watacha nuwaa zanganirangu anu. Nuwaa zanganirangtaa, itaru siysa nuwaa ngataksa. Ashirucha, nuwaa ngatkus, ¿tamaree siy Apapaa mazinachis? ¿tamaree siy Apapaa yasachis?

¿tamaree Apapaa kuk mangoonchis? Pinasaksa. Apapaa kuk nda mangoonaksa siya. 39-40 Siy Apanllee yandamarini kapung natstaksa. Apanll nuwaa kis napanda átus, Apanllee kuk kapung natstaksa. Kapung natstakinaari taarashish urutamash yachima, mangishis ngutis átus, zapan natstaksa. Antaati yuwamun kapung natstakis anumun Apanll siyaa kis napach, nda. Yuwamun nuwaa mangoonkis anumun kis napchiya, watam Apanll kuk nuwaa kamankuwa. Apanll yandamarin nuwaa kamankitaa, ashirita siy nuwaa ngataksa. Taarashee urutamashee kanachatssa siyaya.

41-42 Nuw siyaa yasaktana; siy nda Apanllee chinaksa. Ashiritam siy nuwaa nduntam chinaksa. ¿Nitaati tputs nuwaa kis napanda turi kusarangeezi? nda. Apapaa kamachtamarini tuminpi turi kusarangina. 43-44 Apanll nuwaa zanganirangu, nuw nish tsapurunasush kusarangina. Ashirita siysa nuwaa mangoonamaam ngataksa. Itaru, nllitaritanaari tputs msangeeru kuseeru, nduntaa Apanll zanganku, siysa anootssha kis napaksa; waa kuk ngatcheezis, ndambaree. Watam Apanleetsimari nda chinaksawa. Apanll nuwaa kischa chinapanda nda átssawa. Apanllee mapiyksa. Siy tputseetsimari chinaksa. Ashirucha, anumun nuwaa mangoonamaam pinasaksa. 45 Siy nduntaa nuwaa mangoonkus, ashirita nuw siyaa nda títachina. Apaa, an tputs yutaritssinchia; shiysha waneengcha; táchéezi, ndambari. Itaru, siyaa Móysisarinimand yandamarini yutaritshishush wayachiya;

anumand siyaa waneeshish wayachiya. Móysisarinimuna kuk kamungchima, atitaateesa, itaru nda mangoonaksawa. <sup>46</sup> Móysisarineetsini kuk mangoonkinaareesa ashiru, nuwaatstam mangoonatssa, watam Móysisarini wasina nuwaa kamaniranguwa. Nuwaa kamanirangtaa, itaru siysa nuwaa ngataksa. <sup>47</sup> Siy Móysisarin yandamarini mangooncheezis, ashiriya nuwaatsinashtaja mangoonchis siya. Kapunguri pinasaksa, Isusu, tárangeya Utaáshucheetsi kurakarini.

Ashiri yuwaa Isus waanaatsi kamanirangu anoo kamaneena.

## 6

*Mishat, yuwaa Isus katungtsee kapung izapaneerangu anoo kamanchintspa*

(Matiwa 14.13-31; Márkosa 6.30-44; Lukasa 9.10-17)

<sup>1</sup> Isus Irusarinaa kasayaru, Galileyap tsap waptam kanapurangu, anush taarangiya. Anush taaru, Isus musaa kiteeni týaru, iyapat wipunashini kítarangani. An mus tsimbun tsurtarangiya; iyashuch Utaáshuchini k'kini Galileya atiniya, itaru arapichsha tputs Tiberiya atanaya. <sup>2-3</sup> Arachich matayaruni, machee pakchee káreeruni, anush kuxineeruni, Isus iyaa tayaspatarangiya. Itaru, arapiri tputs wazapan Isusungaz tachitarangana, watam tputsee zapan yarta yarta ashiranguwa.

<sup>4</sup> Mishat, iy Utaáchchini shambatshishini pakich pishtarangiya; Israelchich yuwaa Ijiptoo tsap shitungarangana. Anootscha zar

shambatshishi atashina. Ashirucha, tputs wazapan xiyrangana. <sup>5</sup> Anush kuxineeramchuni, tputs zapan Isusungaz kusaranganaya. Isus anoo ichinguru pakeeru, Felippat tsiyatarangiya. Zuwaal Felipaa, ḡyapee paxanxeeruch, tputseem ichinguru maritachich? tárangeiya. <sup>6</sup> Itaru, mangu Felipaa yachamaam mashirangiya, watam Isus waana chinaranguwa yuwaan maritachu anootsi. <sup>7</sup> Felipaa mashku, Felipsha: Kuriki k'tsas iptartaa milo kapeeteeruch, antaati tputs tazazchazinllinaja. Mangu marizpat xiytat ashichpasinaya, tárangeiya Felipi. <sup>8-9</sup> Ándarissha: Nuw nlluraa parangi. Pangaa pakchi zameetpatam payuru, kayupcheetssha tsimbunutam payuriya. Itaru, ḡanoo mayaamaja chinachich? tárangeiya. Ándaris watacha Pitor zoonlli; Isustam wipunashi. <sup>10</sup> Ándaris táyaru, Isussha: Ashiri xamachi, tputsee ichinguru k'xinartangints tángi; tárangeiya Isusu. Ashirucha, tputs chirichirimun wanasisrimuna kuxinartarangana. Kamuzanandari táchkuch, zameetpaparee mil taaranaya tputsi zapani. <sup>11</sup> Tputs ichinguru kuxinartaatssin, Isussha pangaa yáyaru, Apaa, shiy kizpurtishcha, watam katungtsee panayanllshawa; táyaru, tputseem maritarangiya. Kayupcheetssha ashirangtamta. Iysha wipunashini tputseem panat panat ashiranganiya. Tputssha katungarangsin, kapunguri tazazarangana. <sup>12</sup> Pishtarangeeja; katuchiranganaya. Ashirucha, Isussha: Katungats mangu itsantapa tina; ashiri katuchim yángints; táyaru, <sup>13</sup> iysha

tsumb k'tsas tsimbun matayaru yaranginiya. Zameetpatta pang taarangu, ashiritaa tputs ichinguru tazazartarananganaya; kapunguritam katuchirangiya. <sup>14</sup> Tputssha anoo pakeersin, punirustarangana. Isus ndusha Apanllee kuk kamanimapanparee. Ndusha yuw tsapurunas kuschu atini anparee; Apanll Ipusamarini yuwangaz kutakani anparee.\* Ndush watatparee niya, tárangana tputsi. <sup>15</sup> Táyarusin, Isusoo putamaam zandarangana. Putayaruni, kurakarineemani ínayani, waanpatatin, tárangana. Isus anoo yasayaru, upusap machpi waanita naatarangiya.

Ashiri yuwa Isus katungtsee izapaneerangu anoo kamaneena.

*Mishat, yuwa Isus kungumuna xiyrangu anoo kamanchintspa*

(*Matiwa 14.22-47; Márkosa 6.45-52*)

<sup>16-17</sup> Ashiriya, Isus machip naatarangu, iysha wipunashini musap naatarangani. Kanush kapungush zaruyaruni, yaktap Kapárnáwap arachich naatarangani. Kchungattanuni upusari izuuru tapeerangiya. Ndatuma Isus iyap naachu, <sup>18</sup> tapeeru, kambusursha kizpur kambustarangu, warassha kizpuritam warastarangiya. <sup>19</sup> Arap kchungtayaranlluni, yoo atuni, Isusoo kungumunuri naantachu paranginiya. Kizpur punirangini, sitatstee, táranginiya. <sup>20</sup> Itaru, Isussha: Punirintspa, nuwtanda, táranginya. <sup>21</sup> Táyaru, mangini ksayaruni, Naani, zarungi, tárangini. Zaruramchu,

---

\* **6:14** Wanga 1.21 tsiyatsis nipta tatsamooru taaritamta.

mikeertam matayaranganiya arachchi. Anush maarangtanicha.

<sup>22</sup> Putamsha tputs Isusungaz nachun-garangana. ¿Yapeeja naayanll Isusoo? tárangana. Sing wipunashim kanush zaruyarusin, naatarangana; itaru Isus nda zarurangiya. Kan minamari taarangiya. ¿Ashiriya, yapshtaja suwarang? tárangana. Táyarusin, annungiri naxpoorangana. <sup>23</sup> Itaru, kanoo nllitarita parangana. Yuwanung katungarangana annung kan tuwshoom matataru, zapan parangana. Yaktashchi Tiberiyshuch tputs wanuri. <sup>24</sup> Tputssha: Ashiriya, Kapárnáwap Isusoo nachungayani, watam nish nduniwa, wipunashtam nish nduntamtaja táyarusin, kanush zaruyarandsin, Kapárnáwap yaktap kítarangana.

Ashiri yuwaa Isus kungumun xiyrangu anoo kamaneena.

*Mishat, yuwaa Isus tayaspataku, nuwashumari tchitangandama, tárgu anoo kamanchintspa*

<sup>25</sup> Ningtari Kapárnáwap matayeersin, Isusoo parangana. Tputssha; Isusoo, ¿ashin shiy ning kusaramachsha? atusin, <sup>26</sup> Isussha: Mazinangtsa; ¿nitaati kaapaniritaja nuwaa chinakis? nda. Tazazarangis anumun siy nuwaa chinaksa. Kizpureeruri, katungtsee izapaneerangitaati, nda anumand chinaksa. Katungtsingaziri chinaksa siya. <sup>27</sup> Itaru, nuw siyaa tina; anungaziri chinarintspa, watam mangutari pastachuwa. Nda katungtsimun urutamari taatssa. Itaru, yuwaa nda pastachu anumasheetsi chinangtsa. Anumashee chinakinaareesa

urutamari taatssa. Nuw tputseem kinaranguri, siyaam taarasheetsis urutamashi panachintspa. Anumashimun urutamari taatssa nguti teezi, nda; watam Aparich nuwaa zanganiranguwa. Nuwsha Aparimunari wizpuririni katungtsee izapaneeranginawa; tárange Isusu.

<sup>28</sup> Tputssha: Ashiriya, ¿tamaycheezini Apanllee kuk izuuru chinamaama? tárangusin, <sup>29</sup> Isussha: Apanllee kuk izuuru chinamaam zandkinaareesa ashiru, nuwamun mangis tatungtsa, watam Apanll nuwaa zanganiranguwa; táyaru, <sup>30</sup> tputssha: ¿Tamaree ngutich ashchich? Natu, shiyma Apanllee wizpuririni yámandangasinda. Pangpani, ¿tamaycheezish shiya? <sup>31</sup> Móysisarini zitamarineetsini tsap puzap machtayaru, masach zapan mangutari katungtsee kanindap ipantsayaru panarangiya. Watam Apanll kuk yandamarini anoo kamankuwa; Apanll katungtsee zanganeeru, Móysisarinsha tputseem maritarangya, átcha Apanlli kuku. Ashiri shiysa anoo kasikinaareesha, iysha mangoonachshapariniya shiyaatsiya, tárangana. <sup>32</sup> Isussha: Mazinangandama; ¿antaati Móysisarineeja sirútama katungtsee kanindap ipantsarang? nda. Apapcha wayarangiya. Mishat, nat in siyaam yuw izuuru istaku anoo wayakiya. <sup>33</sup> Yuw izuuru istaku anu watach Apap tputsee na zanganirangu anuya. Apap uwaa zanganeeru, uwsha tputseem tsapurunas ztaru taarashee urutamash wayakiya. Uwsha tputsee izuuru taamaam istakiya, tárange Isusu. <sup>34</sup> Itaru, tputssha mamarpayarusin, Ashiriya,

Isusoo, watam átshawa. Katungats yuw izuuru istaku anoo iyaam uru panangcha. Na yachayani, tárangana.

**35** Isusssha anush wazareetsiri kamanirangiya. Tárangeiya; Watatana nuwaya. Yuw Apanll zanganirangu anu nuw antana. Taarashipantana nuwaya. Siy nuwash tachitkinaareesa, nuwaa mangoonkinaareesa, ayamtaati yusur Apanlleem mangis pachirungacheezis, ndambaree. Mangishis Apanlleem pishtats ndunshaparee, tárangeiya Isusu. **36** Itaru, wandaritam siy nuwaa ngataksa. Apanllee wizpurini parangitaatis, wand nuwaa ngataksa.

**37** Itaru, yuwaa tputs Aparich nuwaam tputsireemi wayarangu an uru nuwangaz zandkiya; nuwash tachitkiya. Tputs nuwash tachitku, nuwsha anoo kapeetcheezi, ndambari.

**38** Apanll nuwaa nish tsapush zanganeeru, yuwaa nuwaana chinaki anoo nda payukina. Apanll nuwaa kamachtarangu anuri payukina.

**39** Nuwaa kamachtarangu, Tputsireetsish wanasisri ksutangcha; minamtiyam Yashingup kanacharinllpa, tárangeiya. Mishat, tsapurunas kachingkachu, shiysha tputsireetsish ichinguru ituyamayarush tapachindangcha; nuwaa, tárangeiya Apanlli.\* **40** Apap waana nuwaa kamachtarangiya. Ashirucha, tputs nuwaa yasayarusin, nuwamun mang' tatkatssin, urutamari taachinllinaya Apanlleema. Apanllish taárash taachinllinaya. Ashichu, tsapurunas

---

\* **6:39** Jeremiyasa 23.4 tsiyatsis nipta tatsamooru taaritamta.

pastakachu, nuwsha anoo tputs ituyamayaruri, tapachindachima, tárangiya Isusu.

**41** Ántaru anoo mazinarangusin, iy Utaáshuchini kurakarini waanpatatin tsiyatkusin, kazambzambtangat ashirangana. ¿Mayaamshta Isus: Nuwaa Apanll zanganeerangu nuw antana, át? tárangana. **42** Watam Isusoo yasakanawa. Wapari watacha Usiriniya. Waniree yasartamaniya. ¿Nitaati Apanllush káyashinu nish kusarang? dancha. Tputshu nllurtarangiyá. Waanaatstamari mangu atiya, tárangana iy kurakarini.

**43-44** Ashirucha, Isus shaniyshishish tayaspataku tárangiyá; Watsta, ¿mayaam saanpata tsiyataksa? Siy nuwaa kuki payumaam pinasaksa. Ndunnaa Aparich tputsee mang' p'tseeku, tputssha nuwash tachitcheeja, ndambari. Itaru, mangoo p'tseekchu, nuwaa kuki kis payuchiya, watam Aparich nuwaanaatstam zanganiranguwa. Sheeru, Apanll tputsee wanimaam kuskachu, nuwsha tputsireetsi ituyamachima; tapachindachima. Nuw taarashipantana. **45** Apanll tputsee mang' p'tsimpancha, watam waana kuk yandamarini atuwa; Nuwaana tputsee ichinguru tayaspatachima.\* Átcha Apanlli kuku. Ashiriya, tputs Apareetsich kuk mazinayaru, nuwaatstam kuki kis payuchiya. **46** Tputs Apareetsi minamtiyam nda pataruwa. Itaru, minamari tputs Apanllee kaapa pakiya. Watatana nuwa;

---

\* **6:45** Isáysa 54.13 tsiyatsis nipta tatsamooru taaritamta.

Apanll zanganirangu antana. Ashiruch nuw itsinsaru tayaspataki.

<sup>47</sup> Ashiri mazinangandama; niri mangoonangtsa. Tputs nuwamun mang' tatku, urutamari taachiya; Apanlee taárash payuchiya.

<sup>48</sup> Nuwamun katungats urutamashi tamapari ashiru tputs taachiya; nuw taarashipantana.

<sup>49</sup> Zitamarini katungtsee Apanll zanganirangu anumuntaa kchitarangusin, ashiritaa tsap puzap ipusari tsiparangana. <sup>50</sup> Itaru, minu yuw áti an ashcheeja; nuw tputsireetsi kanatsipamaam yasareezi. Apanll nuwaa nllitaritamasheem zanganirangiya. Tputs nuwaa mangoonkinaari, Yashingup taarashee kanatsipamaam nduncha.

<sup>51</sup> Nuw taarashipantana. Apanll nuwaa nish zanganirangu, nuw nish tsapurunasush kusarangtana. Nutseetsi pachindcheezi, ndambari. Nuwamun tputs urutamari ztaru taachinllinpa aturi, nutseetsi maritachima, tárangeiya Isusu.

<sup>52</sup> Kuraksha anoo mazinayarisin, waanpatatin zamamtarusin, ¿Tamaree waanaatsi wanuts chiyaam maritach? Pinasakiya kapungurita, táyarusin, <sup>53</sup> Isussha: Nuwaa kuki kaapa mazinangtsa; Ndunnaa siy nuwaa nutsi katungkus, misha ndunnaa nuwaa kurasiri waakus, Apanlee taárash payucheezis, ndambari. Watam Apap nuwaa zanganirangtaa nda nuwaa mangoonaksawa; tárange. Na wazareetsiri kamanchintspa yuwaá áti anootsi. Ndunnaa siy nuwachicheem kinakus, urutamari nda taatssa. <sup>54</sup> Itaru, nuwaa nutsi katungpaz ashkus, misha nuwaa kurasiri waakpaz

ashkus, taarashish urutamash payutssa. Ashkinaareesa, siyaa kanachacheezi, ndambari. Apanll tputsee wanimaaam kuskachu, nuwsha siyaa ituyamachima; tapachindachima.

<sup>55</sup> Katungtsimun natumasana taarasheemich kchitarchi. Itaru, nuwamun nutsi, misha kurasisrimunatamti urutamari Apanlleem taachchi. <sup>56</sup> Ashiriya, tputs izuuru nuwaa nutsi katungpaz ashku, misha kurasisri waakpaz ashku, uru nuwapat washunand taachiya; kis washunandari taachiniya. <sup>57</sup> Aparich nuwaa zanganirangu, nuwsha Apapamunari taaki, watam Apap taarashipaniwa. Ashiritam, tputs nuwamunartanaariya kchitakpaz ashku, urutamari nuwamunari taachiya. Ashiri nuwashumari tchitangandama. <sup>58</sup> Apanll zanganirangu nuw antana. Apanll sirú zitaminama zanganirangu an tamapari nda ashirina. Zitamin upusari tsiparangana. Itaru, nuwsha taarashee urutamash panaktana yuw nuwaa mangoonku anooma. Tputsireetsi kanachamaam pinasaktana, tárangya Isusu.

<sup>59</sup> Watacha Isusu tayaspatarangu anu. Utaáshuchish shaniyshini yakat Kapárnáwash tayaspatarangiya.

<sup>60</sup> Ashirucha, Isus wamkur anoo mazinayarusin, Uw kuk mbamcha. ¿Chaka anoo mazinantappu? ¿Tamaree chiy anoo payuchich? tárangana. <sup>61</sup> Nduntaa tputs Isusoo kamanku, Isussha chinarangana anoo yasarangiya. Ashirucha, Isussha: ¿Siy anumun xarakis? tárange. <sup>62</sup> Nuw na tputseem kinarangitaati, yusur Apanllip waptam

kárkachuri, ¿mangishis tamaycheezis? ¡Maya! aranginashaparee xarachpasa. <sup>63</sup> Apanll Wani siyaam taarashipancha. Itaru, tputs chínash pakchiyam nda istakiya Apanlleema. Nuwaanaatsi kuki siyaam kamankuri, siyaam taarashipancha, watam Apanllpat Wani taarashimash tatsamooruwa. Nuw siyaam ichinguroom istamaam waritaktaati, <sup>64</sup> itaru siysa nda ichingurus nuwaa mangoonaksa, tárangeiya Isusu. Nda ichingurus nuwaa mangoonaksa, tárangeiya, watam tamapingampanee uru natstaranguwa. Sirútari iyaa wipunasheem ipuseeru, uru tamapingampanee yasarangiya. Ashirucha, anoo, tárangeiya. <sup>65</sup> Isus tárangitamta; Anumand nuw siyaa itsinsaru kamanirangina. Ndunnaa siyaa Aparich mangis p'tseeku, siy nuwash tachitcheezis, ndambari, siyaa itsinsaru, tárangeina, tárangeiya Isusu.

<sup>66</sup> Táyaru, Isussha wamkur zapan Isusoo kasarangana. ¿Chak ashishtapa? atusin, Isusush nda tachitarangana. <sup>67</sup> Ashirucha, Isus iyaatssha wipunasheetsini k'tsas tsimbun matayaruni anootssha: ¿Siystawa? ¿Kasapi atitamtis siya? tárange, <sup>68</sup> Pitorsha: Mayistoroo, ¿tamaree iy shiyyaa kasachini? tárange. Ashkachinaareeni, ¿chakshooja tachitchinee? Watam shiyamari kukish taarashipaniwa. <sup>69</sup> Iynaa shiyyaa mangoonaktanicha. Shiy Apanlltishcha Ipusamarini, tárangeiya Pitoru. <sup>70</sup> Isussha iyaatssha: Waritachparee, tárange. Nuw siyaa k'tsas tsimbun matayaru tputs ipusarangina nuwash tachitamaama. Ipusarangtaati,

itaru minamtamsha tputs yashingchicheem kinachiya, tárangya iyaatsi. <sup>71</sup> Isus waana wasina yasayaru, Utaásarineetsini kamanirangiya. Utaásarini, Simorini Iskáriyotarini wipa, Isusoom wipunash kinarangitaa, zapishsha Isusoo tamapingarangiy. Ashiruch Isus anoo yasayaru kamanirangiya. Kamaneeru, kasarangiy.

Ashiri yuwaa Isus nuwashumari tchitangan-dama, tárange, anoo kamaneena.

## 7

*Mishat, yuwaa Isus yusur Irusarinap naatarangu anoo kamanchintspa*

<sup>1</sup> Iy Utaáshuchini kurakarini Isusoo pachamaam zandarangusin, Isussha Utaásh tsap xiytcheezi; nuwaa pcharundama táyaru, Galileyshuri tsap xiyrangiya. <sup>2</sup> Zapishsha Utaáshucheem shambatshini pakchimsha pishtarangu. An shambatshini watach Irusarinush tambtayarasin, tsimbun matayaru maarangana anu. <sup>3</sup> Ashirucha, Isussha zoonll: Nee tsap kasayarush, Utaápsha tsap taangcha; Isusoo, tárange. ¿Mayaamsha amb nda wizpurirish ipunsheemish yámandaksha? <sup>4</sup> ¿Nitaati tputs nish machin taaru anush waritareeja? nda. Shaanaatsi kurakaam ínapi átush, ashiri tputush zapanish shingcha. Ashkachinaareesha, tputs shiyaa ichingurusin natstachshapsinaya, tárange Isusootsi. <sup>5</sup> Zoonll Isusoo nda mangoonarangsin, Isusoo tanaseerangana. <sup>6</sup> Tárangusin, Isussha: Naturitana nuwaam nda waritariya; nuw zari nda tatsamooriya.

Itaru, ichinguru zari siyaam waritariya, tárangu. <sup>7-8</sup> Tputs siyaa nda natsakana. Itaru, nuw tputsee yutaritshishee itsinsaru kamankuri, uwshtisin anumand nuwaa natsakana. Ashiriya, siyma naatssa. Nuw naturi naacheezi, watam Apanll yandamarini nuwaam nda tatsamooruwa; tárangiya zoonlleetsi. <sup>9</sup> Táyaru, Isus anush Galileeyash natumasina taarangiya.

<sup>10</sup> Zoonll naayarandsin, uwsha ushimun naatarangiya. Nda tputs wazapanpata naatarangiya; tputs machin naatarangiya; iyaptatam naatarangani. Irusarinush kuseeram-chuni, waanaatsi pishurangiya. <sup>11</sup> Iy Utaáshuch kurakarini Isusoo nachungarangana. Tputs zapan shambatshisheem shaniyarsin, kuraksha anush: ¿Isusuwa? tátá tátá ashirangana. <sup>12-13</sup> Itaru, tputs waanpatatin zapan tsiyatarangana; itaru nda kapung zamangarangana. Kurakarini iyaa nambuneepa atusin, apinlliri tsiyatarangana. Waanpatatin tsiyatkusin, ashpatam tputs: Isus wanasisrimishcha tputsi, tárangana. Itaru, ashpatam tputs: Nduni; Isus ngichikcha, tárangana waanpatatina.

<sup>14</sup> Ántarusin, wand Isus waanaatsi pishurangiya. Itaru, wandari shambatshishee nda itupshingarsin, tuchipparee maats tushiyaru, anush Isussha Apanllush pang' pshtuyaru, kapung tayaspatarangiya. <sup>15</sup> Iysha kurakarini punirustayarusin, ¿Tamaru tayaspataka? Watam iyash iskoweerarini nda pshturanguwa. Mangutari kapung tayaspatakuwa; tárangana.

<sup>16</sup> Isussha anoo mazinayaru yámarangiya;

Nitaati nuwaana chinaki anoo tayaspataki, nda. Waana Apanll nuwaa zanganirangu, ashirucha Apanlleetsimaritam kuk kamanki, tárangeya. <sup>17</sup> Tputs Apanlee kuk payumaam zandkinaariya, nuwaa kuki yasachiya. ¿Chakaja kuku? ¿Waantazuwa kuku? ¿Nduntaati ashiru, Apanleezuwa kuku? táyarusin, nuwaa itsinsaru natstachinllinaya. <sup>18</sup> Chaanaatstamari kukich kamankuch, ashiru chaanaatstamari ungirtamaam zandku ashtarchi. Itaru, chiya kamachtarangu anootsimari kuk kamankuch, nitaati chaanaatsi ungirtakeezich, dancha. Itsinsaru tayaspatachchi; ngichiz nduncha. <sup>19</sup> Itaru, siysa; ¡maya! Móysisarini Apanlee kamachtamarini siyaam yandarangitaa, itaru siysa, nda minamtiyam tputs, nda itsinsaru payuksa, watam nuwaa pachamaam zandaksawa, tárangeya Isusu.

<sup>20</sup> Támpu, tputs ichingurusin: ¡Miroosinlltishcha shiya! ¿Chak shiyyaa pachamaam zandka? atusin, <sup>21</sup> Isussha: Nuw kizpureeruri, tputsee minamari yararanguri, siysa anumun kapung xaraksa. <sup>22</sup> Sápatush kanusamaam waritaktaa, ashiritaa anush zari kanusisush nlluraa tasi ktsupaksawa. Yuwamand Móysisarini: Nlluraa wayumshiree tas ktsupangcha átu anumand ashiksa. Kaapana Móysisarini ktsupamaam nda kamachtarangiya, watam zitamarini anoo uru payuranganawa. <sup>23</sup> Ashiruch kamachtamarini yuwaatsimari kasiru taaru anoo payuksa. Ashiriya, kanusisush ktsupamaam waritakinaari ashiru, ¿mayaamsha tsiyantaksa yuwanmand kanusisush tputsee yararangi anumanda? <sup>24</sup> Watsta, Iwaziri

chinarintspa; itsinsaru chinangtsa, tárangiya Isusu.

<sup>25</sup> Táyaru, Irusarinshuchsha tputs: ¿Ndusha in watat tputs yuwaa pachamaam zandkana anu? waanpatatin, tárangana. <sup>26</sup> Pa; kamirana tayasptakiya. Iy kurakarini watsta nda atanaya. Chinakpasinaya. Isus Apanllcha Ipusamarini átpasinaya. <sup>27</sup> Itaru, Apanlleeja Ipusamarini, ndambaree. Apanll Ipusamarini kuskachu, ¿yapimasaja shitungach? Anoo yasamaam pinasaktanicha. Itaru, Isusootssha yasaktanicha; Galileyshuchcha tputsi, tárangana Irusarinshuch tputsi.

<sup>28</sup> Tárangusin, Isussha tayasptaku kuk kapung tsiyatarangiya anshu. Tárangiya; Zuraktishcha. Siy nuwaa yasamana yasaktischa. Taarasheetsi yasaktamsa. Yasaktaateesa, itaru yuw nuwaa zanganirangu anootscha nda yasaksa siya. ¿Nitaati nuwaantaa nish kusarangee? Nllitarit waana nuwaa zandeeru, kamachtayaru zanganirangiya. Siy kaapa waa nda yasaksa; mangoonkeezis siya. <sup>29</sup> Itaru, nuwna waa yasaktana, watam waanpata taaranguri, uwsha nuwaa zanganiranguwa; tárangya Isusu.

<sup>30</sup> Táyaru, iy kurakarini Isusoo putamaam zandarangana. Itaru, pinasarangana, watam Apanll yandamarini Isusoom nda tatsamooranguwa. <sup>31</sup> Itaru, tputssha zapan Isusoo mangoonamana mangoonarangana. ¿Isus Wizpuririni waninlle? tárangana. Apanll Ipusamarini kuskachu, ¿antaati Isusoo kasicheeja? ndambari, tárangana waanpatatina.

<sup>32</sup> Kamapshirangitaatssin, Parísiypanshuchsha tputs yasarangana. Ashiri Parísiypanshuchpat Utaáshuchpat apanllpan urkari tsiyatarangana. Tsiyateersin, Apanlee pang' ksutamapanee kamachtarangana Isusoo putamaama. <sup>33</sup> Isusush kuseersin, Isussha: Natumasana nish pakich taachima, tárangu. Sheeri, waptam kanapchima. Yuw nuwaa zanganirangu ambitam waptam kanapchima. <sup>34</sup> Amb taakamchuri, itaru siy amb naamaam pinasachpasa. Naatachuri, siysa nuwangaz zandachpasa. Itaru, nuwaa nda pangatssa, watam amb naamaam pinasaksawa; tárangiya Isusu. <sup>35</sup> Táyaru, kuraksha waanpatatin, ¿Yapeeja naach? tárangana. ¿Nachungakchuch tamaree nda pangchich? Piyaripparee tsap naayaranllu, nda pangachchi. Ambeezuwa naayaru, iyashcheetstam Utaáshucheetsini tputs pakchu, ¿ndusha anoo tayaspatapi átu naachima át? tárangana. <sup>36</sup> ¿Mayachta át? yasakeezini. Naaki siy amb naamaam pinasaksa. Mishat, nuwaa nachungakitaateesa, ashiritaa nuwaa nda pangatssa, watam atuwa. Anoo mangoonkeezini iya, tárangana waanpatatina.

Ashiri yuwaa Isus Irusarinush kapung tayas-patarangu anoo kamaneena.

*Mishat, yuwaa Isus tayaspataku anumand putayani atitaatssin, xapoorangana anoo kamanchintspa*

<sup>37</sup> Minush zari shambatshishush, zari kizpurcha shambatshishimuna, anpasha zari shambatshishee uru iwaptaranaya. Ashiriya, anush

zari Isus chiyayaru, ichinguru tputs mazinapana átu, kizpur tsiyatarangiya. Sachispaz ashiru Apanllingaz tamarakus, nuwsha izuuru istach-intspa Apanlleema. <sup>38</sup> Nuwamun mangis tatkus, mangishis Apanll taáraph urutamari taachiya; pastacheeja, ndambaree. Kung naantar ashkitaa nda pasitaru ashiritam siyaam nda pastachiya,\* watam Apanll kuk atuwa; tárangya Isusu.

<sup>39</sup> Isus anoo kamanku, Apanllee Wani átu, tárangya. Nduma Isus tsipachu, nduma Waparip kanapchu, anpur Apanll Wani iyash mangini ndunimuncha. Itaru, Isus waptam kanapuramchu, Apanll Wani iyash tsapush kusarangya. Isusumun mangini tatkuni, Apanll Wani urutari iyash mangishini taakiya. Anoo ashchu anoo Isus kamanirangya.

<sup>40</sup> Ashirucha, Isus anoo, tárangu, tputssha waanpatatin zapan tsiyatarangana. Ashpatamsha tputs: Isus watacha Apanllee kuk kamanimapani, naanchpa atini anu,\* táranganaya. <sup>41</sup> Ashpatamsha tputs: Apanllcha Ipusamarini, táranganaya. Itaru, ashpatamsha tputs: Nitaati Apanll Ipusamarini, ndambaree, táranganaya. Apanll Ipusamarini Galileyshucheeja tputsi. <sup>42</sup> ¿Nitaati Apanll kuk anoo táranylleeja? nda. Dapiyarinchichcha tputsi. Dapiyarinish yaktarini, Biringush\* nllurtachiya, átcha Apanll kuku, táranganaya. <sup>43</sup> Min tputs átu, min tputs átu, ashkusin,

---

\* <sup>7:38</sup> Isáysa 44.4; Isáysa 55.1, misha Jeremiyasa 2.13 tsiyatsis nipta tatsamooru taaritamta. \* <sup>7:40</sup> Tayusima 18.18-19; Wanga 1.21 tsiyatsis nipta tatsamooru taaritamta. \* <sup>7:42</sup> Ruti 1.2; Mikyasa 5.2 tsiyatsis nipta tatsamooru taaritamta.

minamari chinamaam pinasarangana Isusootsi.  
**44** Apanlee pang' ksutamapansha ashpatam Isusoo putayani, tárangana. Ashpatamsha tputs watsta, tárangana. Ashirucha, Isusoo nda putarangana; xapoorangana.

**45** Xapooyarandsin, apanllpanip urkari xunarsin kanapurangana. Kuseersin, anush apanllpan urkar Parísiypanshuchpat tputs shaniyeersin, apanllpansha urkar: ¿Mayaamsha nda putarangsa, xunarus kanapeeshinsawa? mang, tárangana. **46** Ksutamapansha: Xapoorangtanicha; uw kuk kizpurcha. ¿Chakpataja uw kuk waritach? tárangana. **47** Parísiypanshuchsha tputs: ¿Tamasha ngichzeetsimsha siy kis mazinaksa? tárangu. **48** Iyaatssha kurakaatsini napangtsa. ¿Nitaati minamtiyam Isusoo mangooncheezini? ndambaree. **49** Ítaru, ¿piyartachee tputs chakaja anoo chinaku chinach? Tputstisin Móysisarineetsi kuk pakchiyam nda yasakana. Nllur tamapari ashiru mangshartawa. ¿Antaati Apanll anoo tputs ksaja napach? mang, tárangiya. **50** Itaru, Níkodemsha kurakaa mang yámarangiya. Níkodem Parísiypanshuchimuntamta tputsi. Watatam sirú Isuspat psaan tsiyatarangu antamta tputsi. **51** Ashirucha, Níkodemsha: Ichtaru, tputsee tuxiykeeruni, mashkuni, tsiyatssee ichinguru mazinayaruni, anumunsha natstatariniya. Natstayaruch, wanitarchi. Ndunnaa ashkuch, itsinsamaam pinasakiya. ¿Móysisarini anoo kamachtaranguwa? Ashiri Isusoo yasayanimaní, tárangiya Níkodem. **52** Táyaru, apanllpansha urkari: Watsta; ¿mayaamsha átsha? Ndusha Isusoom wipunash kinapi atupsha shiyaya,

tárangana. Móysisarinee wirkar naapeerush natstangcha. ¿Nitaati Apanllee kuk kamanimapan Galileyashparee nllurtachiya át? Móysisarini kuk anoo ateeja, nda, mang, tárangeya kuraka.

<sup>53</sup> Táyaru, tsiyatamaam tuwatspayarusin, kuraksha waptam ichingurusin kana-putaranganaya.

Ashiri yuwaa Isusoo putamaam xapoorangana anoo kamaneena.

## 8

### *Mishat, yuwaa kurak Isusoo yutaritam ínamaam zandarangana anoo kamanchintspa*

<sup>1</sup> Ashirucha, ichingurusin naatarangsin, Isussha machip Olivap sura naateeru, anush maarangiya. <sup>2</sup> Putamsha zari puturi Isus Apanllip pang' yusur naatarangiya. Anush kuseeru, tputs zapan Isusoo mazinpani atusin anshutam kusatarangana. Kuseersin, shaniyeersin, Isussha kuxineeru tayaspatarangya. <sup>3</sup> Anush tayaspataku, Móysispaniri wirkari kamanimapani, misha Parísiypanshuchitam tputs kusatarangana. Kizaa putayarandsin, pshiyratat ashirangana. An kiz yutarit taarangiya. Wimbungarpat ipunanaw parangana. Ashirucha, Isusoo mashkatssin, kizapa kusarangana. Kuseersin, kizaatssha ipusanand tuxiykeerangana.

<sup>4</sup> Kizaa tuxiykeersin, Móysispaniri wirkari kamanimapansha: Mayistoroo, in kiz yutarit taaku kchini parangtanicha, tárange. <sup>5</sup> Móysisarini kuk pachamaam kamachtarangiya anumasheetsi tputsi. Patumbchipat pchangtsa átcha Móysisarini kuku. Ashiriya, ¿tamaycheezini iya? ¿Amaksha

shiya? tárangeiya Móysispaniri kamanimapani.  
<sup>6</sup> Mangu Isusoo yachamaam, tárangeiya. Isus tamantsakchinaari, nda itsinsaru yámku, iysha yutaritam ínapani atusin mashiranganaya. Ashirucha, masheersin, Isussha nda musá yámaranginya. Timucheeru, uwpat tsapumun yandayandar ashiranginya. <sup>7</sup> Ashirucha, mash mash ashirangsin, Isussha yusur napeeru, yámku, tárangeiya; Yuw tputs yutaritshishirinee nduni, tsasiri taaku anooma chtaru patumbich ta ashichpa, tárangeiya Isusu. <sup>8</sup> Táyaru, yusur timucheeru, tsapumun yandayandar ashiranginya. <sup>9</sup> Yandachu, wachinsha paziksin naanata, misha naanata, shimbayaranal ashirangana. Nllurtamsha naataranganaya. Káchingaranganaya. Kizaatsim kamingaranganaya. Wand xiyyeew ashku, Isusoo tasasasaw ashiranginya. <sup>10</sup> Isussha kizaa pakeeru, ¿Tputs shiyaa pachamaam zandarangana anuwa? ¿Chakshta shiyaa pachachinll? átu, <sup>11</sup> kizsha: Ichee, na tputs nuwaa pachamaam wanindaja, tárangeiya. Isussha: Ashiriya, nuw shiyaa pachachtamtazi, ndambari, tárange. Mapiyrush naatscha, zaa. Itaru, yutaritshireetsish izuurumamarisha ksangcha; tárangeiya Isusu. Táyaru, kasaranginya.

Ashiri yuwaa kurak Isusoo yutaritam ínamaam zandarangana anoo kamaneena.

*Mishat, yuwaa Isus yusur tayaspatarangu, Apanlee itsinsarucha kamanki, tárange anoo kamanchintspa*

<sup>12</sup> Isus yusur Apanllish pang' tayaspataku, tárangeiya; 'Sin tamapari ashiru taakina

nuwa; tuwasinimpantana. Tputs nuwash tachitku tunimush nda taakiya. Itaru, 'sinishpaz ashiru taachiya,\* tárangeiya Isusu. <sup>13</sup> Parísiypanshuchsha tputs: Shiyyaa kukish mazinamaam pinasaktanicha, watam shaanaatstamari átshawa; tárangeana.

<sup>14</sup> Isussha: Nuwaanaatstaati kamankuri, ashiritaa itsinsaru kamankina, watam yuw nuwaa zanganirangu anoo yasakinawa; misha waptam kanapchinawa; tárange. Itaru, siy anoo nda yasaris. <sup>15</sup> Siy uru iwaziri chinaksa; itsinsaru nda chinaksa. Tputsind nuwaa átus, nda itsinsaru nuwaa yasaksa. Itaru, nuwna nda tputsee yutarit tsiyatki. <sup>16</sup> Ashiritaata, tputsee natstakinaareena, itsinsaru natstachina, watam nda nuwaani natstakinawa. Apap nuwaa zanganeeru, nuwaptatam washunand yasakanaya. <sup>17</sup> Nuwaanaatstaati kamankuri, itsinsaru kamankina, watam Apappat kuk tatsamooriniwa. Apanll kamachtamarini, Tsimbun tputs minamari k'kuz payuku an k'kuz waptatcha, átcha. <sup>18</sup> Ashiri mazinangtsa: tsimbun nuwaa kamankiya; nuwaanaatsi kamankuri, Apaptam nuwaa kamankiya. Apap watacha nuwaa zanganirangu anu atashina. Ashiriya, nuw kuki waptatcha; tárangeiya Isusu. <sup>19</sup> Parísiypansha: ¿Natuwa, Aparshawa? táyaru, Isussha: Siy nuwaa nda yasaksa. Ashiri Apapaatstam nduntam yasaksa, tárange. Nuwaa mangoonkinaareesa, ashiriya Apapaatstam mangoonchitampasa. Itaru, siy watam

---

\* **8:12** Isáysa 49.6 tsiyatsis nipta tatsamooru taaritamta.

nuwaa nda mangoonaksawa; tárangiya Isusu.  
**20** Anush, Apanllush pang' tayaspatarangiya. Kurakanungiri watandpunu tayaspatarangiya yuwash kurik pshtashish taaru anshu. Ashirita, kuraksha Isusoo nda putarangana, watam Apanll yandamarini Isusoom nda tatsamooranguwa.

**21** Isus kurakaa, tárangitamta; Nuwsha kazurukchuri, anamunsha nuwash kusamaam zandkitaateesa, pinasachpasa, watam yutaritshishiris wand taaruwa. Yashingup naatssa siyaya, tárangiya Isusu. **22** Kuraksha waanpatatin: ¿Isus waanaatstariparee pachapi atuparee atiya? tárangana. **23** Isussha wand tayaspataku; Siy nish tsapurunasshuchtischa; mangishis uru sarich sarich ashiksa, tárangu. Itaru, nuw íwarpichtana; tsapurunasshucheezi nuwa. Nuw chinashi itsinsamcha. **24** Ashiriya, ngutazi siyaa áti; Yutaritshishiris wand taaru, ashiriya yashingupparee naatssa, átana. Siy ndunnaa nuwaa mangoonkus, Watacha ini Apanll zanganirangu anu, ndunnaa nuwaa átus, izuurus yashingup naatssa, tárangiya Isusu. **25** Kuraksha: ¿Ashiri shiy chakanasha? ¿Tamamshasha tputshish shiya? táyarusin, Isussha: Uru nuw siyaa kamanirangi antana, tárangu. **26** ¿Nuw siyaa wanipaja tsiyatamaam taar? watam yutaritaatsim chinaksawa. Siy nduntaa nuwaa kuki mangoonakchus, ashirita nuw siyaa itsinsaru kamanchima. Apap nuwaa zanganirangu, uw itsinsaru yasakiya; ngichiz wanindaja. Ashirucha, Apapaa kuk payukuri, nuwsha itsinsartamti yasayaruri, anuritam tsiyatsis nish tputshush kamankina,

tárangeiya Isusu. <sup>27</sup> Kuraksha anoo nda kaapa mangoonarangana; Isus Apanllee Apapaa átu anoo nda mangoonarangana. <sup>28</sup> Ashirucha, Isus arangeem kamanirangiya; Nuw na tputseem kinaranguri, siysa nuwaa yasinamun tupaxaxtachpasa. Sheerus, nuwaa yasatssa. In watacha Apanll zanganirangu anu, nuwaa tátssa. Anush, zuraktishcha; Isus Wapareetsim kuk mazinayaru, anootsimari iyaam kamanirangiya, táchpasa.

<sup>29</sup> Apap nuwaa kis napanda aturi, urutari Apapaa kuk payukina. Ashirucha, nuwaani minamariti nda taaki; Apap nuwapta uru taarataraw ashkiya; uru ipunkiniya, tárangeiya Isusu. <sup>30</sup> Anoo mazinayarusin, ashpatam Isusoo mangoonamana mangoonarangana.

<sup>31</sup> Ashirucha, Isusu kurak pakich mangoonarangana anpat tsiyatarangya. Nuwaa kuki izuuru payukchus, nuwaama ipunshi kinatssa. <sup>32</sup> Apanllee kuk itsinsaru payutssa; yasatssa. Sheerus, anumandsha ndusha m'chachoo taatssa, tárangeiya Isusu. <sup>33</sup> Kuraksha: ¿Mayaamsha átsha? ¿Antaati iy m'chuchoozini? dancha. Iy Apramarinchichtanicha nlluranurini. Apramchichee m'chachurtamaam wanindaja, tárangeana kuraka. <sup>34</sup> Isussha: Kaapa nuwaa kuki mazinangtsa; Tputs yutaritshishee chinaku, yutarit taaku, yashing' m'chachurtakiya; ashkachu waanaatsi itutsimaam pinasakiya, tárange. <sup>35</sup> M'chach tputshush pang' taaku, mangutari nllur tamapari ashiru taakiya. Itaru, wipsha urutamari taakiya; pastamaam nduncha. <sup>36</sup> Nuwsha ashiritamana; kizpurtamana. Nuw

ipareetseeruri, nuw siyaa itutsimaam waritakina. Itaru, nuw siyaa itutskachuri, yanpumaam wanindaja. <sup>37</sup> Iy Apramarinchichtanicha, átus, zurumana zuraktischa, watam anchich nllurtarangsawa. Itaru, siy nda mangis Apramarinpata tatsamooksa. Nuwaa kuki kapunguri ngatkus, nuwaa pachamaam zandaksa. ¿Antaati Apramarini anumashee chinarang? nda. <sup>38</sup> Aparis nllitaritamash taariya. Siy anoo kuk payumaam zandaksa. Itaru, nuwna Apapaa kuk itsinsaru kamankina. Yuwari nuwaa kamachtarangu anuri payukina, tárangiya Isusu.

<sup>39</sup> Táyaru, kuraksha: ¿Antaati aparini nllitarit taar? Minamari Apramarini watacha iy aparini, táyarusin, Isussha: ¿Kaapanaree siy Apramarinchichis? Ashirinaareesa, Apramarin tamarangpari ashiritam wanasis taatssa. <sup>40</sup> Itaru, siy nuwaa pachamaam zandaksa; yuwamand nuw Apanlleekuk itsinsaru kamanki anumanda. Apanll nuwaa kamachtarangu anootsimarita kamankuri, itaru siy ngataksa. ¿Nitaati Apramarini Apanlleekuk ngatarang? nda. Kis payurangiy. <sup>41</sup> Itaru, siy apareetsis nllitaritamashee kuk kis payuksa, tárangiya Isusu. Kuraksha kizpur tsiyantayarusin, ¿Nitaati iy shuchitamini wipini? nda. Apramarinchichtanicha. Apanll iycha aparini minamarita. Apramarini tamapari ashiruni Apanlleekuk itsinsaru mangoonkiniya, táyarusin, <sup>42</sup> Isussha: Siy Apanllchichinaareesa ashiru nuwaa chinachinaapsa. Apanllcha nuwaa zanganirangu, nish tsapurunas natum taakina. Antaati nuwamunta wizpuri

kusarangi, nda. Apanll waana zandeeru, nuwaa zanganirangiya. Ashirangtaa, nuwaa ngataksa. <sup>43</sup> ¿Mayaamsha nuwaa kuki nda mazinaksa? ¿Mayaamsha nda mangoonaksa? ¿Nitaati siy itsinsaru taamaam zandkis? nda. Mangishis sarich sarich ashiksa. Anumand nuwaa kuki mangoonamaam pinasaksa. <sup>44</sup> Apareetsis kuk nllitaritamashee kis payuksa. Aparis watacha yashinguja. Yashingootsimari kuk payupani átssa siya. Yashing' uru sirútamasta wápachcha. Yutaritshisheetsimari chinarangiya. Apanllee kuk uru ngatarangiya. Ngichiz yashinguush uru taatariya. Ngichku, mangush chinaku anuri tsiyatkiya. Yashing' wayangichirircha. Tputsee yutaritshishpaneem ínakiya. <sup>45</sup> Itaru, nuwsha Apanllee kuk itsinsaru kamankina. Ashirucha, siy anumand nuwaa nda mangoonaksa, watam yashingshumari tachitaksawa. <sup>46</sup> ¿Yapeeja yáyarus nuwaa yutaritam ínchis? pinasaksa. Nuw yutaritshishiri nduncha; ashiriya nuw kuki itsinsampancha. Ashirucha, nuw siyaa k'keetsi itsinsaru tsiyatkuri, ashiri mayaamsha siy nda nuwaa kuki payuksa. <sup>47</sup> Apanllchichinaareesa ashiru Apanllee kuk mazinachinaapsa. Itaru, siy Apanllchicheezis, nduni. Ashirucha, Apanllee kuk pinasaksa mazinamaama, tárange Isusu.

<sup>48</sup> Kuraksha: Ngutazini shiyaa táranllini; Shiy Samariyshuchtishcha; yashing' shiyash taariya, tárange tanicha. Miroosinlltayarush, piyari tsiyat tsiyat ashiksha, tárange Isusootsi. <sup>49</sup> Isussha: Yashing' nuwash nduncha. Nuw Apapaatsimari chinakina. Chinaktaati, itaru siy nuwaa nda chinaksa. <sup>50</sup> Nuwaanaatsi ungirtamaam nda

zandkina. Itaru, Apap nuwaa waana; Shiyaas kischa chinaki, átcha nuwaatsi. Apap waana nuwaa yasakiya. <sup>51</sup> Nuwaa kuki kaapa mazinangtsa; tputs nuwaa kuki payuku, ayamtaati tsipacheeja ndambari, Isus tárangu, <sup>52-53</sup> kuraksha: Na shiyyaa izuuru yasayanicha; miroosinilltishcha; yashinchichtishcha shiya, tárangana. ¿Tamarreeja tputs shiyamun kukish ashchinllina? Zitamarini Apramarini tsiparanginya. Apanlee kuk kamanimapanirini ichingurusin tsiparangitamanaya. ¿Antaati shiy taarashipanish? ¿Antaati shiy anoo yanurish? nda. Shiy nllurtishcha. Ashiriya, ¿mayaamsha shiy, Nuwaa kuki payuku ayamtaati tsipacheeja átsha shiya? ¿Shiy tamamshasha? tárangana Isussootsi. <sup>54</sup> Isussha: ¿Antaati nuw nuwaanaatsi ungirtapi teezi áti? nda. Ashkinaareena, ngutaritparina tsiyatkina. Itaru, Apap nuwaa waana kizpureem ínakiya; nuwaa chinakiya. Siy Apanlee ngutis Aparini átis; an watacha nuw Aparina. <sup>55</sup> Apanlee kaapa nuw yasaktana; itaru siy Apanlee nda mangoonaksa. Nuwnaari Apanlee yasareezi atinaareena ashiru, siy tamapari ashiru wayangichireem kinachparina. Itaru, nuw Apanlee izuuru yasakina; waa kuk izuuru payukina. Urutamari payukina. <sup>56</sup> Zitamarini Apramarini nuwaa yasaranginya. Yasayaru, mang' shambataranginya, tárangya Isusu. <sup>57</sup> Kuraksha: ¿Tamasha ashiksha? ¿Nduntaa kizpur wachinarush, nuw zitaminaa Apramarineetsini parangtana átsha shiya? Kapunguri ngichiksha, táyarusin, <sup>58</sup> Isussha: Itsinsaru nuw siyaa kamankina; ashiriya niri mangoonangtsa; tárangu. Ndatuma Apramarini nllur-

tachu, nuw urutari taarangina. Nuw Apanll-tana, tárangiya Isusu. <sup>59</sup> Táyaru, kuraksha: Uwaa pachayani, atusin, patumbchee yáta ashirangsin, Isusoo patumbichpa pachamaam zandarangana. Itaru, Isussha waanaatsi pishuku arangirisha naatarangiya; Apanllish pang' shitungarangiya.

Ashiri yuwaa Isus kurakaa waneeku, waantarishtisin ngatarangana anoo kamaneena.

## 9

*Mishat, yuwaa Isus wach mchusaa yararangu anoo kamanchintspa*

<sup>1</sup> Minush zari, kanusisush, Isus Irusarinush xiytu, tputsee chamayangarangiya wach mchusaatsi. <sup>2</sup> Iyaptatam wipunashpatini xiyranginiya. Ashiri chamayangaranguni, iysha: Mayistoroo, ¿mayamandaja wach mchus nllurtarang? ¿Waparimandazuwa yutaritshishirini ashirangu? ¿Nduntaati ashiru, waanamandazuwa ashiranguwa? táranguni, <sup>3</sup> Isussha: Nduni, anumandaja ashirang, nda. Itaru, Apanll nuwaanaatsi wizpuriri yámandapi átu ashirangiya. <sup>4-5</sup> Nuw nish tsapush taakuri, naturi taárasheem tuwasineempantana nuwa. Apanll nuwaa zanganirangu, ashiriya Apanll tamatarpari ashtachima. Wach mchusaa yaramapantana. Zapshtakinaareena, pinasachparee. Papcha, zar mangutari puchpa. ¿Tamayree psaan zapshtakchuni istachini? tárangiya.

<sup>6</sup> Táyaru, tsapumun kawacheeru, tsarunaam pakchi tinarangiya. Sheeru, mchusa wachush

pundarangiya. <sup>7</sup> Pundayaru, Kungup chumashiship Silowe sura amb naayarush, kachish k'pashini, tárangiya Isusu. Silowe iyashuch k'kini, chumasheem wach wayama, atuni atiniya. Ashiriya, táyaru, wach mchussa naateeru, amb kungup kuparangiya. Kupayaru, wanasisrsa naparangiya. Sheeranllu, Waanpee naatarangiya.

<sup>8</sup> Tputstisin zapan mchusaa yasaranganaya. Wach mchusama uru kurikingaz kuxinxineew ksutataw ashtariya. Wamkur taarangtamta. Ashirucha, wach mchusaa pakeersin, waanpatatin tsiyatkusin, ¿Tamash wach mchus taarangu an ashira? ¿Ndusha an? tárangana.

<sup>9</sup> Ashpatam tputs: Watatcha, týarusin, ashpatamsha tputs: Nduni. Nllitaritparee. Antaati neeja; tárangana. Itaru, wach mchussa tputs: Nuw watatana; kachi mchusamuni antana, tárangiya. <sup>10</sup> Tputssha: Ashiriya, ¿tamasha na napakshasha? ¿Tamayrishtish kcheetsish yararangsha? tárangana. <sup>11</sup> Wach mchussha: Isuscha kchishi tsarunpa pundayaru, nuwaa kungush k'pashini týaru, nuwsha kcheetsi kupayaruri, natsha wanasisri naparangi, tárangiya wach mchusa. <sup>12</sup> Tputssha: ¿Natuwa Isusuwa? týaru, wach mchussha ¿Yapimasaja? Yasareezi, tárangiya.

<sup>13-14</sup> Ashirucha, putamsha tputs wach mchusaa Parísiypanshuchip machtarangana. <sup>15</sup> Anush kuseersin, Parísiypanshuchee kamanirangana yuwaa Isusu kanusisush yararangu anootsi. Parísiypanshuchsha: ¿Tamayarush na napaksha?

atusin, wach mchusamunsha: Isus kchishi tsarunpa pundayaru, kungush k'pashini, táyaru, nuwsha kcheetsi kungush kupayaruri, natsha wanasireerangina, tárangeiya. <sup>16</sup> Táyaru, anumunsha Parísiypanshuchsha waanpatatin nambaptangat ashirangana; tsimbun chinarangana. Ashpatam: ¿Antaatiya Apanll Isusoo zanganirangeeja? nda. Waantari kapung ngichkiya, watam kanusisshutaa nda kanusku kizpureeru yarkuwa; atusin, ashpatamsha tputs: Nduni, antaati piyartach tputs ashimaam wanindaja, nda. Ndunnaa Apanll istaku, ashimaam pinasakiya, tárangeiya ashpatamta tputsi. <sup>17</sup> Táyarusin, wach mchusamunaatssha: ¿Shiy Isusoo amaksha? watam kcheetsi yararangu átshawa; týarusin, wach mchusamunsha: Apanllee kuk kamanimapanparee átana, tárangeiya.

<sup>18</sup> Ashiritaa, Parísiypanshuch mangoonamaam ngatarangsin, ¿Nitaati in mchusamunaja tputsi? ndambaree, tárangeiya. Ashirucha, waparee kuruzurangana wanireetstamta. <sup>19</sup> Kuseeru, mashirangana; ¿Kaapa watat shiy iparish? ¿Mang shiy uru nee wach mchusari tatsipurangish? ¿Na tamaysha napka? atusin, <sup>20</sup> waparsha: In watacha nuw ipari. Urutaricha wach mchusamun nllurtarangiya, tárangeiya. <sup>21</sup> Itaru, natsha napku anoo yasareezini, watam kchini nda paranginiwa. Mishat, ¿Chakamasaja yararang? atiniya. Yasareezini. Itaru, izuuru yasamaam zandkus, waanaatsi ipareetsi mashangtsa, watam wachinawa; waana kamanimaam waritariya, tárangeiya waparshita. Táyaru, waptam kanapurangiya. <sup>22</sup> Puniku, Isusumand

waneerundama átu, Isusoo nda kamanirangiya, watam Parísiypanshuch sirú wanichintspa, tárangeanawa. Tputs Isusoo istakchusin, Isusoo Apanllcha Ipusamarini tákchusin, iysha wanichinipa, tárangeanawa. Parísiypanshuch uru tputsee kapung niyramaam waneeranganaya. Ashirucha, tputs Isusoo tsiyatamaam kapung punirangana. <sup>23</sup> Anumandsha wapar kamapshirangiya. ¿Chakamasaja yararang? Ipareetsi mashkus, waana kamanchiya, tárangeiya.

<sup>24</sup> Ashirucha, Parísiypanshuchsha wach mchusamunaatsi yusur kuruzurangana. Kuseeru, Parísiypanshuchsha: Itsinsarush kamaningcha; ngutish Apanllee ngichinllpa, tárangeana. ¿Nitaati Apanll Isusoo zanganirang? nda; watam Apanllee kuk nda itsinsaru payukuwa; týarusin, <sup>25</sup> wach mchusamunsha: Anoo yasareezi, itaru minamari yasaktana; sirú kachi mchusamuntaa na wanasirsha napkina, tárangeiya. <sup>26</sup> Parísiypanshuchsha: ¿Isus shiyya tamaranga? ¿Tamayru kcheetsish yararang? atusin, <sup>27</sup> wach mchusamunsha yámku, tárangeiya; ¿Mayaama yusur kamanchee? watam siyya itsinsaru kamaniranginawa; tárange. ¿Mayaamsha yusur mazinapani átssa? ¿Isusoo mangoonpani átus nuwaa mashkis? Wipunasheem kinapani átis siya, tárangeiya wach mchusamuna. <sup>28</sup> ¡Maya! anoo mazinayarisin, kizpur tsiyantaranganaya; mantsiri tsiyatarangana wach mchusamunaatsi. Shiy yutarittishcha; shiy Isuspantamtishcha kuku. Itaru, iy Móysisarinee kuk, yuw Apanll kamachtarangu anootsimari chinakaniya,

tárangana. <sup>29</sup> Apanll Móysisarinpatini kaapa tsiyateeru, wirkareem tuyandarangiya. Itaru, ¿chakamasaja Isusoo kamachtarang? Iy yasareezini, tárangana. <sup>30</sup> Wach mchusamunsha: ¿Tamaysha siy Apanlee wirkari kapungtaa natstakus nda Isusoo yasaksa? ¿Tamaysha siy chakamasaja Isusoo kamachtarang átssa? tárange. Apanllshacha Isusoo kamachtaranginya, watam nuwaa kachi yararanguwa. <sup>31-32</sup> ¿Antaati sirútamastaati tputs wach mchusaa yartareeja zitaminarini? ndambari. Itaru, nllurtakchi anurita kachi mchustarangitaati, Isus kcheetsi yararanginya. Ndunnaa Apanll istaku, ashimaam wanindaja. Chiy nda Apanlee kuk itsinsaru payukuch, Apanllsha chiyaa nda mazinakiya. Itaru, chiy itsinsaru payukuch, Apanllsha chiyaa kis mazinakiya áttanicha. <sup>33</sup> Ashiriya, ndunnaa Apanll Isusoo waana kamachtarangu, ¿antaati nuwaa ashireeja; nuwaa yararanginya? ndambaree. Itaru, watam nuwaa waana yararanguwa; tárange. wach mchusamuna. <sup>34</sup> Kuraksha: Shiy yutaritshishimand kachish mchustaranguwa. Shiy yutaritpantishcha. ¿Tamarreeja shiy iyaa tayaspatachish? Wapa, zamangi; táyarusin, tununtarandsin, izuuru kapeet ashirangana.

<sup>35</sup> Sheersin, Isussha tsiyatsis yuwaa kapeetarangana anoo mazinayaru, wach mchusamunpat tsiyatpi átu nachungaranginya. Pakeeru, tárange; ¿Yuw tputseem kinarangu anoo shiy mangoonkish? táyaru, <sup>36</sup> wach mchusamunsha: Aa, mangoonpi atina. Apanll zanganirangu anoo yámandanda. Pakeeruri,

mangoonachshaparina, tárangiya. <sup>37</sup> Isussha: Watatana nuwaya; yuw tasasarish ani. Yuw shiyapat tsiyatki nuw watatana, tárangu, <sup>38</sup> wach mchusamunsha: Nuw shiyyaa mangoonkina; shiy Apanlltishcha Wipish, týaru, tutunlltayaru, Isusootssha ungirtarangiya. <sup>39</sup> Sheeru, Isus tputseetssha ichinguru, tárangiya; Nuw tputsee ipusamaam kusarangtana. Tputs Apanllee nda mangoonkitaatssin, wach mchuspaz ashiru taakitaatssin, nuwsha mangoo p'tseekchuri, mangoonchinllina; yarchinlinaya. Itaru, tputs mangutari Apanllee kapung yasaktaniya atitaatssin, nuwaa mangoonamaam ngatkusin, urutamari wach mchuspaz ashirusin nuwaam xarakshinlinaya, tárangiya Isusu. <sup>40</sup> Parísiypanshuchsha anush shaniyeersin, Isusoo kuk mazinayarisin, ¿Antaati iy mchuspaz ashiruni taakani? Iy Apanllee kapunguri mangoonkiniya, tárangana. <sup>41</sup> Isussha: Tputs Apanllee nduntaa mangoonku, itaru nuwaa mazinaku, nuwsha istachima. Itaru, siy kapunguri mangoonkini ngutis átssawa. Ashirucha, nuw siyaa istamaam pinasakina; siy yutaritshishush urutamari taatssa. Kamungcheezis ndambari, tárangiya Parísiypanshucheetsi.

## 10

<sup>1</sup> Itaru, nuwaa kuki kaapa mazinangtsa, tárangiya Isusu.\* Tputs opeejaa shuchipi átu wachunung pshtumaam nda zandkiya; mangu

---

\* **10:1** Esekiyela 34.32 tsiyatsis nipta tatsamooru taaritamta.

tandapunuzimun iwaz káreeru, pshtukiya. An tputs washchirtanda. <sup>2</sup> Itaru, opeeja chinumpani, opeeja amuyarini chinuzpan uru wachunungiri pshtukiya. <sup>3</sup> Pshtupi tákchu, ksutamapansha tawatchiya. Chinuzpansha pshtuyaru, waanaatsi opeejarineetsi suraa kuruz kuruz ashchiya. <sup>4</sup> Opeejsha wits mazinayarisin, chinuzpanush tachitatangatanll ashkanaya. Chinuzpansha machtayaru, yamazayaru, pastup machkiya kis katungumaama. <sup>5</sup> Tputsee piyartachee nda mazinakana; izuuru ngatkana. Piyartachee tputs kapung punirusin, mangu suwasuwatanganll ashkanaya. Piyartachee kuk nda mangoonkana. Nuw tputsiri ashikpaz uru ashtachinllinaya, tárangeiya Isusu.

<sup>6</sup> Tárangu, anoo k'kuz pindanaru kamaneeru, itaru tputstisin mangoonamaam pinasarangana.

<sup>7</sup> Ashiriya, Isus yusur tayaspataku, tárangeiya; Nuwaa kuki kaapa mazinangtsa. Nuwamari wach yapshtumapanpaz ashiru taarina Apanllshu. <sup>8-9</sup> Nuwamun Apanllush pshtukchu, waneeshee kamungchiya. Uru nuwamun kis taachiya. Apanlleem pishtats ndunshaparee. Itaru, nllitaritsha tputs washchirsincha. Wapchawsincha. An tputs Apanlleetsha tiptsiri ngichzee waneerangitaatssin, itaru Apanllsha tiptsir ngichzee yuwaa, tárangeana anoo nda mazinarangana; ngatarangana.

<sup>10</sup> Itaru, ngichimapan tputs yutaritcha. Shuchimaamari chinakana; pachamamari chinakana; kachingamamari zandkana. Itaru, nuwsha taarashee urutamash payupana aturi, kusarangtana. Apanllush kis taapanan aturi

istamamari chinakina.

<sup>11</sup> Napa: nuw chinuzpan tputs urkar tamapari ashiru taakina. Tputsireetsi istapi aturi, tsipaneetstaati pachindcheezi, ndambaree.\* Tputsireemi tsipachima. <sup>12</sup> Itaru, siy tputs chinuzpan muchchur tamapari ashirus kurikingazimari chinayarus tarawaztaksa. Yutaritshish tushiyku, ngutis punikpaz, misha suwakpaz ashkus nda tapachindaksa. Apanll tiptsiri yutaritshish pshtukchu, uwshtisin kiyung kachiykana. <sup>13</sup> Ashiritaa, siy istamaam nda chinaksa, watam kurikingazimari chinaksawa. <sup>14-15</sup> Itaru, nuw chinuzpan tputs tamapari wanasisrimshi ashiru taakina.\* Nuw Apapaa yasaktana; uwsha ashiritam nuwaa yasakiya. Ashiritam, nuw tputsireetsi yasakiya; tputsirshatana nuwaa yasaktamsina. Tputsireetsi kapung chinakuri, tputsireemi tsipachima. <sup>16</sup> Ashkachuri, tputsiri zapan taachiya. Nuw nllitaritaatstaa arapcheetstaa tputs tputsireemi ínachima. Uwshtisin nuwaa kuki mazinachtampasinaya. Ashkachu, tputsiri washunand minamaritpaz ashiru taachinllinaya. Nuwaantarisha ksutchima.\*

<sup>17</sup> Apap nuwaa kizpur chinakiya, watam waa kuk uru payukinawa. Ashiriya, nuwsha tputsireemi tsipachima. Tsipayaritaati, yusur támeeruri, taachina. <sup>18</sup> Saana zandkus nuwaa pachacheezis, ndambari. Itaru, nuwaana

\* **10:11** Mikiyasa 7.14 tsiyatsis nipta tatsamooru taaritamta.

\* **10:14-15** Salmo 23.1 tsiyatsis nipta tatsamooru taaritamta.

\* **10:16** Mikiyasa 4.6-7 tsiyatsis nipta tatsamooru taaritamta.

zandkuri, tputsireemi tsipayaruri, yusur támchima. Nuwaana ashimaam xapcheezi, ndambari. Ashimaam waritakina, watam Apap nuwaa kamachtaranguwa; tárangeya Isusu.\*

<sup>19</sup> Naayaranlluni, anumunsha Utaáshuch kurak yusur waanishtisin kuzizimunsha nambaptangat mang ashirangana; mangooz nda minamari chinrangana. <sup>20</sup> Ashpatam mang, tárangeana; Isus miroosinlltayaparee; Yashingleparee. Watsta; waani ántapa, mang, tárangeana. <sup>21</sup> Ashpatamsha: ¿Nitaati miroosinlltayaruch, anoo tsiyatarich? nda. Itaru, uw kuk kizpurcha, watam wach mchusaatstaa yararanguwa, mang, tárangeana.

Ashiri yuwaan Isus wach mchusaa yararangu, Utaáshuchsha kurak wand Isusoo ngatarangana anoo kamaneena.

*Mishat, yuwaan Isus yusur nuw Apanllpata tatsamootana, tárange anoo kamanchintspa*

<sup>22</sup> Minush zari iy Utaáshuchini shambatshisheem yusur shaniyarangtanicha Irusarinshu. Isus anshutam yusur pshturangiya. Diciembresh tsumpi uru shaniytariniya. Apanlee pang' pangurangini anoom shambatshisheem itupshingamaam anush shaniyaranganiya. <sup>23</sup> Ashirucha, Isus anush pshturangiya. Ningich watandaramaa kapung kapamummaa Salomona sirú yásamaranginiya. <sup>24</sup> Ashiri Isus anush xiytu, iysha kurakarini Isusoo iturpiranganaya. Tuxiykeerusin, ¿Mayaamsha iyaa nda wazareetsiri kamaniksha? tárangeana. Apanll tputsee waana

---

\* **10:18** Jeremiyasa 23.1-4 tsiyatsis nipta tatsamooru taaritamta.

ipusamarini iyaam istamaam zanganchiya. Kamapa shiy anneesha ashiru, ¿tamamshasha tputsish shiya? tárangana kuraka. <sup>25</sup> Isussha: ¿Wanipa nuw siyaa itsinsaru kamanirangi? Ashiritaa nuwaa nda mangoonaksa; ngataksa, tárangu. Nuw Apapamun wizpuririni tputsee yararangi anumun nuwaa yasamaam waritarangiya. <sup>26</sup> Anumun waritartaa, itaru siy nuwaa nda mangoonaksa; nuwaa ngataksa, watam nuw siyaa nda tputsirinawa. <sup>27</sup> Itaru, tputsiri nuwaanaatstamari kuki mazinakanaya. Mazinayarusin, nuwash tachitkanaya. Nuwaa yasakanaya; nuwaya tputsireetsi yasaktamana. <sup>28</sup> Nuwsha taarashee urutamashee panakina; ayamtaati kanatsipchazinllinaja, ndambaree. Nuw kizpur istakuri, ¿chakaja nuwaa itutsich? Urutamari ksutchima. <sup>29</sup> Apap tputsireemi wayarangiya. Nuw tputsiri tsapurunasshuchee ichinguru kasikanaya. Apapaa itutsimaam wanindtamtaja. <sup>30</sup> Ashirucha, nuw Aparpatich tatsamooriniya, tárangiya Isusu.

<sup>31</sup> Isus tárangu, kuraksha tsiyantayarusin, yusursha Isusoo pachayani atusin, patumbchee yarangana. <sup>32</sup> Itaru, Isussha: ¿Mayaamsha nuwaa pachamaam zandaksa? Apapat wizpuririni tputsee zapan istarangina. ¿Mayamand nuwaa pachapani átssa? tárangiya Isusu. <sup>33</sup> Kuraksha: ¿Antaati yuwamand wanasiри istarangish anumand pachakeezini? nda. Yuwamand: Nuw Aparpatich tatsamootana, átish anumand shiyya pachamaam zandkiniya. ¿Mayaamsha tputstaatish shaanaatsi Apanlleem ínaksha? Apanlee

yutaritam ínaksha shiya, tárangana. <sup>34</sup> Isussha: ¿Antaati apanllputseem nuwaanaatsi ínaki? nda; watam Apanll waanaatsi tamapari ashiru chiyaan ínakuwa. Apanll yandamarini watam atuwa; Siy nuw tamapari ashirus taaksa, tárangya Apanlli iyaatsi. <sup>35</sup> Ashiriya, ¿watam Apanllee kuk wandaritam payukinawa? Apanll yandamarini urutari taariya; nda pakchiyam mantsiriya. Sirútama zitamarineetsis anoo kamaneeru, tuyandarangya. Kirak zurumaricha yandama atiniya; pastamaam nduncha. <sup>36</sup> Ashiriya, watam Apap nuwaa waana kamachtayaru, ningeem tsapurunas zanganiranguwa. Zanganeeru, nuw tputseem kinarangina. Ashirucha, nuw ashkashina. Ashiri nuw Apanlltana Wipi, táranguri, itaru nuw nuwaanaatsi apanllputseem ínacheezi, ndambaree. <sup>37</sup> Mishat, Apapaa kuk ndunnaa payukuri, ¿ashiri tamaree Apapamun wizpuririni tputsee istachi? Ashkinaareena ashiru, misisina nuwaa ngatamaam waritakiya. <sup>38</sup> Itaru, watam Apapamun wizpuririni tputsee istaranginawa. ¿Mayaamsha anoo nda mangoonaksa? Nduntaatiya nuwamun mangis tatkus, ashiri ¿mayaamsha yararangi anumun nda mangis tatuksa? ¿Washa nda kachis parangis? Ashiriya, anuri chinangtsa. Yuwamun yarki anumun mangis tatkinaareesa, nuwaa yasachpasa. Anushparee nuwaa: Zuraktishcha; Aparpatich tatsamootishcha shiya, nuwaa tátssa, tárangya Isusu. <sup>39</sup> Táyaru, kuraksha yusur putayaruni tumaneeni táyarusin, Isussha shitungta naanata sheeranll ashirangya.

<sup>40</sup> Naayaranllu, yusur iyapa ipunuruni kungup

Ortagap naatarangani; kungoo kítaranganiya. Yap apuchirini sirútama tputsee ichumarangu amb kusaranganiya. Anush kapung taaranganiya. <sup>41</sup> Anush taaruni, tputssha zapanin Isusungaz kusarangana. Waanpatatin tsiyatkusin, Wangarini nduntaa wanguyaayararangu, itsinsaru kamanirangiya; ngichirangeeja, tárangana. Wangarini Isusoo kamanirangu an kuk ichinguru tatsameenlliya. <sup>42</sup> Ashiriya, Isus zurakcha Apanllcha Ipusamarini, týarusin, zapan mangoonarangana Isusootsi.

Ashiri kamaneena yuwaay Isus nuw Apanllpata tatsamootana, táranganoootsi.

## 11

*Mishat, yuwaay Isus Lásaroo ituyamarangu anoo kamanchintspa*

<sup>1</sup> Lásaru tputs sura yaktash Betaniyah taaranganiya. Uwsha kizpur kas yutaranganiya. An Mariycha wayuchi; Márat wayuchtamcha. <sup>2</sup> An Mariy watatamcha Isusumun kzammashhee tuchumarangu anu. Isusumun wats tuchumeeru, muchpata taching taching ashiranganiya. An watatcha Mariya áti anu. <sup>3</sup> Mariysha Isusup tsiyatssee zanganiranganiya. Ichee, wawari kas yutayaru, tsipamaam zandkiya, Mariy átcha tángcha; táranganiya. Wawareetsi Lásaroo watam shiy kizpur chinakshawa; áttanda tángcha; táranganiya Mariya. <sup>4</sup> Tputs Isusush arap tsiyatssee wayayashinu, Isussha mazinayaru, iyaatssha wipunasheetsini: Lásar tsipamaam zandkitaa, itaru watstamamari tsipacheeja, ndambaree,

tárangu. Itaru, Apanll nuwaa wizpuriri tputs pangpana átu ashtachpa, tárangiya. Nuw Apanlltana Wipi kizpureeruri, tputssha nuwaa chinachinllinaya, tárangiya Isusu. <sup>5-6</sup> Táyaru, anshuri Ortaganung kung taarangiya tsimbun zari; Mariyap nda musá naatarangiya. Isus Lásaroo kizpur chinarangiya maachirita tamapari ashirangiya. Lásaroo wizari kizpuritam chinarangiya.

<sup>7</sup> Anush tsimbun maayaruni, Isus iyaatssha wipunasheetsini: Pza naayaniya, tárangu. Utaáp tsap yusur pangani; tárangiya. <sup>8</sup> Iysha: Mayistoroo, ¿tamaree naachish? Singinasha shiyya pachamaam amb zandaranganawa; táranguni, <sup>9</sup> Isussha: Ashtaa pangani, tárangu. Apap yandamarini wand nuwaam pishtariya. ¿Ashiri tamari nuwaa musá pachachinllina? Kaschirish xiykuch, kamiran pakuch, pantsamaam wanindaja. Ashiritamcha nuwaam tsipani. <sup>10</sup> Itaru, psaan xiykuch, kachich nda pakuch, pantsamaam taariya. Ashiritam, psaanpaz ashiru nuw zariri tatsamkachu anush tsipachima, tárangiya; waanaatsi kamanku. <sup>11</sup> Ántarangu, Lásarootssha kamanku, Iy amikurini na maayanlliya; ashiritaa, ituyamachima; pza; tárangiya. <sup>12</sup> Iysha: Lásar maakinaariya ashiru waaniparee támchiya, tárangini. <sup>13</sup> Isusoo kuk mamarparanguni, manguparee kanuskiya atuni, tárangtanicha. Itaru, Isus Lásaroo watsipun kamanirangiya. <sup>14</sup> Ashiri táyaruni, Isussha: Nduni, ¿antaati mangu maakeeja? izuureeru tsipayanllu, tárangu. <sup>15</sup> Lásarush taarinaareeniya ashiru,

wanguyaa ituyamakchuri, siysa nuwamun pakich mangis tatkinaapsa. Itaru, na siyamun nuw mangi kischa, watam aranginasha yámandachinawa. Ashiri mikeeruni naayani, tárangeya Isusu. <sup>16</sup> Táyaru, Tomássha: Ashiriya, iysha wipunashini káchingayaruni, Isuspa naayani. Ambiri Isusoo pachakchusin, iysha ambiritam tsipamani tina, tárangeya. Tomás watatcha tsimbun iwipamash nllurtarangu anuya. Táyaruni, ichinguruni naataranganiya.

<sup>17</sup> Betaniyash yaktaa watsiritanasha, tputs Isusoo: Lásarurin na sirútaricha tspanllu. Kawinimun na tuchip zari maayanlliya, tárangeya Isusootsi. <sup>18-19</sup> Ashirucha, natamatam zar iy Utaáshuch kurakarini Mártaš naparangana; istamaam nizpurtamaam kusarangana. Irusarinush káyarandsin, Mártaš naparangana, watam nda arapiwa.

<sup>20</sup> Ashiriya, tputssha Isus naanchpa; táyaru, Máratsha mangush chinayaru, ngootsush Isusoo chamayangati átu shitungarangiya. Itaru, munsha Mariya nda mazinaru taarangiya. <sup>21</sup> Máratsha Isusootssha: Shiy urutanaari nish taarush, shiynaariya wawareetsi yararangpasha. Nishurtanaari taarush ashireeja wawari tsiparang, <sup>22</sup> watam shiy Apanllee mashkush, shiyaa uru Apanll mazinakuwa, tárangeya Márta. <sup>23-24</sup> Isussha: Itaru, wawarish yusur támchiya, tárangu, Máratsha: Zuraktishcha, zapish tsapurunas pastakachu, waana Apanll yusur ituyamachiya, tárangeya. <sup>25</sup> Isussha: Mazinangcha: nuw ituyamampantana; taarashipantana nuwaya, tárangu. Tputs nuwamun mang' tatku,

wanuts tsipartaa, nuwsha anoo ituyamachina.  
 26 Ituyamakchuri, ayamtaatiyam an tputs yusur tsipacheeja, ndambaree; nuw anoo tputs yashingup kanatsipcheezi, ndambari. ¿Anoo mangoonkish shiya? tárangiya Isusu. 27 Máratsha: Aa, Isusoo, uru shiyaa mangoonkina, tárangu. Nuw shiyaa yasaktana. Shiy Apanlltishcha Wipish. Shiy watatishcha Apanll Īpusamarini iyaam tapachindamaam zanganchiya atiniya shiy ántishcha, tárangiya.

28 Tárangu, munaa kuruzkatu waptam kanapurangiya. Munaatssha: Apchee, iy mayistorurini kuseencha. Naani átcha shiyaatsi, tárangiya Márta. 29 Mariysha anoo mazinayaru, musásiritam shitungeeru, Isusungaz naatarangiya. 30 Isus wandaritam ngootsush kutarangiya yuwash Mártaa chamayangarangu anshu. 31 Ashirucha, Mariy mikeeru shitungeeru, kuraksha tachitarangana. Mangush chinarangusin, Wayuchiningazparee tanukatiya. Mapshiship napkatiya; tuwizpurtamaam istayani, atusin, tachitaranganaya.

32 Isusoo chamayangayaru, tasaseeru, tutunlltayaru, Isusootssha tsiyatku, Isusoo, istanda. Shiy urutanaari nish taarush, shiynaariya wawareetsi yararangpasha, Mariy, tárangu. Nishurtanaari taarush ashireeja wawari tsiparang, ndambari, tárangiya. 33 Mariya mang' kizpur mantsarangu, kapung tanuranginya wayuchinangzi. Kuraksha tanurangitamsina. Anumunsha Isus mang' kizpur mantsarangitamta. 34 Isussha: ¿Yap

wayarangsa? tárangu, Mariysha: Naani, yámandachinllpa, tárangana. <sup>35-36</sup> Tárangusin, Isus tanurangitamta. Kuraksha: ¡Maya! ¿tamaru Lásarurineetsini chinaka? tárangu, <sup>37</sup> nllitaritsha tputs ¿Tamashta kizpuritaa chinaku nda istarang? ¿Watam wach mchusawaatstaa yararanguwa? ¿Tamasha xapooranga? táranganaya.

<sup>38</sup> Itaru, Isussha wandari mang' mantsaru, mapshiship naatarangiya. Anush kuseeru, patumbichpat wachoo kámanaru parangiya Isusu. <sup>39</sup> Isussha: Patumbich tawatangints, táyaru, Máratsha: Watsta. Tsipar kpuneechparee. Watsitparee, watam na ipunpunar zar maayanlluwa; tárangiya. <sup>40</sup> Isussha: Watsta tárinllpa. Nuwamun mangish tatungcha. Ashkinaareesha, Apanlee wizpuririni pangachsha, watam táranawa, tárangiya. <sup>41</sup> Ashirucha, tputssha patumbchee tawatarangana. Isussha kanindapsha napeeru, Apanllpat tsiyatarangiya. Apaa, watam shiy nuwaa uru mazinakshawa mashki anootsi, tárangu. <sup>42</sup> Ashiriya, shiy istangandama tina. Nuw shiyyaa izuuru yasaktana. Ashirucha, in tputs nuwaa mangoonpana aturi, na shiyyaa mashkina. Shiyyaa kizpurirish pakchusin, nuwaa; Zuraktishcha: Isus watacha Apanll kamachtarangu anu, táchinllinaya aturi atina, tárangiya. <sup>43</sup> Tárangu, k'kuz zunganeerangiya. Zuwaal Lásaroo, naani; shtungangi; tárangu, <sup>44</sup> Lásarsha shitungta ashirangiya. Shitunggeeru, wandari wats kuripamaw, uw kuripamaw, wanuts ichinguru kuripamaw, muchsha kuripamawtam ashiru shitungarangiya.

Shitungaramchu, Isussha: Tapureerus ksangints; táyaru, tputssha tapurirangiya.

*(Matiwa 26.1-5; Márkosa 14.1-2; Lukasa 22.1-2)*

<sup>45</sup> Kurak zapanin anoo parangana. Yuw kurak Mariyaa istakatana an Lásaroo parangana. Anoo pakeersin, Isusumun mang' taturangana. <sup>46</sup> Itaru, minu parangitaatssin, tsiyantayarusin, Irusarinap Parísiypanshuchee kamankatssin kanapurangana. <sup>47</sup> Tsiyatssee mazinayarasin, iy Utaáshuchini kurakarini ichinguru shaniyarangana. Parísiypanshuchpata, apanllpanpata urkari ichingurusin shaniyarangusin, ¿Tamaycheezich? watam Isus tputsee kapung tpuxtakuwa; mang, tárangana. ¿Wizpurini waninlli? Tputsee yariyartar ashkuwa; tsipareetstaa ituyamakitamtawa. <sup>48</sup> Ndunnaa Isusoo tuxarakuni, ¡maya! tputs káchingarsin mangoonchapsinaya. Sheersin, Romshuchsha tsiyantayarusin, iyapa Utaáshuchpatini waratachpasinaya. Iyaatssa izuuru kasikchusin, Apanlee pang' kapeetkatssin, Utaáshucheetsini kachingachpasinaya, mang, tárangana waanpatatina tsiyatkusina. <sup>49</sup> Káyapasarin anpuru apanllpan urkarimuncha. Ashirucha, tsiyatku mang, tárange; Siy mangis ndunparee. <sup>50</sup> Mazinangandama; ¿Mayaamaja tputs ichinguru tsipach? Minamari tputsee pachakchuni, uwsha tsipakchu, tputs ichingarisha kamungchinllinaya, mang, tárangeiya Káyapasarin.

<sup>51</sup> Nuwsha Wangi na yandakuri siyaa atina; Káyapasariní nda waana chinayaru tsiyatarangiya. Apanll waana apanllpaneem urkari ínayaru, tutsiyachtarangiya. Isus iyaam Utaáshuchemani

kamungshishee wayarangiya Apanlleema átpaz ashiru, tárangiya. <sup>52</sup> Itaru, Isus iyaamamtaja kamungshini wayarang, nda. Ichinguroom tputs kamungshini wayarangiya; tsapurunaschicheem ztaru ashirangiya. Ashkachu, Apanll tiptsir washunandari minamaripaz ashiru taachinllinaya tashina nuwaya.

<sup>53</sup> Ashirucha, Káyapasarin anoo, tárangu, kuraksha ichingurusin minamarisha mangooz chinrangana; Isusoo izuuru pachayani, tárangana. <sup>54</sup> Anumuna Isus anoo yasayaru, Utaásh tsap nda kamiran xiyrangiya; waanaatsi pishurangiya. Ashirucha, anoo tsap kasayaru, nllitaritapsha tsap naatarangiya. Yaktanung Efrayinanung taaranganiya. Anush iyapat wipunashini taaranganiya. An tsap puza; sin nda sinakiya. Anush pakich taarangani.

Watamcha tsiyatsis yuw Isus Lásaroo ituyaramangu anu.

*Mishat, yuwa Isus waanaatsi watsipun nda pachindku, Irusarinap naatarangu anoo kamanch-intspa*

<sup>55</sup> Na shambatshish yuw Ijiptoo tsap shitungarangana an zar pakchimsha pishtaru, tputs zapan Irusarinap wasina naataranganaya. Uru wasina naatarangana waanaatsi yaramaama; wanasisiriri pshtumaama. <sup>56-57</sup> Ashirucha, tputs Irusarinush kuseersin, tsiyatssee mazinarangana; kurakaa kuk mazinarangana. Kurak, tárangeeja; Isusoo pakchus, iyaatssha kurakaatsini kamanishintsa, putapani tiniya, tárangiya kuraka. Isusungaz

Apanllush pang' nachungarangitaatssin,  
 itaru natumasana Isusoo naxpoorangana.  
 Waanpatatin tsiyataranganaya; ¿Tamachimasaja?  
 Nitaati Isus kuscheeja, ndambaree, tárangana.

## 12

(*Matiwa 26.6-13; Márkosa 14.3-9*)

<sup>1</sup> Ashiriya, minam matayaru maats shambatshish yuw Ijiptoo tsap shitungarangana an pakchimsha pishtaru, Isus yaktap Betaniyap napkatu naatarangiya, yuwashtam Lásaroo ituyamarangu anshutamta. <sup>2</sup> Tputsshha Isusoo yambirangiya. Lásarootstam yambirangiya. Tputseetstam zapan yambirangiya. Isusoo chinakusin ashirangiya. Anush pshiyrarutarusin katungaranganiya. Máratsha mbasamapaneem taarangiya. <sup>3</sup> Anush pshiyrarutaruni, katungkuni, Mariysha kzammashhee arap waritaru anoo yáyaru, Isusumun ichumarangiya; watsimuntam ichumarangiya. Sheeru, waanpata much Isusoo wats tachingchingtar ashirangiya. Sheeru, pangusush ichinguru kizpur kzam tuparangiya, watam kizpur kzammashiwa; nartupat wach tinama. <sup>4-5</sup> Utaásarinsha: ¿Mayaamsha kzammashhee ngutish itsaniksha? tárangu. ¿Mayaamsha nda paxanxaksha? ¿Kurik putayarush, tputseem pukireem nda ngutish panaksha? ¿Watam kurikeem tarawaztakuch minam masach waritakuwa? tárangiya Utaásarini. Utaásarin Isusumuncha wipunashi; itaru yutaritcha. Watacha Isusoo tamapingarangu ancha. <sup>6</sup> Utaásarini kizpur washchirimuncha. Iy wipunashini kurikireetsini mapuyaruni,

wayaranguni, Utaásarinsha kurikpan taarangiya; ksutarangiya. Itaru, uwsha uru mangu yat yat ashku, kurikirineetsini mangu shuchirangiya. Ashiriya, pukireem panangcha mangu, tárange; waama shuchipi átu, tárange. <sup>7</sup> Itaru, Isussha: Watsta, tamundarinllpa; waani payuchpa, watam nuwaam kzammashée wayaranguwa;\* tárange. Na musásshapa tsipachina. Mariya, Isusoo wanuts mapumaam wasina yareena, táchiya nuwaatsi. <sup>8</sup> Itaru, pukir tputs uru siyash taariya. Itaru, natum nuwaa ungirtaku ashkiya, watam nuw musá tsipachinawa; tárange Isusu.

<sup>9</sup> Irusarinshuch tputs wazapan tputs Isusoo napani atusin, Betaniyap iripuranganaya. Isusoo napamaam zandamana zandaranganaya; itaru Lásaroom kapung nashamangani, tárange, watam Isus Lásaroo ituyamaranguwa. <sup>10-11</sup> Ashirucha, tputs iyaa Utaáshuchee kurakaa kasayarusin, Isusoo mangooneersin, Isusush tachitarangana. Anumand kurak kizpur tsiyantayarusin, Lásarootstam pachamaam zandarangana.

(*Matiwa 21.1-11; Márkosa 11.1-11; Lukasa 19.28-40*)

<sup>12</sup> Putamsha tputs zapan shambatshisheem yuwaa Ijiptoo tsap shitungarangana anoo itupshingamaam Irusarinash kusaranganaya. Anush taarusin, tsiyatssee mazinarangusin, Isus naanchpa mang atusin, mang' kis ashirangana. <sup>13</sup> Yarinll tamapari ashiru pakich katupeersin,

---

\* **12:7** Isáysa 61.3 tsiyatsis nipta tatsamooru taaritamta.

Isusoo chamayangani atusin iripurangana;  
zamangarangana.

Apaa, iyaa izuuru tapachindangcha.

Iyaa wanasiри taamaam istangcha.

Shaana ipusamarineetsish iyaam zangankush  
wanasiri napangcha.\*

Watatishcha iy Utaáshuchini kurakarini shiya.

Ashirucha, shiyaa kis ungirtakaniya,

ákamach ashirangana. <sup>14</sup> Isus burroo yamayaru, anumun k'xinnatach ashirangiya. Apanllukuk watam wirkarish anoom wasina kamaniran-guwa;

<sup>15</sup> Irusarinshuchis, mazinangtsa.

Punirintspa; siy kurakaris naanchpa.

Burroo wip yamayaru,

anumun karupanamun ush kuxinaru kuschiya,\*  
tárangya Apanlli. <sup>16</sup> Iy wipunashini anoo paranguni, natumasa nda kaapa mangoonarangani. Itaru, zapish uru Isus Waparip kanapuramchu, iysha anush man-goonarangtanicha. Mangeetsini p'tseeranguni, Apanlee kuk chinaranguni, anush, Maá, zurakcha: watacha tputs sheenllu; Apanlee kuk tatsamooranganaya, táranginiya.

<sup>17</sup> Sirútari zapan tputs Isus Lásaroo ituyamarangu anoo parangana. Pakeersin, tsiyatssee Irusarinush izapanirangana.

<sup>18</sup> Anumun tputssha: Apanlleerupari ashkiya, atusin, punirustayarusin, Isusoo kis naparanganaya; kurakaam ínamaam

\* **12:13** Nishuri yuwartatam Salmo 118.25-26 átu atitamta.

\* **12:15** Nishuri yuwartatam Sakáriyasa 9.9 átu atitamta.

zandarangana. <sup>19</sup> Parísiypanshuchsha anoo pakeersin, waanpatatin tsiyatarangsin, Napangtsa; tputs ichingurusin Isusush tachitkana. ¿Tamaycheezich? mang, tárangana waanpatatina.

Ashiri yuwaa Isus Irusarinap naatarangu anoo kamaneena.

*Minootssha kamanchintspa; yuwaa iy Utaáshuch kurakarini Isusoo ngatarangtaatssin, arapich tputs Isusoo mangoonamaam zandarangana anootsi*

<sup>20</sup> Arapich tputs Utaáshucheem kinayarusin, Irusarinush kusatarangtamanaya shambatshishee itupshingamaama. Apanlee ungirtayani atusin kusarangana. <sup>21</sup> Ashirucha, Felipaa nachungarangana, watam Felipaa yasaranganawa. Uw watsapun Galileyanung taarangiya. Galiley watacha Felip watsapunu. Felip watacha yaktashchi Betsáyanshuchi tputsi; Isustam wipunashi. Ashirucha, Felipaa yasarsin, Pakeersin, Zuwa, Isusoo pakeeruni tsiyatpani tiniya. Ashiri yámandangasinda, tárangana. <sup>22</sup> Táyarusin, Felipsha Ándarisaatssha kamanirangiya. Sheersin, ipuneersin Isusootssha kamankatssin, arapcheetssha macheerandsin yámandarangana. <sup>23</sup> Isussha: Na in Apanll yandamarini nuwaam tatsameenllcha. Nuw tputseem kinaranguri, natsha ichingurusin nuwaa chinachinllinaya; nuwaa kizpur ungirtachinllinaya. <sup>24</sup> Niri mangoonangtsa; warusaa wach ndunnaa tatsumkuch mangu taachiya. Itaru, tatsumeeruch, kanuchayaru,

kxooneeru, kapung yasikiya; izapaneekiya. Ashikpaz ashiriya Apanllee mangoonamaama. <sup>25</sup> Tputs waanaatsi watsipunoo pachindku, waanaatstam taárash chinaku, yashingupparee taárashhee kanatsipchiya. Itaru, natumasa waanaatsi taárash nda chinaku, nuwamun kamini watsipunootstaa nda pachindku, uru kamungchiya Apanlleema. <sup>26</sup> Ashiriya, nuwash tachitamaam zandkinaareesa, nuwaa kuki izuurumamari payungtsa; pzirintspa. Ashkinaareesa, washunandari nuwapa nuwash kizpur taatssa; Apapsha siyaa kizpur chinachiya, tárangeiya arapcheetsi tputsi.

<sup>27</sup> Táyaru, Waparpasha tsiyatarangiya; Apaa, naturi mangi kizpur mantsakina zansimuna. ¿Tamachimasazi? Apaa. Itaru, tsipaneetsi itutsingandama nuw shiyyaa táchheezi, ndambari; watam shaana nuwaa zanganirangshawa tsipamaama. Ashiriya, tputseem tsipachima, Apaa; nuwna tsipaneetsi pachindkeezi, nda. <sup>28</sup> Itaru, Apaa, nuwamun tputs shiyyaa uru chinachinllinpa; tárangeiya Isusu. Táyaru, tsiyatsis kanindap kizpur kimarangiya. Apanllsha, tárangeiya; Shiyamand tputs nuwaa chinakana. Aranginasha nuwaa chinachinllinaya, Apanll, tárangeiya Isusootsi. <sup>29</sup> Tputssha anoo mazinayarulin, ashpatam: Kariypari kariytarangiya, tárangeusin, ashpatam: Nduni, Apanllparee wasundurur tsiyatkiya, tárangana. <sup>30</sup> Itaru, Isussha: Nuwaamaja Apari tsiyatak, nda. Siyaam nuwaa mangoonap átu Apari tsiyatarangiya, tárangeiya. <sup>31-32</sup> Tputs nuwaa yasinamun

itsireersin, tsapurunasshuchee ichinguru kasichima; nuwaa mangoonkinaareesinaya, nuw tputsireemi ínchima. Arapchitaa tputs nuwaa mangoonchinllinaya. Yashing' sirú uru tputsee kasirangitaa, itaru nimun nuwamari kasiyaruri, yashingo kapeetchima, watam tputseem kinaranginawa; tárangeiya Isusu. <sup>33</sup> Isus anoo átu, yasinamun tputseem tsipachima átu, tárangeiya. <sup>34</sup> Ashiriya, táyaru, tputsha: Apanllparee Ipusamarini, tárangini shiyaatsi. Itaru, iy tayaspatampanirini iyaa tayaspataksin, Apanll Ipusamarini kuskachu, urutamari taachiya; tsipacheeja, átssincha. Itaru, shiysha: Nuw tputseem kinaranguri, na yasinamun tsipachima, tárangesha. ¿Mayaama tputseem kinarangina átsha? ¿Chakanasha shiya? tárangeana Isusootsi. <sup>35</sup> Isussha: Nuw Apanlleem tuwasineempantana, tárange. Natumasam siyaa mangis tuwasineekpaz ashkina. Ashiriya, ndatuma nuw naachuri, nuwaa kuki mangoonangtsa; naturi in mangoonangtsa. Ndunnaa ashkus, mangishis tunimpaz ashiru taachiya. Sheerus, izuuru tunimush masatkachus, yashingupparee naatssa. <sup>36</sup> Ashiriya, naturi nuwaa kuki mangoonangtsa. Ashkachinaareesa, 'sinishpaz ashiru taatssa; tputsireemi kinatssa; tárangeiya Isusu.

Ashiri yuwaar apach tputs Isusoo mangoona-maam zandarangana anoo kamaneena.

*Minootsha kamanchintspa; yuwaar Utaáshuch kurak Isusoo izuuru ngatarangana anootsi*

<sup>37</sup> Isus nuwaa mangoonangtsa, tárangeita, ashiritaa ngatarangana. Tputsee zapantaa

yarta yarta ashirangtaa, tputs wach anoo parangitaatssin, ashiritaa mangoonamaam ngatarangana. <sup>38</sup> Apanllee kuk tatsamoorangiya, watam Apanllee kuk kamanimapan, Isáysarini suru, wasina, tárangeuwa;  
 Kitsiptini mazinrarangini, anoo kamankuri,  
 tputssha anoo k'kuz mangoonamaam nda zand-chinllinaya.

Apanllsha Taarashipan wizpuree yámandarangu, ¿chakaja anoo mangoonach?\*  
 tárangeuwa Isáysarini. <sup>39</sup> Tputs waana ngatarangsins, Apanllsha xarashee wayarangiya; ashirucha mangoonamaam pinasarangana. Isáysarini wasina anootstam kamanirangya. Tárangeuwa;  
<sup>40</sup> Siyaa mangeetsis tamiroosinlltakchuri, kitseetstamtis tamirkachuri, kcheetstamtis kámanakchuri, siyaa ¿tamareeja mangoonchis?  
 ¿Antaati mazinacheezis?  
 ¿Nitaati pangcheezis? Ndambaree.

Mangoontapa, siyaa aturi,  
 nda siyaa yaramaam zurampatari zandkina,\*  
 tárangeuwa Isáysarini. <sup>41</sup> Isáysarini sirútama tárangeuwa, itaru yuwaa Isus ashtachu anoo wasina kamanirangya. Yuwaa Isus tsipayaru, yusur támeelu, Waparip kanapchu anoo ichinguru wasina kamanirangya Isusootsi. <sup>42</sup> Ashirucha, iyashuch Utaáshuch kurakarini zapantaa ngatarangsins, itaru ashpatam Isusoo mangoonarangana. Mangoonarangtaatssin,

---

\* **12:38** Nishuri yuwartatam Isáysa 53.1 átu atitamta. \* **12:40**  
 Nishuri yuwartatam Isáysa 6.10 átu atitamta.

itaru kamapshirangana; nda wazareetsiri Isusoo mangoonaktana nda, tárangana. Parísiypanshuchee puniksin, natsarundama atusin, tputs nuwaa niyrundama atusin, tpazarundama atusin, Isusoo kaapa nda chinarangana. <sup>43</sup> Waanpatatin chinarangana. Uru tputs nuwaa wanasiri chinapanda atusin, Isusoo nda izuuru chinarangana. Apanlimari kis nuwaa chinapanda nda, tárangana.

<sup>44</sup> Anumuna Isus kuk kizpur tsiyatarangu, Nuwaa kuki izuuru mazinangtsa; kaapa mangoonangtsa; tárangu. Nuwaa mangoonkus, ¿antaati nuwaatsimtaja mangoonchis? yuw nuwaa zanganirangu anootstam mangoonatssa.

<sup>45</sup> Nuwaa kaapa yasakinaareesa, Apapaatstam yasatssa, watam nuwaa zanganiranguwa.

<sup>46</sup> Tputs nuwaa mangoonpana aturi, tunimush taarusinapa aturi, Apanlee yasapana aturi, nish tsapurunasush kusarangtana. Tputsee mang' tuwasineekpaz ashiru p'tseekina Apanlee mangoonamaama. <sup>47</sup> Tputs nuwaa kuki mazinamana mazinaktaa, itaru nda payuku, ashiritaa nuwsha anoo tputs nda wanichina. Waanamand chayarini waneeshiship naachiya.

¿Antaati nuw wanimaaam kusarangeezi? nda. Kamungshisheem wayapi aturi kusarangina. <sup>48</sup> Tputs nuwaa ngatku, nuwaa kuki nda payuku waani yachchinllinaya waneesheetsiya. Apanll wanimaaam kuskachu, tputseetssha: ¿Isusoo

kuk shiy tamarangsha? táchiya. Ndunnaa mangoonku, waneeshishish wayachiya; kizpur wanichiya. <sup>49</sup> ¿Nitaati nguti ateezi? nda. Apap nuwaa zanganirangu, nuwaa kuki kamanishini

táyaru, anuritam nuw siyaam kamankina. <sup>50</sup> Apap kuk kizpurcha. Anuri payukuch, urutamari taachchi; ayamtaatiya waneeshishush nda taachchi táshina. Ashirucha, yuvari Apap nuwaa kamachtarangu anootsiritam siyaa kamankina. Ashirucha, kaapa mangoonangtsa atashina, tárange Isusu.

Ashiri yuwaan Utaáshuch kurak Isusoo izuuru ngatarangana anoo kamaneena.

## 13

*Yuwaa Isus waptam Waparip kanapurangu anoo apinll kamanchintspa*

<sup>1</sup> Isus waanaatsi iyaa tiptsireetsini kizpur chinariangiya; iyamand watsipunoo nda pachindarangiya. Waana uru wasina yasarangu, putam zari tsipamaam waritarangiya. Watam anush zari yuwaan Ijiptoo tsap shitungarana anoo uru chinarianganawa. Apanll yandamarini Isusoom tatsamoorangiya. Anumun Isus tsipayaru tsaprunasee kasayaru, Waparip kanapumaam waritarangiya wamari kasimaama.

*Yuwaa Isus naattuch psaan putatssin, iyaatssha wipunasheetsini kapung waneerangu anoo kamanchintspa*

<sup>2</sup> Ashirucha, Isus iyapa katungumaam shaniyarangani. Itaru, yuwaan yashing' uru mangush chinayaru, Utaásaa tamapingampaneem ínchima, tárange, anoo Isus yasarangiya. Utaásarinini watacha Simorini Iskáriyotarini wipa. <sup>3</sup> Ashiritaa, yashing' Isusoo nda kasimaam waritarangiya. Apanll Isusumun mang' taturangiya, watam

waana tsipamaam zanganiranguwa; misha, Isus wamari kasiyaru, waptamta Apanllip kanapchu anoo Isus ichinguru yasarangiya.

<sup>4</sup> Isus kizpuritaa kurakamuntaa taarangu, m'chach tamapari ashiru kinarangiya. Anush katungkuni, Isus chiyzayaru, wamareetsi tuwapimashee tusheeru, chirikootssha maxarangiya. <sup>5</sup> Sheeru, kung mbandeejush zaw sheeru, anoo yáyaru, iyaatssha k'tseetsini kupata, sheeru chirikpasha tachingta, ashirangiya. <sup>6</sup> Sheeru, Pitorootssha: Shiyaatssha kutsish kupachima, átu, Pitorsha: Isusoo, ¿tamaree shiy kurakish nuwaa kutsi kupachish? Watsta, tárange. <sup>7</sup> Isussha: Watsta tárinllpa. Shiy nda yasarish. Naturi nda mangoonkish; itaru zapshina yasachpasha, tárange. <sup>8</sup> Pitorsha: Watsta; ayamtaati nuwaa kutsi kupacheezish shiya, ndambari, týaru, Isussha: Ndunnaa nuw shiyaa ashkuri, ndunnaa shiyaa tachingchingtar ashkuri, nuwash nda izuuru tachitachsha; tputsireemi ndusha taachsha, tárange. <sup>9</sup> Pitorsha: Ashiriya, nda kutseetsimti kupachsha, Isusoo. Mucheetstamti, kuweetstamti ichumanda, týaru, <sup>10</sup> Isussha: Chiy chumakuch, minllurich nduncha. Kutsimtich ngootsush naakuch tsaruntakiya. Siy ichingurus chumamcha; minlluris nduncha. Itaru, minam tputs taariya minllurpatarta, tárange Isusu. <sup>11</sup> Tamapingampanee yasayaru, anoo, tárange Utaásarineetsi. Ashirucha, anumun, Minlluris nduncha. Itaru, minam tputs taariya minllurpata, tárange.

<sup>12</sup> Ashirucha, týaru, iyaatssha wipunasheetsini

k'tsini ichinguru kuparangiya. Kupam iwipayaru, yusur tuwapimashee kamartayaru, yusur katungumaam pshiyrayarangiya. Pshiyrayaru, Isussha: ¿Ashirangi anoo kaapa mangoonkis siya? átu, iysha: Dancha, tárangini. <sup>13</sup> Isussha: Siy nuwaa mayistoroo átssa; siy kurakaam yásamaksa nuwaatsi, tárangu. ¿Nitaati nuw m'chachoozi? Ashiritaati, nuw siyaa kutsis kuparangina. <sup>14</sup> Ashirucha, nuw kuraktaati, mayistorutaati, ashiritaati m'chachpaz ashiruri kinarangina. Ashiri siysa ambtam shingtamtса; saanpata istangtsa Apanllee mangoonamaama. <sup>15</sup> Nuw siyaa wanasiri yaspatakina; ashiriya nuwash tchitangasindama. <sup>16</sup> Nuwaa kuki kaapa mazinangtsa; niri chinangtsa. ¿Nitaati m'chach upaturunarineetsini kasikeeja? nda. Kurak tputsee kamachtaku, ¿nitaati waa kuk kapeetamaam waritareeja? nduni. <sup>17</sup> Ashiriya, na nuwaa kuki mazinayarus, izuuru payungtsa. Ashkinaareesa, urutari kis taatssa.

<sup>18</sup> Itaru, nuw siyaa nda ichinguroom áti, watam tputs nish yutarit taaruwa. Siyaa wanaśirimsheem ipusarangina. Wanaśirimshee tputs yasaktana. Yutaritamashee tputs natstaktamana. Apari kuk watam atuwa;  
 Tputs shiyapat katungchiya. Ashiritaa, shiyaa kiyung yachachiya,  
 Apari, tárangya nuwaatsi. <sup>19</sup> Naturi siyaa wasina kamankina, nduma yutaritshish tushiychu. Ashkachu, siy nuwaa; Ma, zurarangcha; Isus Apanllcha Wipa; Apanlliritcha, tátssa nuwaatsiya. <sup>20</sup> Mazinangtsa; nuwaa kuki mbizarintspa; Nuw siyaa zangankuri, tputssha siyaa kis

chinakinaari, nuwaatstam kis chinakiya, watam nuw zanganiranginawa. Tputs nuwaa kis chinaku, Apapaatstam kis chinakiya, watam Apap nuwaa zanganiranguwa; tárangiya Isusu.

(*Matiwa 26.20-25; Márkosa 14.17-21; Lukasa 22.21-23*)

<sup>21</sup> Ántarangu, anamunsha sheeru, mang' kizpur mantsarangiya. Mang' mantsatsaw ashku, iyaatssha wazareetsirisha: Itsinsaru siyaa kamanchintspa, tárangiya. Nish tamapingampan minam taarcha; yuw nuwaa tamapingachu anu, tárangiya Isusu. <sup>22</sup> Iysha yaanpatatini nap nap ashkuni, natstamaam pinasarangini. Mangishini chinakuni, ¿Chakaatsta át? ¿Chakshta tamapingach? tárangtanicha.

<sup>23</sup> Anush pshiyrarutaruni, katungkuni, nuw Isusunungiri mangunung pshiyrayarangina, watam Isus nuwaa kizpur chinaranguwa. <sup>24</sup> Ashirucha, Isusunungiri

pshiyraruri, Pitorsha uwpat tusum tusum ashku, nduntaa tsiyatku, nuwaa, tárangiya; Isusoo mashangi shiya. ¿Chakaatssha átsha? tángi; tárangiya. <sup>25</sup> Ashiriya, nuwsha Isusumunari

kandaneeruri, kazamburangina. ¿Chakaatssha shiy átsha, Isusoo? táranguri, <sup>26</sup> Isussha; Katungats masamurush pshtayaruri, tputseem panachima. An watacha yuw tputs nuwaa

tamapingachu anu, tárangiya. Táyaru, pangaa yáyaru, masamurush pshtayaru, Utaásarineemsha Simorini wip panarangiya. <sup>27</sup> Ashiriya, Isus panayaru, Utaásarinsha yáyaru, katungaranginya. Katungeeru, anumunsha Yashing' Utaásarinshini izuuru pshturangiya.

Sheeru, Isussha: Utaásaa, yuw mangishish chinakish anuri

shingcha; zapshtarinllpa; tárangiya. <sup>28</sup> Iysha anoo mangoonamaam pinasarangtanicha. Tárangu anoo iy yasarangeezini. <sup>29</sup> Utaásarin kurikee ksutarangu, Isus kamachtarangu, Katungats shambatshisheem pxanxashini; Isus tárangparee, tárangtanicha. Nduntaati ashiru, Kurik pukireem panashini; tárangparee yaanitari mangishini chinakuni, táranginiya. <sup>30</sup> Ashiriya, Utaásarinsha pangaa katungeeru, musásiritam shitungaranginya. Tunimush psaan shitungaranginya.

<sup>31</sup> Utaásarin shitungaramchu, Isus iyaa, tárangiya; Nuw tputseem kinaranguri, nish tsapush kusarangtana. Kamungshisheem tputseem wayapi turi kusarangtana. Natsha nimunuri tputs nuwaa yasachinllinaya; nuwaa chinachinllinaya. Sheersin, Apapaatssha nuwamun chinachinllinaya. <sup>32</sup> Anumun Apanll nuwaa kizpur kurakaam ínchiya. Musásiri ashchiya; zapshtacheeja, ndambaree. <sup>33</sup> Ashkachu, naachima; musásiritam kazuruchima. Nuw siyaa kizpur chinakina. Ashiriya, naakchuri, siy nuwangaz kizpuritam zandatssa. Itaru, yap naachi amb siy naamaam pinasaksa. Sirú siyaa kurakareetsis anoo, tárangitamti, natsha siyatstam atina. <sup>34</sup> Ashiri naachima. Naturi siyaa waneekuri, nuwaa kuki kaneeschi payungtsa; saanpata chinangtsa tina; natsashish watsisshaparee. Napa nuw siyaa chinamamari chinakina. Nuwaa ashiritam siysa saanpata chinamamaritam chinangtsa. <sup>35</sup> Ashkinaareesa, tputs siyaa: Pa, watacha Isus tiptsiriya, táchapsinaya siyaatsi. Siyaa itsinsaru

yasachinllinpa. Ashiri yuwari waneerangi anuri payungtsa; tárangeiya Isusu.

(*Matiwa 26.31-35; Márkosa 14.27-31; Lukasa 22.31-34*)

<sup>36</sup> Tárangu, Pitorsha: Isusoo, ¿Yapsha naamachsha? átu, Isussha: Yap naachi amb shiy nuwash tachitamaam pinasaksha, Pitoroo. Itaru, zapshina nuwash tachitachpasha, tárangeiya.

<sup>37</sup> Pitorsha: ¿Mayamunshta naturi xarachich? Nuwaam xarashish wanindaja. Shiy kaminish tsipatseetstaa nda puniki; tsipaneetstaati pachindkeezi, tárangeiya. <sup>38</sup> Isussha: ¿Kaapa zurkush átish, Pitoroo? Nuw shiyaa yasaktana, tárangu. Mazinangcha; na ini ndatuma ktash yusaru, shiysha tputsee; Nuw Isusoo yasareezi, táchsha. Tuchip tayusichush, anush tarasichparee, Isus tárangeiya Pitorootsi.

## 14

<sup>1</sup> Pitoroo táyaru, Isussha iyaatssha ichingu-rootsini, tárangeiya; Anumun mangis mantsarintspa; punirustarintspa. Apanlimun mangis tatungtsa. Nuwamun mangis tateerus taangtsa.  
<sup>2</sup> Apapush taarasheemis kapung taariya; pish-tacheeja kis taamaama. Siyaam taarasheemis yaramaam naachima; Aparpati urutari taatssa. ¿Antaati shiyaa kamapshikeezi? nda. Zureeruri atashina.

<sup>3</sup> Naayaruri, yareeruri, yusur siyaa yamakaturi kuschima. Siyangaz kuseeruri, siyaa yamayaruri, urutamari nuwash taatssa; anush washunandarisha taachchi. <sup>4</sup> Apareetsi wanung yasaktischa amb kusamaama. Ambiri na

naamachima nuwa, tárangiya Isusu. <sup>5</sup> Tomássha:  
 Isusoo, wandari nda mangoonkiniwa, tárangu,  
 ¿Yapsha naamatscha? ¿Tamaycheezini amb  
 kusamaama? tárangiya. <sup>6</sup> Isussha: Nuwamunuri  
 Apapush pshtumaam waritariya. Nuw kuki  
 tsinascha. Nuw taarashipantana. Ashiriya,  
 nuwamunuri Apanllush pshtutssa siyaya.  
<sup>7</sup> Siy nuwaa kaapa mangoonkinaareesa,  
 Apapaatstam mangoonchitampasa. Itaru,  
 nimunarisha Apapaa yasayanllis; kaapa  
 natstaksa Apapaatsi, tárangiya. <sup>8</sup> Felipsha: Isusoo,  
 Apareetsish yámmandangasinda; pangpani atiniya.  
 Anootsiri zandkiniya, átu, <sup>9</sup> Isussha: Felipaa  
 ¿tamasha nda mangoonaksha? ¿Wanipaja siyaa  
 tayaspatarangitaati nda nuwaa mangoonaksa?  
 Mazinangints; siy nuwaa yasayanlltischa;  
 ashiri Apapaa yasayanlltamtischa. ¿Ashiri  
 mayaamsha shiy, Apareetsish yámmandangasinda,  
 átsha? tárangu. <sup>10</sup> Izuuru nuwaa mangoonangtsa.  
 Nuw Apappata tatsamootana; mangooz  
 minamari iy payukani. Minamaritanicha.  
 Nuwaanaatstaja kuki siyaa kamanirangi, nda.  
 Yuwaatsimari Apap kamachtarangu anootsimari  
 nuw payukina, watam mangooz minamari  
 payukaniwa. ¿Aparimun wizpur nuw wanipa  
 ashirangi? <sup>11</sup> Anumun nuwaa mangoonangtsa.  
 Zuraktishcha: Apanllpatari tatsamootishcha,  
 tángandama. Anoo xarakinaareesa, ashiritaa  
 nuwaa mangoonangtsa yuwamand wizpureetsi  
 parangis anumanda. <sup>12</sup> Mazinangtsa; niri  
 chinangtsa. Siy kaapa nuwaa mangoonkus,  
 nuwsha kizpuriri siyash tachtamparee. Apapap  
 na nuw kanapkachuri, nuw tamapari ashirus

taatssa. Amb ashkachus nuwaa yanutssa.  
 13 Nuwamanda, Apanllimandi Wipi, tputs Apapaa chinachinllinpa aturi, siyaa istachintsa. Nuwaa chinakus, nuwamand mashkachus, siyaa istachintspa. 14 Ashirucha, nuwaa mashkus, nuwaa chinakus, nuwsha izuuru istachintsa,

15 Siy kaapanaaari nuwaa chinakus, nuwaatstam kuki chinatssa; payumamari payutssa. 16 Ashkus, nuwsha Apapaa mashkuri, uwsha siyaam istampaneem minoo zanganchintspa. Istampansha kuskachu, siyash urutamari taachiya; ayamtaati siyaa kasacheeja, ndambaree. 17 Istampan watacha Apari Wani. Mangoozee p'tsimpancha Apareemi. Piyartach tputs nda Apareetsi Wani yasarangusin, ngatkusin, Apapsha anoom nda zanganchiya. Itaru, siyaam zanganchiya. Siy Apareetsi Wani mangoonarangus, uwsha siyapa na taariya. Urutari siyashuri taachiya istamaama, mangeetsis p'tsimaama. 18 Ashiriya, nuw siyaa nda izuuru kasachintsa; mxaxiz tamapari ashiru taacheezis, ndambaree. Apari Wani siyash kuskachu, nuwpaz ashiru siyaa istamaam kuschiya.

19 Na musásiritam naakchuri, piyartach tputs nuwaa nda pangchinllinaya. Itaru, siysa nuwaa yusur pangatssa. Siy urutamari taatssa, watam nuw taarashipannawa. 20 Nuwaa yusur pakchus, nuwaa izuuru mangoonatssa. Mangoonkachus, nuwaatssha táchpasa; Isus Waparpata tatsamoocha. Isus wizpuririni iyash taakiya; Isuspat mangooz minamari payukani, táchpasa nuwaatsiya. 21 Tputs nuwaa kuki payukinaariya, nda kapeetku, an

watacha nuwaa kaapa chinaku ashkiya. Nuwaa chinaku, Apapsha anoo tputsi chinaktamtaya. Nuwsha chinachtamana. Anumunsha nuwsha nuwaanaatsi yámandachima, tárangeiya Isusu.

<sup>22</sup> Utaássha, nllitari nda Isusoo tamapingarangu ansha Isusootssha: ¿Tamashta iyaamsha shiyya yusur pangchinee itaru piyartach tputs shiyya nda pangchinllina? tárangeiya Utaása. <sup>23</sup> Isussha: Siy nuwaa chinaksa. Tputs nuwaa chinaku nuwaatstam kuki payuku Apapsha anoo tputs chinachiya. Sheeruni, Apap nuwapa washunand kuskachuni, anush tputshush mang' taachiniya; istachiniya. <sup>24</sup> Itaru, tputs nda nuwaa chinaku, nuwaatstam kuki nda payukiya. ¿Antaati nuwaatsimtaja kuki ngatak? Apareetstamti kuk ngataranganaya, watam nuwaa zanganiranguwa. Ashiriya, ¿tamaree anush tputs taachini? pinasakanaya.

<sup>25</sup> Nduma naachuri, wand nish siyapa taakuri, anoo ichinguru siyaa wasina kamankina. Kamankitaati, itaru nda izuuru mangoonaksa. <sup>26</sup> Ashiriya, Apari Wani siyash kuskachu, mangeetsis p'tseekchu, izuuru siyaa tayaspatachiya. Uw istampaniri taachiya. Apap istampabee kamachtakchu, Tputsireetsi izuuru p'tseeshini Isusoo kuk mangoonamaama, tákchu, zanganchiya. Ashiriya, kuskachu, izuuru mangoonatssa.

<sup>27</sup> Ashiri naamachima. Mapiymmash mangeemis panachintspa; siyash mapiymmash kasachima. Nuw mangi nda punirustaranguri, mapiyrruri taarangi, ashiritam siyaam mapiyrmash kasachintsa. Mapiyrmash anumash

nish tsapurunasush wanindaja; ḷyapeeja mapiyshee pangchich? Ashiriya, mangeemis mapiym panakuri, punirustarintspa; mangis mantsarintspa. <sup>28</sup> Naamachima atitaati, mangis mantsarintspa, watam siyaa istamaam yusur kuschima táranawa. Mapiyngtsa. Apapush kanapkachuri, uwash mangi kis taachina, watam nuwaa kánuru taakuwa. Amb mangi kis taakamchuri, siysa nuwamun mangis ksatam taangtsa. Ashirucha, mangis mantsarintspa táshina. <sup>29</sup> ḷNuw siyaa wanipaj kamanirangi? Anoo ichinguru pakeerus, nuwamun mangis izuuru tatutssa. <sup>30</sup> Natumasamta siyapa ipuneeruri tsiyatkina. Tsapurunas urkari musásiritam kuschiya mantsamaama; Yashingoo atina. Ashiritaa, nuwaa ndusha kasichiya. <sup>31</sup> Itaru, tputs ichingurusin nuwaa mangoonpana átana. Nuw Apapaa izuuru chinakuri, tputseem tsipachima, watam Apap nuwaa kamachtaranguwa. Na waritayanlltanda. Ashiri pzaja; naayani; tárangiya Isusu.

Táyaritaa, wandaritam iyaa tayaspatarangija. Tárangiya;

## 15

<sup>1</sup> Nuw kizarun wanasinaari tamapari ashitana. Apapsha tatsummapan tamapari ashiru taariya.  
<sup>2</sup> Piz nda pakchiyam wanasir yusiku, Apapsha anoo izuuru kapeetchiya. Itaru, zanllipurupaz ashiru mantsiri anoo kapeetchiya. Apari arangeem yusip átu ashkiya. <sup>3</sup> Nuwaa kuki na mazinayarus, anumun Apap mangeetsis yareenlliya. <sup>4</sup> Ashiri nuwashumari taangtsa.

Ashkus, nuw shiyashumaritam taachima. ¿Antaati kizarun piz tzayaruch yusur yusitareeja? ndambari. Wanasinarush taakchinaari, uru yusiychiya. Ashchitampasa siyaya. Ndunnaa nuwapa ipunaru taakus, nduntam yusikpaz ashchis. <sup>5</sup> Nuw kizarun wanasinar tamapari ashitana. Siysa piz tamapari ashiru taaksa. Ashiri nuwaa ksarintspa. Tputs nuwaa nda kasaku, nuwsha nduntam kasachina; uru chinachina. Ashkachus, wanasiри yusikpaz ashitssa. ¿Nuw ndunnaa istakuri, ashireeja wanasiри taachis? izuuru pinasaksa.\* <sup>6</sup> Napa, ¿mzatspan tamakeeja? Pizaa yutaritawa anoo pakeeru, kapeetkiya. Puzachu, zanllipurunand tayantayaru, tirookchu, izuuru machingkiya watstamarita. Apari ashikpaz ashchitampari siyaatsi, nuwaa kasakchinaareesa.\* <sup>7</sup> Itaru, siysa nuwash uru taakchinaareesa, nuwaa kuki uru payukinaareesa ashiru yuwaan zandkis anoo mashkus, anuritam istachints. <sup>8</sup> Ashkachus, Apapsha mang' ksachiya, Nuwaana tputsiri nuwaam wanasinandari yusikpaz ashtachinllinpa átu, ipareemi Isusoom wipunasheem kinachinllinpa, tárangeiya. <sup>9-10</sup> Waana Apap nuwaatsi kizpur chinaku, nuwsha ashiritam siyaa kizpuritam chinakina. Ashiriya, siysa nuwaatsimari uru chinangtsa. Nuw Apapaa kuk uru payukuri, Apapsha nuwaa chinakiya. Ashiritamtischa siya. Nuwaa kuki uru payukus, nuwsha siyaa uru chinachints.

---

\* **15:5** Salmo 127.2 tsiyatsis nipta tatsamooru taaritamta.

\* **15:6** Salmo 80.8-13 tsiyatsis nipta tatsamooru taaritamta.

11 Mang' kis taapana aturi, anoo siyaa kamankina. Nuwaa kuki payukus, mangis kis taatssa; nuw mangi tamapari ashiru kis taatssa; urutarita kis taatssa. 12 Nuw siyaa minamari kamachtachintspa; Saanpatatis izuuru chinangtsa; nuw siyaa kizpur chinaki ashiritam saanpata chinangtsa. 13 ¿Tamaru nuw siyaa chinakina? Siyaam kaminis nuw tsipachina. Ashiri siysa shingtamtса saanpatata. 14 Nuwaa kuki payukus, urutamari nuw amikuri taatssa. 15 Nuw siyaa, m'chachureezi, nda. Nuw siyaa amikurtana watam chinakaniwa. Antaati m'chach upaturunarinpa mang' waritareeja. Itaru, nuw ichinguru yuw Apap nuwaa kamanirangu anoo na siyaa kamanirangtana. Ichinguru yasaksa ashiri nuwapat amikurtanicha iya. 16 Siy nda nuwaa ipusarangis tayaspata-panireemis; itaru nuw siyaa ipusarangtana ipunsheemi.\* Ashirucha, nuw siyaa waneekuri atashina; Tputsee chinangtsa; nuwaa kuki tayaspatangtsa; shuneengtsa, tina. Ashkachus, tputs mangooneersin, urutamari Apanlleem taachinllinaya; siysa Apanlleem tachtamsa. Apapaa mashkus, nuwamun kamini mashkus, siyaa istachiya. 17 Ashiriya, nuwaa kuki uru payungtsa; saanpata chinangtsa tashina. Anuri chinangtsa.

18 Itaru, yutaritamash tputs siyaa natsakchu, punirustarintspa. Napa: nuwamasa natsarangana. Siyaatstam ashtachtampasinaya. Ashiri anoo mbizarintspa.

---

\* 15:16 Tayusima 7.7 tsiyatsis nipta tatsamooru taaritamta.

19 Siy yutaritshishpanitamanaari taakus, ashiriya siyaa chinachapsinaya. Itaru, nuw siyaa itutseeruri, siyaa wanasisrimshish wayarangina; na yutaritshishush nda taaksa. Ashiriya, siyaa itutsirangi anumand siyaa natsachinllinaya. 20 Nuwaa natsarangusin, siyaatsinaa misisinashaparee natschinllinaya. Nuw siyaa kamanirangi mbizarintspa; tiptsiri waanaatsi kuraka kasikeeja, tárangina. Itaru, tiptsir kurakush tachitkusin, kiyungutam kachiychtampasinaya. Siysa nuwash tachitkus ashchitampasa, siyaatstam kiyungutam yachachtampasinaya. Napa: ¿nuwaa kuki tamarangimsinaya? Ngataranganaya. Nuwaa kuki payuranginaareesinaya ashiru, siyaatstam kukis payuchtampasinaya. Itaru, siyaa ngatchitampasinaya atashina. 21 Nuwamun kamini siyaa ashchitampasinaya. Nuwaa Apap zanganirangtaa, ashiritaa nda mangoonkana; ngatkana. 22 Nuw ndunnaa kusaranguri, ndunnaa Apapaa kuk kamaniranguri, mapiyranginaapsinaya. Itaru, na izuureesha kamaniranguri, ngatarangsin, waanaatstatamsha yutaritshishush wayaranganaya. 23 Ashirucha, tputs nuwaa natsaku, Apapaatstam natsakiya. 24 Nish tputsish xiyranguri, Apappata wizpuririni zapan istarangina; yuwaatstaa tputs sirú nda patarana anootstaa parangusin nuwaa ngatarangana. Waanamand chayarini waana yachchinllinaya. Nuwaa parangitaatssin, ashiritaa nuwaa natsarangusin, Apapaatstam natsarangana. 25 Apari kuk watam, táranguwa;

Tputs zapan msangarusin, nuwaa natsakanaya,\* átcha. Ashirucha, nuwaa natsarangusin anootstam kuk tatsamoorangiya.

<sup>26</sup> Nuw siyaa istampaneemis Apareetsi Wani zanganchintspa. Uw Apanlliritamcha; Tsinsampa. Ashiriya, uwsha kuskachu, tputsee mang' p'tsimaam kuschiya. Nuwaatsimari kuki izuuru mangoonamaam p'tsichiya. <sup>27</sup> Ashiriya, siysa nuwaatstam kuki kamanitssa, watam siy nuwaa ichinguru parangsawa. Ashirucha, natsaktaateesinaya, siysa kamaningtsa siyaa atashina.

## 16

<sup>1</sup> Siyaa nuwaa ksarusinapa aturi, natsha in anoo siyaa kamankina.

<sup>2</sup> Nuw kamini siyaa natsaksin, siyaa kapunguri niyramaam waanpatatin wanichinllinaya. Sheersin, siyaa pachakchusin, Isuschichee pachakuni, Apanll iyaa kis napachparee táchapsinaya. <sup>3</sup> Nuwaa nda mangoonkusin, Apapaa nduntam mangoonkusin, siyaa nuwamun kamini kiyung yachchinllinaya. <sup>4</sup> Ashiritaa punirustarintspa, watam wasina kamaniranginawa. Yutaritpani tputs zararini kuskachu, siyaa kiyung yachakchusin, mangishis nuwaa kuki chinatssa; Isus mangeetsini p'tseerangcha tátssa.

Sirútari nda anoo kamanirangina, watam siyaam istamaam taaranginawa. <sup>5-6</sup> Itaru, na kanapkachuri, siyaa itsinsaru kamankina.

---

\* <sup>15:25</sup> Nishuri yuwartatam Salmo 69.4 átu atitamta.

Kazurukachtana, táranguri, kizpur mangis mantsarangsa. Mangis mantsarangus, mangeetsis kanacharangus, nda nuwaa: ¿Yapsha naaksha? nda átssa. Apap nuwaa zanganirangu, na waptam kanapkachima. <sup>7</sup> Itaru, niri mangoonangtsa; Apapush kanapkachuri, siyaam kizpur wanasisri anoo zanganchintspa. Ndunnaa ashkuri, siyaa kizpur istamaam pinasachparina. Itaru, naakchuri, istampaneemis Apareetsi Wani zanganchintspa. <sup>8-11</sup> Zangankachuri, kuskachu, uwsha piyartacheetstam tputsi mang' p'tsichiya. P'tseekchu, nuwaa ndusha mapiychinllina. Nuwaa nda mangoonkusin, wandaritam yutaritshishush taachu tputsee wanichiya. Mishat, yuwamand nuw tsipakchi anumand Aparshiti tputsee kis chinachiya; anootstam Apari Wani tputsee mang' aranginasha p'tsichiya. Na tsipakchuri, yusur Apapap kanapkachuri, ndusha nuwaa pangatssa. Itaru, Apari Wani anumun waneekchu, tputsha nuwaa mangoonkachu, Aparshiti anoo kis chinachiya. Mishat, kamungshisheem wanichtamtaya. Na nuw yutaritshishee urkar, Yashingoo izuuru kasichima. Tputseem kamungshisheem wayapi aturi, kasichima; tputsireemi yashingoo tatutschima. Ashiriya, Apari Wani piyartachee tputsee mang' p'tsichu Apareetsi mangoonchitamtaya.

<sup>12</sup> Wandaritam tsiyatssis siyaam zapan payuktana. Kamanpi atitaati, itaru siysa naturi mangoonamaam pinasaksa. <sup>13</sup> Itaru, Apari Wani siyash kuskachu, siyaa mangeetsis p'tsichiya nuwaa kuki mangoonamaama. Mangeetsis

p'tsiputstar ashku, nuwaa kuki urutari itsinsaru payutssa. Mangeetsis p'tseekchu, waanaatsi kuk nda kamankiya. Nuw chinaki anootsimari siyaa kamanchiya. Nuwaa kuki ichinguru kamanchiya urutaritaya. Yuwaa Apap zapish ashtachu anootstam kamanchintsa.<sup>14</sup> Uru nuwaa ungirtachiya. Nuwaa kuki siyaa kamankachu, siysa nuwaatsim uru kapung chinatssa.<sup>15</sup> Nuw kuki watatamcha Apari kuku. Tatsamootanicha. Anootscha siyaa atina, Apari Wani nuwaa kuki yáyaru, mangeetsis p'tseetchiya izuuru mangoonamaama watam Apartamti kukuwa. Ashiri Apareetsi Wani zanganchi anoo siyaa kamaneena.

<sup>16</sup> Mazinangtsa; na musásiri siy nuwaa nda pangatssa. Itaru, anamunsha nuwaa yusur pangatssa, tárangiya Isusu. <sup>17</sup> Isus tárange, itaru, iysha, wipunashtini, anoo mangoonamaam pinasarangtanicha. Iyaanpatatini ¿Mayaatsi át? tárangini. Na musásiri siy nuwaatssha ndusha pangatssa, itaru anumunsha nuwaa yusur pangatssa, átu, ¿mayaatsi át? tárangini. <sup>18</sup> Mishat, Apapap kanapkachuri, musásirita naachima, átu, ¿ashinooja ashich? kaapa mangoonkeezi, tárangini iyaanpatatani. <sup>19</sup> Isus nduntaa mazinarangu, uru mangeetsini yasarangiyi. Yuwaa mashamaam zandarangani anoo waana yasarangiyi. Ashirucha, iyaatssha: Siy nuwaa mashamaam zandaktischa, tárange. Nuw siyaa: Na musásiri siy nuwaa nda pangatssa. Itaru, anamunsha nuwaa yusur pangatssa, táranguri, anoo siysa nuwaa mashamaam zandarangsa. Siy nuwaa: Wazareetsiri kamaningasanda,

tápani, mangishis átssa. <sup>20</sup> Ashiriya, na siyaa itsinsaru kamanchintspa; na in siy nuwangaz kizpur tanutssa. Itaru, yutaritshishpan tputs nuwamun tsipani shambatchinllinaya. Siysa nuwangaz tanuyarus, itaru musásiritam yusur nuwamunatam shambatbatssa. <sup>21</sup> Kiz wipaa ksutku tamapari ashitssa. Napa kiz tatsipumaam zandkachu, mang' punirustatriya. Itaru, nlluraa tatsipkachu, wasuree mbizakiya; mang' kis ashkiya, watam wipaa pakeenlluwa. <sup>22</sup> Siy ashchitampasa nuwangzi. Natumasam mangis mantsatssa. Itaru, nuwaa musá pakchus, mangis ksatssa; ayamtaati nuwangaz mangis nda yusur mantsatssa. Nuwamun kis taatssa. <sup>23</sup> Mishat, Apapap yusur kanapkachuri, siysa nuwaatssha ndusha mashatssa; Apapaatsimsha mashatssa. Kaapa mazinangandama; siy nuwaa mangoonkus, Apapaatssha mashkus, Apapsha waana siyaa mangeetsis p'tsichiya. <sup>24</sup> Sirú siy nuwamun mangis taturangis anumun Apapaa nda masharangsa. Itaru, natsha mashkachus, Apapsha mazinachiya. Ashiriya, mashangtsa. Ashkachus, izuuru mangis kis taatssa.

<sup>25</sup> Apanlee siyaa kamaniranguri, k'kuz pindanaru tsiyatarangina. Itaru, kanapkachuri, k'kuzee pindanashee nda tsiyatchi; Apanlee kamankachuri, wazareetsiri tayaspatachima. <sup>26</sup> Anush siysa nuwaa mangoonkus, Apapaatsimari itsinsaru mashkus, uwsha siyaa mangis p'tsichiya. Ashiriya, siysa itsinsaru Apapaa mashangtsa. ¿Mayaama nuw siyaam Apappa tsiyatchi? <sup>27</sup> watam waana siyaa chinakuwa. Yuwamun siy nuwaa chinakus,

mishat nuwaa: Apanllcha Isusoo zanganirangu, tárangis anumun Apap siyaa chinakiya. <sup>28</sup> Apap nuwaa zanganirangu, nish tputshish taarangina. Itaru, natsha tputsee kasayaruri, waptam yusur Apapap kanapchima, tárangeiya Isusu.

<sup>29</sup> Táyaru, iysha: Maá, zuraktishcha; wazareet-siri na kamanirangsha. Pindanaru nda tsiyatarangsha, táranginiya. <sup>30</sup> Shiy, Isusoo, ichinguru yasaksha; mangishini chinarangini anoot-stam natstaksha. ¿Chaka shiyya istanda tách? watam shiyamari wasina yasakshawa. Zuraktishcha; Apanll shiyya zanganirangiya; Apanllpa tatsamootishcha. Shiyya mangoonkiniya, tárangtanicha. <sup>31</sup> Isussha: ¿Kaapa nuwaa izuuru chinakis siya? nda. Siyaam wand pishtakiya, tárange. <sup>32</sup> Naturit ini nuwamun punirustayarus, suwasuwartssa. Nuwaa kasayarus, pangipis suwartssa. Nuwaa kasakus, nuw minamariti taaktaati, ashiritaa Apap nuwaa nda kasachiya, watam nuwapa urutari taakuwa. <sup>33</sup> Siyaa punirustatpa aturi, anoo wasina ichinguru kamankina. Nuwaa uru mangoonkus, mangeemis mapiym urutamashi panachintspa. Nish tsapurunasush uru kiyung kachiyatssa. Ashiritaa, punirustarintspa; mangis mapiyrus taangtsa, watam kiyungutaa kachiykachuri, yutaritshishee izuuru kasichina, tárangeiya Isusu.

Ashiri yuwaa Isus iyaa wipunasheetsini kapung tayaspatarangu anoo kamaneena.

## 17

*Mishat, yuwaa Isus iyaa kizpur chinaku,*

*iyaam Apanllpat psaanaritam tsiyatarangu anoo kamanchintspa*

<sup>1</sup> Ashiriya, Isus iyaas tayaspatamaam tawatsparyaru, íwarsha napeeru, Apanllpat tsiyatarangiya. Tárangya;

Apaa, na zari tatsameenllcha. Nuw shiyyaa apartana. Ashiriya, nuw tsipakchitaateena, shiyysha nuwaa ituyamakchush, kizpur kurakaam ínangandama nuwamari kasimaama. Ashkachush, tputs shiyyaa kapung chinachinllinaya. <sup>2</sup> Apaa, shaana zandarangush, na nuwsha tputsee ichinguru istamaam waritaktana. Shiy tputsee nuwaam tputsireemi panarangush, nuwsha taarasheem urutamasheem uwaam panakina. <sup>3-4</sup> Shiy nuwaa kamachtarangush, zanganirangush, nuwsha shiyyaa kukish itsinsaru tayaspatarangina. Tputs shiyyaa chinapana aturi tayaspatarangina. Na iwipayana. Ashiriya, tputs shiyyaatsimari izuuru mangoonku, nuwaatstam yuw shiy ipusarangish anoo mangoonku, iyamun wizpuririni urutamari taachinllinaya.

<sup>5</sup> Ashiriya, Apaa, shiyysha na nuwaa yusur kizpur kurakaam ínangandama. Sirútari, nduma tsapurunasee tinchuri, sundarurish ichingurusin shambatarangana nuwamuna. Shiyap kanapkachuri, sundarurish yusur nuwamun shambatchitampasinaya. Nuwaa kizpur chinachinllinpa átana.

<sup>6</sup> Ashiriya, Apaa, ashpatam tsapurunasshuchee tputsi tputsireemi ipusarangush, nuwsha shiyyaa kukish kapung tayaspatarangina; wizpurireetsish yámandarangina. Nuw

tputsiri watatam shiyatamcha tputsirish.  
 Shiy nuwaa: Tayaspatañgcha; ksutangcha;  
 tárangush, nuwsha anuritam tayaspataranguri,  
 mangoonarangana; wits mazinarangana.

<sup>7</sup> Na nuwaatssha izuuru yasakana;  
 shiyaatstam yasakana. Shiy ichinguru  
 yasaksha; ichingurutam payuksha. Nuwsha  
 ashiktamana, watam nuw shiyaa aparinawa.

<sup>8</sup> Nuwaanaatstaja kuki kamanirangi. Yuwaa  
 shiy kamachtarangish anuri tayaspatarangina.  
 Anuritam mangoonarangana. Isus Apanll  
 zanganirangu ancha, nuwaa atanaya.  
 Nuwaa itsinsaru mangoonkana. <sup>9</sup> Ashiriya,  
 anoom tputsireemi shiyaa mashkina, Apaa.  
 Piyartacheem tputs nda mashki; tputsireemish  
 tsiyatkina. Shiy nuwaa: Ksutangcha, tárangush,  
 nuwsha wanasisri ksutarangina. <sup>10</sup> Nuw

tputsiri watatam shiyatam tputsirtishcha,  
 watam ichinguru shiyapa washunandari  
 payukaniwa. Ashiriya, natsha tputsirshti  
 nuwaa kuki kamanchinllinaya; kamaneersin  
 nllitaritscha tputs nuwaa chinachinllinaya  
 tputsirimuni kuku. <sup>11</sup> Nuwsha Apaa, shiyap  
 kanapchima. Sheeruri, nish tsapush ndusha  
 taachima nuwa. Itaru, nuw tputsireetsi  
 kasakchuri, nish tputush yutaritshishpanish  
 taachinllinaya. Apaa, shiy minamaritish  
 wanasisrtishcha. Ashirucha, tputsireetsish  
 shaana ksutangcha atina. Shiy kizpurtishcha,  
 Apaa. Shiysa tputsireetsish tapachindangcha,  
 watam nuwaa tapachindampaneem  
 ipusarangshawa. Ashkachush, uwshtisin  
 mangooz minamari payuchinllinaya. Nuw

shiyapa mangooz minamari chinakina.  
 Tputsirish iyapa minamari mangooz  
 payuchinllinpa tina. <sup>12</sup> Nuw nish taaranguri,  
 tputsireemi ipusarangush, wanasi  
 ksutarangina. Shaana tapachindampaneem  
 nuwaa Ínarangush, shaanaatsi wizpurirish  
 nuwaam panarangush, nuwsha tputsireetsi  
 ksutarangina; ichinguroo tapachindarangina.  
 Minamari Utaása yashingush kanacharangina  
 yandamareetsish tatsammaama. Itaru, uw uru  
 yashingchichcha tputsi. <sup>13</sup> Itaru, tputsiri izuuru  
 mangoonpana aturi, naturi wits mazinarsin  
 shiyapa tsiyatkina, ndaturi kazuraruri,  
 Apaa. Nuwaa kuki mazinaksin, mang' kis  
 taachinllinpa. Nuwaana tamaparina ashirusin  
 shiyamun mang' ksamat taachinllinpa.  
<sup>14</sup> Tayaspataranguri, shiyaa kukish  
 mangoonarangana. Anumun yutaritshishpan  
 tputs tputsireetsi natsarangana. Yutaritshishee  
 kasayarusin, na nuwaana tamaparina  
 ashiritam tsasiritam taakana. Anumand  
 piyartachsha natsakanaya. <sup>15</sup> Natsaktaatssin,  
 shiysa tputsireetsi tapachindangcha. Shiyap  
 naturita yamangcha teezi, nda. Itaru,  
 izuuru ksutangcha; tsasiri taachinllinpa  
 tina. Yashingush yutarit taarusinapa táshina.  
 Ashiriya, Apaa, shaana napangcha tina.  
<sup>16-18</sup> Tputsiri nuw tamapari ashkitamana  
 yutaritshishee natsakana. Shiy nish tsapush  
 nuwaa zanganirangush yutaritshishush  
 nda pshturangina; tsasiri taarangina. Na  
 nuwsha tputsireetsi zanganchima k'keetsish  
 kamanimaama. Tputs yutaritshishpanpat

taakchitaateesinaya ashiru, itaru tsasiri taapana aturi, shiyaa kamankina. Ashiriya, shiysa Apaa, napangcha; itsinsaru taamaam mangoo p'tseengcha. Shiy kukish tsinascha. Shiy kukish wanasiri taamaam waneekiya. Ashiriya, k'keetsish mangoonpana tina. <sup>19</sup> Ashirucha, tsasiri taapana aturi, nuw tsasiritam taarangi. Ashiritam taapana aturi atina. Ashiriya, Apaa, shaana ksutangcha.

<sup>20</sup> Ashiriya, Apaa, tputsireetsi kamachtaranguri, uwshtisin k'keetsish kamankatssin, nllitaritsha tputs mangoonchitampasinaya. Tputsireemish kinachtampasinaya. Ashiri uwaamtam tsiyatkitamana. <sup>21</sup> Tputsirish ichinguru minamari mangooz payuchinllinpa tina, Apaa. Waanpatatin chinachinllinpa tina. Nuw shiyapa minam mangooz chinakani. Tputsirish ashchitampa; minamaritam mangooz chinachinllinpa tina. Ashkusin, iyaatstam minam mangooz payuchinllinaya. Iyaanpatatani ichinguruni chinachiniya. Sheersin, piyartach tputs tputsireetsish pakeersin, nuwaa mangoonchitampasinaya. Zuraktishcha; watacha Apanll zanganirangu anu, táchapsinaya nuwaatsiya. <sup>22-23</sup> Nuw shiyapa mangish tatsamkina, Apaa. Shiy nuwaa kizpur kurakaam ínarangshawa. Ashiri nuwsha na tputsireetsish kizpuritam ínakina; shiyaptatamta mangish tatsamkanaya. Ashirucha, minampazini ashiruni ichinguruni taachiniya. Ashiriya, shiyamun tputsirish piyartachsha tputs mangoonchitampasinaya.

Mangoonkusin, ¡Maá, zuraktishcha! Apanll Isusoo zanganirangiya; Apanllcha Wipa. Apanll Isusoo chinakcha. Tiptsireetstam chinakiya, shiyaa táchinllinaya.

<sup>24</sup> Apaa, tputsireetsi kizpur chinakina. Nuwapa zapshina taapanana tina. Ashkuni, kisshaparee washunand taachiniya. Sheeru, nuwaatssha izuuru yasachinllinaya. Nduma tsapurunasee tinchuri, urutari kizpur taarangina shiyapta. Anpurtam nuwaa uru chinarangshawa. Ashiriya, tputsiri anoo pakeersin, nuwaa kapunguritam chinachinllinaya. <sup>25</sup> Apaa, shiy ichinguru itsinsaru natstaksha. Yutaritamash tputs shiyaa nda mangoonkanaya. Itaru, nuwsha shiyaa mangoonkina; misha tputsiri shiyaa mangoonkitamanaya, watam nuwaa watacha Apanll zanganirangu anu atanawa. Ashirucha, kizpur tputsireetsi chinakina. <sup>26</sup> Chinamamari chinaki. Ashiriya, shiy nuwaa kizpur chinarangush, nuwamun kamini tputsireetsi tatsamooritam chinangcha, Apaa. Shiyaa chinapania aturi, k'keetsish kapung tayaspatarangina. Wandaritam tayaspatachima. Ashiriya, shiysa chinangtamcha, Apaa. Ashiri Apaa Wapparee,

tárange. Táyaru, Isus Waparpata tsiyatamaam kasarangiya.

Ashiri yuwaan Isus iyaam Waparpat tsiyatarangu anoo kamaneena.

## 18

*Mishat, yuwaa Isusoo psaanaritam  
putarangana anoo kamanchintspa  
(Matiwa 26.47-58; Márkosa 14.43-54; Lukasa  
22.47-54)*

<sup>1</sup> Isus iyaa wipunasheetsini tayaspataamaam iwipayaru, Yasinap tatsummap Olivap naayani, týaru, ambshat psaanaritam naataranganiya. Irusarinush shitungeeruni, kung wazangan Sítorona sura kiteeruni,\* tatsummash pshturanginiya, watam anush kis uru shaniyaranganiwa. <sup>2</sup> Utaásarini sirútari iyapat anush pshturangitamta. Ashirucha, Utaásarini yasarangiya. Isusoo tamapingamaam zandku, anushpa taariya, tárangparee. <sup>3</sup> Ashiriya, iyma anush wasina shaniyeeramchuni, kuzizimun Utaásarinsha naantach ashirangiya. Utaásarini yamazayaru, yámandampan taarangiya. Romshuch wasundurur zapan tachitaranganaya. Apanllee pang' ksutamapan zapantam tachitarangana, watam apanllpan urkar, iyashuch Utaáshuch kurakarini, kamachtaranganawa. Tuzaz payuru, nambarin payuru, k'chirpung payuru, mchit payuru aship ashirusin kusarangana ichingurusina. Isusoo putakatssin, kusaranganaya. <sup>4</sup> Isus anoo ichinguru yasarangiya. Yasarangitaa, watsipunoo nda pachindarangiya; nda suwarangiya. Isussha chiyzayaru sundaroo tasaseeru, Utaásarineetstam tasaseeru, ¿Chakaa

---

\* **18:1** 2 Samuela 15.23; 2 Utaáchich kuraka 23.4 tsiyatsis nipta tatsamooru taaritamta.

zandaksa? átu, <sup>5</sup> sundarsha: Isusoo Násaretshuchi  
 putapani tiniya, tárangeiya. Isussha: Watatana  
 nuwaya, tárangeiya. <sup>6</sup> Tákchu, punirustayarusin,  
 uship kanaputa ashkusin, pantsaturtaramach  
 ashirangana. <sup>7</sup> Isussha yusur: ¿Chakaa  
 nachungaksa? tákchu, sundarsha: Isusoo  
 Násaretshuchee putapani tiniya, yusur, tárangeiya.  
<sup>8</sup> Isussha: Watatana nuwaya táranawa; tárange.  
 Siy nuwaa putamaam zandkus, nuwaatsim  
 putangandama. Ipunsheetsi ksangtsa;  
 p'tarintspa; tárangeiya. <sup>9</sup> Isus anoo átu, waanaatsi  
 kuk tatsammaam, tárangeiya. Waana Waparpat  
 tsiyateeru, Nuwsha tputsireetsi ksutarangi;  
 ichinguru tapachindarangina, tárange, anootssha  
 kuk izuuru payurangya. <sup>10</sup> Ashirucha,  
 anoo týaru, Pitorsha mchit yáyaru, tputsee  
 tpimbarangya. Apanllpanee muchchur witsee  
 t'sharangya. Apanllpan muchchur Márokcha  
 sura. <sup>11</sup> T'shayaru, Isussha: Pitoroo, watsta.  
 Mchitarish wayangi. ¿Mayaamsha nuwaa  
 tuxaraksha? Apap nuwaa kiyung kachiymaam  
 kamachtaranguwa. Nitaati Apapaa kuk nda  
 nuw payuki; izuuru payuchima, tárangeiya Isusu.  
<sup>12</sup> Týaru, waanaatsi kanasayaru, komandantsha  
 wasundururee kamachtayaru, Isusoo  
 putaranganaya. Putayarusin, kamuriranganaya.  
<sup>13</sup> Sheersin, Apanllee pang' ksutamapansha  
 Anásarinipsha pang' Isusoo machtarangana.  
 Anásarini Káyapasarincha ungsiri. Káyapasarinini  
 anpur apanllpancha urkariya. <sup>14</sup> Watatam  
 tputs Isusoo kamanku, sirú kurakpatatin  
 tsiyatarangsin, ¿Mayaamaja tputs ichinguru

tsipach? Minamtaatsimari tputs pachakchuni, tputssha ichingarisha kamungchinllinaya, tárangeiya. Watacha Káyapasariní. Ashirucha, Anásarinip pang' Isusoo machirangana.

(*Matiwa 26.69-70; Márkosa 14.66-68; Lukasa 22.55-57*)

<sup>15</sup> Macheemchusin, nuwa, minsha Pitoru, ashpamshtini tsimbunnandani kuzizimun tachitaranganiya. Anásarinish kuseeruni, watandpunsha minam mbammashpa tandapunurangiyá; pangusi iturpirangiyá. Ashirucha, Káyapasariní nuwaa yasarangu nuwaa nda pachindarangsín, nuwsha Isuspat pshturangitamana. <sup>16</sup> Itaru, Pitorsha shítungashinungiri kutarangiyá; pshtumaam pinasarangiyá. Ashirucha, nuwsha kizap, ksutamapanip, naateeruri, tsiyateeruri, Pitorootssha tapshturangina. <sup>17</sup> Anush tapsheturanguri, kizsha, Pitorootssha: Shiy Isustishcha wipunashish, átu, Pitorsha: ¿Nitaati nuw Isusoozi wipunashi? dancha, tárangeiya. <sup>18</sup> Táyaru, Pitorsha sumasip naatarangiyá chuchumaama. Kizpur kachiz psaan tushiyrangeiya. Wishchipsha sundarpat apanllpanpat muchchur sumasee tazuranganaya. Masunll tazuyarusin, sumasish chuchumaam wishchip shaniyarangana.

(*Matiwa 26.59-66; Márkosa 14.55-64; Lukasa 22.66-71*)

<sup>19</sup> Itaru, Isusootssha apanllpanish urkar mashimaam tapshturangana. Isus tayas-patarangu anoo mashimaam zandarangana; misha Isusootstam iyaatsi wipunasheetsini yasamaam zandarangitamsina. <sup>20</sup> Ashirucha,

mashkusin, Isussha: Nuw tayaspataranguri, shaniyshishush uru tayaspatarangina; kamapshirangeezi nuwa. Apanllshutam pang' tayaspatarangina. Tputs zapan shaniykana anshutam uru tayaspatarangina; kamapshirangeezi, nda. <sup>21</sup> Ashiri ¿mayaamsha nuwaa mashaksa? Itsinsaru yasamaam zandkinaareesa, ashiriya tputsee mashangtsa yuw nuwaa mazinarangana anootsi, tárangeiya Isusu. <sup>22</sup> Tárangu, ksutamapansha Isusoo tashush tuzimta ashirangya. Tuzimeeru, ¿Mayaamsha apanllpanee urkari shiy yámaksha? tárangeiya. <sup>23</sup> Isussha: Yutaritanaari tsiyataranguri, ashiri shiysha tputsee ichinguru kamaningcha. Itaru, watam wanasisiriri tsiyataranginawa. Ashiri ¿mayamandsha nuwaa ngutish tuzimuksha? tárangeiya Isusu. <sup>24</sup> Táyaru, Anásarini anush Isusoo xapooyerusin, Káyapasarinipsha mashimaam machtarangana; wand kamuriru naatarangya. Káyapasarinshini pang' tapshturangana.

(*Matiwa 26.71-75; Márkosa 14.69-72; Lukasa 22.58-62*)

<sup>25</sup> Itaru, Pitorsha wendaritam wishchip sha-neerana anush chuchurangya. Tputssha Pitoroo, Shiy Isuspasha wipunashsha, átu, Pitorsha: ¿Antaati nuw Isusoozi wipunashi? dancha, tárangeiya. <sup>26</sup> Yusursha apanllpansha urkari muchchur, Nuw shiyaa tatsummash panawa. Anush Isuspat shaneerus panawa; m'chach, tárange. Shiycha zuwanleetsi wits t'sharangtishcha. ¿Ndusha wattish shiya? Shiy Isuspasha wipunashsha shiyaya, tárangeiya kurak muchchuri. <sup>27</sup> Pitorsha yusur, Dancha, tárangeiya. Támpu, ktash tandaneeka tánll

ashirangiya.

(*Matiwa 27.1-2, 11-14; Márkosa 15.1-5; Lukasa 23.1-5*)

**28** Sheeru, zar shtungattanu, Isusoo gobernadorupsha mashimaam machtarangana. Gobernadorushsha pang' tapshturanganaya. Itaru, iy Utaáshuch kurakarini nda pshturangana; wishchip shaniyaranganaya. Iy wand shambatshishush katungumaam zandkiniya; minll kandanuneepa atusin, pangusush nda pshturangana. **29** Ashiriya, Isusoo tapshtuyarusin, gobernadorsha, Pilaturinsha sura, tandapunuzush pakich shitungeeru, tsiyatamaam chiyzarangiya. Pilaturinsha, tárangeiya; ¿Mayamand Isusoo wanimaaam zandaksa? tárangeiya. **30** Iysha kurakarini: ¿Nitaati ngutazini Isusoo putarangini? nda. Nda ngutani shiyya mashkiniya. In yutaritcha tputsi; tárangeiya. **31** Pilaturinsha: Ashiriya, saana sangtsa. Shaniyarus, tuxiykeerus, waneengtsa, watam saantari kamachtamaris taaruwa; tárangeiya Pilaturini. Kuraksha: Tuxiykeerangtanicha. Itaru, pachamaam zandkiniya. Itaru, shiy Romshuchish pachamaam tuxarakshawa, tárangeiya. **32** Romshuch yasinamun tapamtayarisin, tputsee pachataranaya. Ashirucha, Isus waana wasina yasayaru, Siysa nuwaa yasinamun tapamtatssa; tárangeiya. Natsha anuritam kuk tuminarangana.

**33** Ashiriya, kurak pachamaam pinasaktanicha táyaru, Pilaturinsha: Xamachi, táyaru, tandapunuzush wantsush pshturangiya Isusoo mashimaama. Isusoo yapshtuyaru,

tuxiykeeru, ¿Chakanasha shiya? ¿Utaáshuchish shiy kurakish? tárangeya. <sup>34</sup> Isussha: Shiyma nuwaa kamaningandama; ¿ishaantari chinayarush, anoo nuwaa mashkish? ¿Ndusha tputs nllitarit shiyya mashangi táranllinll? tárangeya Isusu. <sup>35</sup> Pilaturinsha: ¿Nitaati nuw Utaáshuchcheezi? nda. Ashiri ¿tamayree nuwaantari chinayaruri, shiyya mashchi? Shaana kurakarish, Utaáshuch apanllpani urkari, nuwaa kamachtaranganaya. Shaanapa yutaritambarangush, uwshtisin shiyya putayarusin, na nuwash shiyya wayarangana. Ashiri itsinsaru kamaningandama. ¿Tamarangsha shiya? tárangeya Pilaturini. <sup>36</sup> Isussha: Mazinangandama; tputsireetsi nish tsapurunas shiy tamapari ashiru nda ishinkina. Nuw nllitaritamana. Tputsee mang' kasikina wanasisiri taamaama. Shiy tamapari ashirinaari ishinkuri, tputsiri nuwamand warateenllinaapsinaya; Utaáshuch kurak Isusoo putarusinapa atusin, nuwaa tapachindachinaapsinaya. Itaru, nda ashiranganawa. Ashiriya, shiy tamapari ashiruri nda ishinki nuwa, tárangeya Isusu. <sup>37</sup> Pilaturinsha: Ashiriya, ¿shiyamari kasirush kizpur kuraktishcha shiya? týaru, Isussha: Aa, kuraktana nuwaya, tárangu. Tputseem kinaranguri, nish tsapurunasush nllurtarangina. K'kuz itsinsammash kamanpi aturi, nish kusarangtana. Tputs k'kuz itsinsammash zandku, nuwaa kuki kis mazinakiya, tárangeya Isusu. <sup>38</sup> Pilaturinsha: ¿Antaati k'kuz itsinsammash taatar? týaru, Isusoo kasarangiya.

(*Matiwa 27.15-31; Márkosa 15.6-20; Lukasa 23.13-25*)

Táyaru, yusur wishchip shitungarangiya Utaáshuchpat urkari tsiyatamaama. Isusoo zapan yasarangtana, tárangu. Itaru, yutaritaja tputsi; wanasircha. ¿Mayaamshta nuw tupchachee? Pilaturini, tárangu. <sup>39</sup> Ashiri tashitungamaam waritariya. Uru shambatshishush zar yuwash Ijiptoo tsap shitungarangana anush nuw minam tputs tumanamawaa tashitungaktana. Ashiriya, kurakareetsis Isusoo tashitungachima, táangiya Pilaturini. <sup>40</sup> Kuraksha kizpur tsiyantayarusin, Watsta; Isusoo tashitungarinllpa. Parápsaa tshitungangcha. Parápsaa chinaktanicha, tárangana. Parápsaa wapchaatstaa, ashiritaa, anoo chinarangana.

## 19

<sup>1</sup> Itaru, Pilaturin wand Isusoo tashitungamaam zandku, wasundurureetssha: Pzkoomaam pukoongtsa; táangiya. Ashirucha, sundarsha Isusoo watunir tusheersin, ushee pkooran-ganaya. <sup>2</sup> Nda pakchiyam nayanirangana. Kpapasha yáyarusin, tútiyacheem k'tarangana. Michitkusin, Isusoo kurakaam ínachinllpa atusin, kapaa tútiyachtarangana; watunireem tuwapimash ktsachimash túmartarangana. <sup>3</sup> Michiteeni atusin, Isusoo tasaseersin, ungirtakpaz ashirusin, Napangi, ¿Utaáshuch urkar tamara?\* tátá tátá ashirangana. Sheersin, tashee tuzimta tuzimta ashirangana.

<sup>4</sup> Pilaturin Utaáshuchpat kurakarin yusur tsiyatpi átu wishchip shitungarangiya.

---

\* **19:3** Isáysa 9.6 tsiyatsis nipta tatsamooru taaritamta.

Kurakaatssha: Mazinangints; Isus yutaritaja tputsi. ¿Tamaree wanasisirmshee pchangsints nuw tâchee? Ashiri na kizpur waneerangtana; waparitcha. Na pangatssa Isusootsi, târangiya.

<sup>5</sup> Táyaru, sundarsha Isusoo machirangana. Isus watunir ktsachimash k'tuntaru, misha kap tutayaru, kuras xatach ashirangiya.\* Pilaturinsha: Napangcha; Watacha tputsi, târangiya.

<sup>6</sup> Kuraksha kizpur tsiyantayarasin, Yasinamun tstsambeerush ksangi; târangiya Pilaturineetsini. Pilaturinsha: ¿Tamaree wanasisirmshee tputs pachachich? Saana tstsangsints yasinamunu. Saana sangtsa, watam yutaritshirini nduniwa; târangiya.

<sup>7</sup> Kuraksha: Tárinllpa; yutaritcha tputsi, târangu. Iy zitaminariní Móysisarini iyaa kamachtarangu, Tputs nuw Apanlltana Wipi, tákchu pchangtsa, târangcha. Ashiri pachamaam waritakiya, watam waana nuwaa atuwa; târangiya kuraka.

<sup>8-9</sup> Kurak táyaru, jmaya! Pilaturinsha kizpur punirangiya. Kizpur punirustayaru, Isuspat tsiyatpi átu yusur pangusush wantsush pshturangiya. Sheeru, Isusoo mashirangiya; ¿Tamaamsha tputsee shiya? ¿Yapichsha shiya? átu, Isussha nda tsiyatarangiya; zamarangiya. Nda yámarangiya. <sup>10</sup> Pilaturinsha: ¿Tamasha shiy nuwaa nda yámaksha? târangu. ¿Antaati shiyyaa nuw ngutazi mashki? Nuwaana zandkuri, shiyyaa yasinamun tupchachinllpa. Nuwaana tashitungamaam zandkuri, tashitungachinllpa, târangiya. <sup>11</sup> Isussha: ¿Nitaati shaana zandkush

---

\* **19:5** Salmo 22.6 tsiyatsis nipta tatsamooru taaritamta.

nuwaa tupchacheezish? nda. Apanll waana zandarangu, shiyaa kurakaam ínarangiya. Ashirucha, Apanll nuwaa waana kanasarangu, shiy nuwaa tupchachsha. Shiy yutaritshishirish taariya. Itaru, iy Utaáshuch kurakarini yutaritshishirini kizpur taariya, watam Apanllee kuk yasarangitaatssin nuwaa ashiritaa tupchakchinllinawa; tárangiya Isusu. <sup>12</sup> Pilaturini anoo mazinayaru, kizpur zandarangiya Isusoo tashitungamaama. Yusur tandapunuzush shitungeeru, kurakaatssha: Isusoo tashitungachima, átu, kuraksha: Tshitungarinllpa. Tashitungakchinaareesha, papcha, tárangu. Nitaati presidentee chinakush Isusoo tashitungacheezish. Papcha, Isus presidentee undararcha, watam Isus kurakaam kinapi atuwa; tárangiya iy kurakarini. Táyarusin, Pilaturineetsi kasiranganaya.

<sup>13</sup> Ashirucha, Pilaturinsha anoo mazinayaru, Isusoo machtayaru, wishchip tuxiykeerangiya. An wishchip iyashuch k'kini Kappáta sura. An watatcha wishchip yuwash patumbchee wayawayaw sheersin, watamus tamapari ashiru kasarangana. Anush Isusoo tuxiykeeyarusin, Pilaturinsha waanamuni watsirari kuxinarangiya. <sup>14</sup> Ashirucha, Pilaturini zar puturi, viernesash, iy Utaáshuch Páskuwarini\* anush, kuxineeru, tsiyatarangiya; Napangtsa; Isus watacha siy Utaáshuchis kurakaris, tárangiya. <sup>15</sup> Iysha kurakarini kizpur tsiyantayarusin,

---

\* **19:14** Wangarini 2.13 napangcha. Anush Utaáshuch Páskuwarini kamankiya tsapushu.

Taringsi; pchangi; yasinamun tstsayarush ksangi; tárangana. Pilaturinsha: ¿Saanaa kurakareetsis yasinamun pachamaam zandkis? átu, apanllpansha urkari; Iy kurakarini minamari taariya Romshuch presidente; minu wanindaja, tárangiy. <sup>16</sup> Táyarusin, Pilaturinsha: Neewa; yasinamun tstsayarus ksashintsints; tárangiy. Tárangu, Isusoo kasarangiy.

Ashiri yuwaa Isusoo putarangana anoo kamanneena.

*Mishat, yuwaa Isusoo pacharangana anoo kamanchintspa*

(*Matiwa 27.32-44; Márkosa 15.21-32; Lukasa 23.26-43*)

Ashirucha, sundarsha Isusoo machtarangana. <sup>17</sup> Isus waamat tstsamaam yasinaa kúrangiy. Irusarinush shitungarangiy. Yaktash tandapunuzee shitungeeru, machip kararangiy. An machi sura Muchuzcha; iyashuch Utaáshuchini k'kini Gólgota atiniya. <sup>18</sup> Ashirucha, anush kuseeru, sundarsha Isusoo wamaree tusheeru, yasinamun tstsayarusin, tuxiykeerangana. Tsimbunutam tputs tstsarangana. Ningich minamtam, arangich minamtam ashiru tstsarangana. Isusoo pusantarangana. <sup>19</sup> Pilaturini táwaramun tsiyatsis tuyandarang, muchimun iwaz tapamtarangiy. Tárangeeja; Isus Násaretshuchi Utaáshuchcha urkari, táyaru, yandarangiyá táwaramunu. <sup>20</sup> Utaáshuchiritam kuk anoo yandaku, misha Romshuchiritam kuk yandaku, misha Kiríkshuchiritam kuk yandaku ashirangiy. Tputs ichinguru yasapana átu ashirangiy. Ashirucha, yasinamun tstsayarusin,

Irusrarinanung watsiri pashuchurangu, Utaáshuch zapan parangusin, yasarangana. <sup>21</sup> Itaru, apanllpansha urkar yandamarinimand tsiyantaranganaya. Sheersin, Pilaturinpat tsiyatarangana. ¿Mayaamsha anoo yandarangsha? Nitaati iy kurakariniwa. Manguta waanaatsi, tárangewa. Ashiriya, yandarangish anoo watsta. Nllitaritaa yandakush, Isus waanaatsi Utaáshucheem urkari mangu ínarangiya, yandayarush tángcha, tárangeana apanllpan urkari. <sup>22</sup> Pilaturinsha: Yandayari an waani taachpa; týaru, kasarangiyá.

<sup>23</sup> Ashirucha, sundar Isusoo yasinamun tstsayarusin, Isusoo wamari ipusarangana. Sundar ipunpunar taaru, ashirucha minam wanusshee yat, minsha wichpooshee yat, minsha maxaam yat yat ashirangana. Itaru, Isus watanir minamari k'tam payurangu; siritam nduncha; arap kurik waritaku anumashcha. <sup>24</sup> Ashiriya, anoo izichtapa atusin, waanpatatin: ¿Chakaja yach? Ashiri wichipat michiteeni ipusamaama, týarusin, michitarangana. Apanll yandamarini anootstam wasina kamanirangya. Apanll kuk ateeja;

Nuwaatssha ktuniri, ¿Chakaja yach? atusin, waanpata michitaranganaya.  
Sheersin, waanpatachthisin ashpatam ashpatam sheersin yaranganiya,\* átcha Apanlli kuku. Ashirucha, yuwari Apanll kuk sirú, tárange anuritam sundarsha tatsamoomaam ashirangana.

---

\* **19:24** Nishuri yuwartatam Salmo 22.18 átu atitamta.

<sup>25</sup> Isus wanir watsiri xiyyeew wipaa parangiya. Nuwsha anshutam xiyarangina. Mishat, Isustam watatari, misha Mariytam Kleyofa wizanlli, misha Mariytam Matárinshuchi aship shaniyaranganiya. <sup>26</sup> Ashirucha, Isus waniree pakeeru, Ataa, Wangaa ipareemish ínangcha; uwsha shiyyaa ksutchiya, týaru, <sup>27</sup> nuwaatssha: Shiysa atataa aneertangcha; atataa ksutangcha shiya, nuwaa týaru, nuwsha ayu, tárangi. Isus nuwaa, tárangiya, watam nuwaa kizpur chinaranguwa. Anurisha Isusoo wanir ksuttarina.

(*Matiwa 27.45-56; Márkosa 15.33-41; Lukasa 23.44-49*)

<sup>28</sup> Isus nuwaa kamachtayaru, waana yasarangiya yuwaan tsipamaam pakchimsha pishtarangu anootsi. Sirútari Apanll waana Wirkarimun Isusoo ichinguru tuyandarangu, Isus anoo ichinguru yasarangu, ichinguru tatsamoorangiya. Nda minamtiyam kuk niyramaam, kizpur sachiteeru, Waapi, tárangiya. <sup>29</sup> Týaru, sundarsha shambushamboo yáyaru, kshaa parangiya suwishi. Sheeru, khash chka sheeru, yasina sura iysupa anpa shambushamboo saruyaru, Isusush kuk tunayungarangiya mitamaama.\* <sup>30</sup> Isussha kshaa miteeru, Apapaa kuk na izuuru tatsameena, tárangiya. Týaru, timucheeru, waana zandku, tsiparangiya.

<sup>31</sup> Anamunsha iy kurakarini natamta viernesash tputsee wanuts mapumaam zandarangana. Zar pukchu, sápatoom zari kinachiya. Anoo zari kizpur chinamaam

---

\* **19:29** Salmo 69.21 tsiyatsis nipta tatsamooru taaritamta.

zandarangana, watam shambatshisheem yuwash  
 Ijiptoo tsap shitungarangana anush shambateeni,  
 táranganawa. Tputs wanuts yasinamun  
 kambeeru, yutaritcha; sápatoo zaree mantstapa;  
 tárangana. Ashirucha, Pilaturineetssha: Tputs  
 wandari kchit taakana. Ashiriya, sundarsha  
 wanumbee chpayarusin, musá tsipakchu,  
 mapchinllinaya, nduma zar puchu, tárangana  
 Pilaturineetsi. <sup>32</sup> Pilaturinsha ayu týaru,  
 kuraksha sundaroo kamachtarangana; Tputsee  
 wanumb chpayarush, ksangcha; tárangiya.  
 Sundarsha ayu týaru, tstsamap naateeru,  
 tputseetssha wanumb chpat, minootssha tputs  
 wanumb chpat ashirangiya; yuwa Isusunung  
 tstsarangana anootsi. <sup>33</sup> Itaru, Isusootssha napku,  
 tsipam parangiya. Ashiriya, watsta, tárangiya;  
 Isusoo wanumb nda chparangiya. <sup>34</sup> ¿Kaapaneeja  
 tsipar? átu, k'chirpung yáyaru, Isusoo  
 watandaramush kayungarangiya. Kayungeeru,  
 Isussha ursiri zaw sheeru, wiririnsha zaw  
 ashirangiya. <sup>35</sup> Nuwaana kachi paranguri, siyaa  
 kamankina. Itsinsaruri kamankina, watam kachi  
 paranginawa. Siy nuwaa kuki zuraktishcha  
 tángtsa; izuuru mangoonangtsa. Siyaa Isusoo  
 kuk mangoonpana aturi, kachi parangi  
 anoo kamankina. <sup>36</sup> Ashirucha, wanumbee  
 nda chparangu, itarusha watandaramush  
 kayungarangiya. Amb sheersin, Apanllee kuk  
 tatsamoorangana, watam Apanll wirkari Isusoo  
 wasina kamanku, táranguwa;

Apanll waanaa tiptsiri kizpur ksutku, wanap

nda minamtiyam ichipchiya,\*  
 tárangeiya Apanlli. <sup>37</sup> Mishat, tárangitamta,  
 Tputsiri kayungeersin, anootstam napeersin,  
 punirustachinllina,  
 tárangitamta Apanlli. Ashirucha, Apanllee kuk tat-  
 samoorangana Isusooma.

(*Matiwa 27.57-61; Márkosa 15.42-47; Lukasa 23.50-56*)

<sup>38</sup> Ashirucha, izuuru tsipayarusin, Ussha,  
 yakat Arímatíyshuch\* tputsi, Isusoo mappi átu,  
 mashkatu Pilaturinap naatarangiya. Us Isuscha  
 wamkuri. Itaru, Utaáshuchheetsini iyaa kurakarini  
 puniku, Isusush nda wazareetsiri tachitarangiya;  
 kamapshirangiya. Ashiritaa, natsha Pilaturinish  
 kuseeru, Isusoo yáyaruri mapchima, tárangeiya.  
 Pilaturinsha ayu, tárangeiya. Sheeru, Us Isusurinee  
 mapumaam yarangu, mapumaam yararangiya.

<sup>39-40</sup> Níkodemsha istarangitamta yaramaama.  
 Níkodemsha tsiparee yaramaam, yasin kzammashi  
 sura mira,\* misha alootstam, washunand minam  
 karak kayakarini yáyaru, anpatsha Isusoo  
 tapararanganaya. Níkodem watacha sirútari  
 Isuspat psaan tsiyatarangu ancha. <sup>41</sup> Ashirucha,  
 yareersin, mapkatssin naatarangana. Yuwash  
 Isusoo pacharangana annungiri yasin tatsumma  
 zapan taarangiya. Annungirtam machimun  
 wach kachutam patumbich taarangiya  
 tsiparee wayamaama. Ancha kaneeschiri  
 kachutam taaru, tsiparee nllitarit anush

\* **19:36** Nishuri yuwartatam Salmo 34.19 átu atitamta.

\* **19:38**

1 Samuela 1.1 Rama, átu, watatamcha yakta.  
 61.3 tsiyatsis nipta tatsamooru taaritamta.

\* **19:39-40** Isáysa

ndunimuna. <sup>42</sup> Ashiriya, Isusurineetssha anush kaneeschish wayarangana. Zar musá sápatoom tapeekachpa atusin, Isusurineetsi anush mikeersin wayarangana; patumbichpa kapungpa shtandayarusin kasarangana.

Ashiri yuwaa Isusoo pacharangana anoo kamaneena.

## 20

*Mishat, yuwaa Isus tamarangu anoo kamanch-intspa*

*(Matiwa 28.1-10; Márkosa 16.1-8; Lukasa 24.1-12)*

<sup>1</sup> Isusurini sápatush zari mangutari mapshishush taarangiya. Ashiriya, zari domingosh, nduma taraseechu, Mariy Matárinshuch tanukatu kizapat mapshiship mang naatarangana. Kuseersin, waasha patumbich tawatamsha mang parang.  
<sup>2</sup> Pakeeru, Pitoroo kamankatu tit ashirangya. Kamaneeshinu, nuwashsha kuseeru, Tsiparee shuchirangpasinaya. ¿Yapamasaja wayarangana? ¿Chakamasaja ashirang? Yasarezini, tárangya Mariya. <sup>3</sup> Anoo mazinayaruni, punirustayaruni, mapshiship naatarangani. <sup>4</sup> Iy tsimbunini iripurangani. Nuwma kamingeeranlluri, kusarangi. <sup>5</sup> Kuseeruri, nda pshtukuri, wachush nguti nap ashirangina. Chirikoomsha mangu xana ashirangiya; Isusurini tsipar nduniya. <sup>6</sup> Pitorsha musásiritam kushimuni kusarangiya. Kuseeramchu, wachush pshturangiya napamaama. Chirik' anshuri xanaru parangiya. <sup>7</sup> Itaru, muchunung taarangu

an waanitam xana ashirangiya. <sup>8</sup> Pakeeru, nuwsha pshturangitamana. Pshturanguri, ichinguru paranguri, mangoonarangtana. Mangishiriti Isus támeenllparee, tárangina. <sup>9</sup> Izuuru nda mangoonarangini, watam Apanlee yandamarini nda yasaranginiwa. Apanll kuk ipareetsi ituyamachima, tárangitaa, itaru anpur anoo nda yasarangini. <sup>10</sup> Ashirucha, anoo paranguni, waptam kanapuranganiya.

(Márkosa 16.9-11)

<sup>11</sup> Itaru, Mariysha mapshiship tanukatu mang yusur naatarangiya. Anush kuseeru, tanutat ashku, wantsushsha mang naparanginya. <sup>12</sup> Apanlee wasundurur tsimbun parangiya. Mburshinand kamartaru parangiya. Isusoo wayarangana anush watsinung minamtam kuxina, muchinung minamtam kuxina ashiru mang parangiya. <sup>13</sup> Apanllsha wasundurur: ¿Mayaamsha tanuksha? tárangiya Mariyaatsi. Mariysha: Watam tputs tsiparee yaranganawa. ¿Yapamasa wayarangana? Yasareezi nuwa mang, tárangiya. <sup>14</sup> Támpu, natpunuyaru, nap ashku Isusoo parang, itaru nda natstarangiya; <sup>15</sup> mzatspanind, tárangparee. Itaru, Isussha: ¿Mayaamsha tanuksha? ¿Chakangaz nachungaksha shiya? mang, tárangiya. Mariysha: Shiynaari tsiparee yarangush, nuwaa itsinsaru kamaningandama. ¿Yap wayarangsha? Nuwsha yapi tina, tárangiya Mariya. <sup>16</sup> Isussha: Mariya izari, nuw watatana, tákchu, Mariysha: Mayistoroo, táyaru, Isusumun putat mang ashirangiya. Isus tsípatpa átu kizpur putarangiya. <sup>17</sup> Isussha: Watsta; shiriyshpa.

Nuwaa pchindinllpa, watam nish nuw nda kapung taachinawa; tárangu. Wand pishtakiya Apapap kanapumaama. Itaru, shiysha zuwanllip kamanishini. Isusoo pakeena tángcha. Apapap kanapunama átcha tángcha. Siy Apanlee Aparich átis, nuwsha Apanlee Apartamana, átcha tángcha; mang, tárangiya Isusu. <sup>18</sup> Táyaru, Mariysha ayu táyaru, iyaatssha wipunasheetsini kamankatu naatarangiya. Iyaatssha pakeeru, Isusoo parangtana, táyaru, tsiyatssee ichinguru wayarangiya.

*(Matiwa 28.16-20; Márkosa 16.14-18; Lukasa 24.36-49)*

<sup>19</sup> Natamta domingosh zari tapitaranllu, iy wipunashini ichinguruni washunand shaniyaranganiya. Yaanaatsisha kurakarini puniranguni, iyaa tamundaruneepa atuni, shtandashee mbam tstsaranginiya. Yaanaatsi pishuyaruni shaniyaranganiya. Anush shaniyaruni, Isussha mangutari ipusanand xihta yakatara ashirangiya. Punirintspa; mangis mapiyngtsa. Nuwtanda, tárangiya.

<sup>20</sup> Táyaru, waanaatsi uw yámandarangu, misha watandaramaatstam yámandarangiya yuwaa kayungarangana anootsi. Iysha kchiptini Isusoo paranguni, mangini kis ashirangtanicha. ¿Nitaatiya nllitaritaja parangini? nda. Watam Isusoo paranginiya. <sup>21</sup> Paramchuni, Isussha yusur iyaatssha: Mangis punirustarintspa; mapiyrus taangtsa; tárangu. Apap nuwaa zanganirangu, nuwsha siyaatstam zanganchina. Siysa nuwaa kuki kamanishintsia; tárangiya. <sup>22</sup> Táyaru, tapus ashirangiya. Neewa, Apap Wani. Apapaa

Wizpurini yantsa; tárangu. <sup>23</sup> Ashkus, Apanlee chínash yasatssa. Tputsee Apanll mangeetsish yareenliya átus, Apanllsha anoo tputs kis chinachiya. Itaru, nda átus, Apanllsha tputsee nduntam chinachiya. Ashiri naamachima, táyaru, tsípat ashirangiya.

<sup>24</sup> Anush shaniyaruni, itaru Tomássha pishtarangiya; Isusoo nda parangiya. Tomás watacha wanir iwipuru tatsipurangu anu. <sup>25</sup> Ashirucha, Tomássha zapishsha kuseeru, iysha kamanirangani. Isusoo parangtanicha, tárangini. Tomássha: Ngichikpasa siyaya. Ndunnaa nuw kachi pakuri, ¿tamaree mangoonchi nuwa? Ndunnaa kuwipti uwish karapu marachirineetsi patatkuri, misha ndunnaa watandaramaa patatkuri, watacha táchheezi; mangoonamaam pinasaktana, tárangiya.

<sup>26</sup> Itaru, tsimbun maats matayaru maayaruni, minush domingo, anshutam yusur shaniyaranganiya Tomáspashta. Shtandashee yusur mbamaritam shtandaranginiya. Ashiritaa, Isus yusur iyash yakarangiya. Mangis mapiyngtsa; nuw watatana, tárangiya. Táyaru, <sup>27</sup> Tomásaatssha tasaseeru, Tomásaa zuwaa, nuwaa kuweetsi ptatanganda. Mishat, tandarameetsi kuwiptish ptatanganda. ¿Tamasha nda mangoonaksha? Támeena. Anoo mangoonangcha, tárangu, <sup>28</sup> Tomássha: Nuw shiyaa kurakartana; Apanlltishcha shiya, tárangiya. <sup>29</sup> Isussha: Shiy kachish parangish anumun mangoonarangsha. Itaru, tputs nduntaa nuwaa wachpa paksin, mangoonchinllinaya. Anoo tputs kaapa nuw

kis chinachina, tárangiya. Táyaru, yusur tsípat ashirangiya.

<sup>30</sup> ¿Isus támeeru, wanipaja iyash kizpur ashirang? Iysha Isusoo zapan parangtanicha. Ichinguru kamanimaam pinasaktana. ¿Tamaree minamtash kirak ashchich? <sup>31</sup> Itaru, parangi anootsim ipus ipus sheeruri, siyaam yandaktana. Nee natstayarus, mangoonangtsa. Nduntaa Isusoo paksin mangoonpana siyaa aturi, yandakina. Apanll Isusoo zanganirangiya; Apanllcha Wipaya. Isusumun mangis tatkus, taarashee urutamashee panachintsa. Ashiri mangoonangtsa atina.

Ashiri yuwaa Isus tamarangu anoo kamaneena.

## 21

*Minootssha kamanchintspa; yuwaa minush zar  
Isus yusur tuchparinshtini iyaa yakarangu anootsi*

<sup>1</sup> ¿Wanipamasaja zari? chungparee zar maayaruni, Isus iyash yusur yakarangiya musamuna Galileyamuna. <sup>2</sup> Iysha, Isusini wipunashini Galileyap tsap naateeruni, anush washunand shaniyaranganiya; Pitorpat, misha Tomáspat, misha Natánaypatatam Kanágashuchi tputsi, misha nuwaptatam, misha nuwapat zuwanllina Sandeekurinpatatam, Sípitiyurini wipini, misha tsimbunutamta tputsi, aship an shaniyaranganiya. <sup>3</sup> Pitorsha iyaa: Nuwma kawatama, táyaru, iysha ichinguruni, Pza, iysha istani, tárangini. Ashiriya, yareeruni, botish zaruranginiya. Psaan kawakuni, ngutaritini taraseeranginiya; kayupchee nda minamtiyam

putaranginiya. <sup>4</sup> Zar yakatanu, Isusssha wingumun xiyxeew ashirangiya. Itaru, iy nda natstarangini Isusootsi. <sup>5</sup> Isusssha kuruzeeru, Nlluris, ¿zapan kayupchee putayanllis siya? átu, Pitorsha: Nda minamtiyam putarangeezini, táranginiya Isusootsi. <sup>6</sup> Isusssha: Mbutsunungich yachangints; taarcha kayupchi, tárangu, iysha ayu atuni, amb kapeetaranganiya. ¡Maya! areetush kapunguri tatsiteeru, itsiramaam pinasaranginiya. Izichtapa tuni, mazachimun pshiyreeni, táranginiya. <sup>7</sup> Nuwsha: Pitoroo, Isustanda; iycha kurakarini, táranguri, Pitor anoo mazinayaru, wamaree kamartaranginya, watam iy uru turustayaruni kawatariniwa. Kamartayaru, kungush chipuyaranginya; Isusup naataranginya. <sup>8</sup> Iysha ichinguruni apinlliri naataranganiya kanushu. Arapeeja naatarangini; kuruzkuch kimtaru ashee naatarangani. Areetaa pshiyratanuni matayaranganiya. <sup>9</sup> Matayaramchuni, sumasee parangini. Isus masunllpat tazuyaru, iyaam ksiranginya kayupcheetsi. Pangaa anshutam wayaranginya. <sup>10</sup> Isusssha: Pitoroo, kayupich yashini, táyaru, <sup>11</sup> Pitorsha botip iyaptatam zaruyaruni, areetaa putayaruni, mazachimun pshiyrarangani. Kayupchee wazapan kawaranginiya. Washunand 153 putaranginiya watarinandarita. Kapungtaa tatsiteeru, ashiritaa areet nda izichiranginya. <sup>12-13</sup> Iwapayaruni, Isusssha: Neewa ktungangints; tárangu, katungtsee mbaseeru, iyaam panaranginya. Iysha anoo katungaranganiya. Antaati iy: ¿Chakshasha

shiya? tárangeezini, nda. Watam ichinguruni natstaranginiwa Isusootsi. <sup>14</sup> Ashirucha, washunand shaniyaranguni, nipta iyash tuchip zar yakarangiya. Isus tsiparangitaa, támarangiya. Támeeru, iyash yakarangu, iysha kchiptini washunandari zapanni parangtanicha.

<sup>15</sup> Ashiriya, katungtsee kawatspayaruni, Isus Pitorpat tsiyatarangiya. Zuwaa Pitoroo, ¿chak nuwaa kizpur chinaka? ¿Kaapa shiy nuwaa chinakish? tárangiya Isusu. Pitorsha: Isusoo, shaana nuwaa yasaksha; nuw shiyaa kizpur chinakina, tárangiya. Isussha: Ashiri tputsireetsi tayaspalangcha shiya, tárangiya. <sup>16</sup> Táyaru, yusur tayusarangiya Isusu. Isussha: Pitoroo, ¿tamaru shiy nuwaa chinaksha? tárangu, Pitorsha: Ichee, nuw shiyaa kizpur chinakina, tárangiya. Isussha: Ashiriya, tputsireetsi ishinangcha; ksutangcha shiya, tárangiya. <sup>17</sup> Táyaru, yusur tuchparinshtini Isus tayusirangiya. Pitoroo, ¿kaapa shiy nuwaa chinakish? átu, Pitorsha kizpur mang' mantsarangiya. Mang' mantsayaru, Pitorsha: Ichee, shiy watam ichinguru yasakshawa. Zuraktana átana; nuw shiyaa kizpur chinaktana, tárangiya Pitoru. Isussha, Ashiri tputsireetsi napangcha; wanasi tayaspalangcha. <sup>18</sup> Na kaapa mazinangcha; Kanungasimasish kizpur taarangsha. Yap shaana zandkish amb yareerush kis naatarsha. Itaru, nimun zapish kizpur wachinakchush ndusha ashtachish; kizpur taachtazish; kuwish ngutish paxayarush, nllitaritsha tputs kuweetsish kamuriyarusin, shiyaa machchinllinaya; yap nda zandkish amb

shiyaa machchiya. <sup>19</sup> Ashiritaa, tsipaneetsish nda pachindkush, nuwash tchitangandama; tárangeiya Isusu. Isus anoo kamanku, Pitoroo watsipun wasina kamanirangiya. Pitor mangutaja tsipach. Itaru, nuw kamini tsipachiya. Apanllsha anoo zandkiya átu, Isus tárangeiya.

<sup>20-21</sup> Ashiriya, Isus Pitoroo anoo kamanirangu, Pitorsha natpunuyaru nuwaa naparangiya. Pitorsha: Isusoo, ¿Wangawa; tamayree uw tsipach? tárangeiya. Pitor nuwaa mashirangparee, watam Isus nuwaa kizpur chinaranguwa. Sirútari yaani Isuspat katungaranguni, Isusunungiri ipunarangina. Pitor nuwap napeeru, nuwsha Isusumun kandaniranguri, witsshuri kazambarangina; ¿Chak shiyaa tamapingach? tárangeina. <sup>22</sup> Ashiriya, Pitor na nuwaa mashirangu, Isussha: Pitoroo, anoo shiy chinarinllpa. Nuwaana yasakina Wangaatsi. Nuwaana zandkinaareena, tputs Wangaa pachamaam waritaktamcha. Waani taap atinaareena, nduma yusur kuschuri, ¿tamareeja tsipach? Ashiri shiysa anoo chinarinllpa; shiy nuwash tchitangandama, tárangeiya Isusu. Táyaru, kasarangiya. <sup>23</sup> Ashirucha, na anumunarisha tsiyatsis nuwamun izapaneerangiya. Wang tsipacheeja, ndambaree, Isuschich atanaya nuwaatsi. Itaru, mamarpakanaya. Antaati Wang tsipacheeja, tárangeeja Isusu, nda; itaru mangutari, Nuwaana zandkinaareena, waani taap atinaareena, nduma yusur kuschuri, tsipamaam wanindaja, mangu, tárangeiya nuwaatsi.

Ashiri yuwaa Isus tuchparinshtini iyaa

yakarangu anoo kamaneena.

**24** Ashirucha, in watacha siyaam yandakina.  
Nuwaana kachi parangi anuri yandakina.  
Ashiri ngichiz nduncha. Nuw kuki itsinsamcha.

**25** ¿Antaati ichingurooja yandarangi? nda.  
¿Isusoo wanipaja nuw kachi parangi? ¡Maya!  
ichinguru yandakinaareena, kirakaa izuuru  
kachingachparina. ¿Tamayree ichinguru  
yandachich? ¿Yapeeja ichinguru wayachich?  
Itaru, siyaa mangoonpana aturi, ipus ipus  
sheeruri, siyaam yandaktana. Ashiriya,  
mangoonangtsa átana; wapparee.

[Watamaritcha Isus kuku.]

**Apanlli Kuku  
New Testament in Candoshi-Shapra  
(PE:cbu:Candoshi-Shapra)**

copyright © 2010 Wycliffe Bible Translators, Inc.

Language: Candoshi-Shapra

Translation by: Wycliffe Bible Translators, Inc.

Candoshi-Shapra

cbu

Peru

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Candoshi-Shapra

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 11 Nov 2022 from source files  
dated 29 Jan 2022

855c1646-aaa4-5dab-a701-8197de4af05f